


Aka (Hrusso) Bible



Hruso: Aka (Hrusso) Bible (Portions) for India

Aka (Hrusso) Bible
Hruso: Aka (Hrusso) Bible (Portions) for India

copyright © 2024 Bridge Connectivity Solutions Pvt. Ltd.

Language: (Hruso)

Contributor: Bridge Connectivity Solutions Pvt. Ltd.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025
6ed36eea-a167-5ded-a2d7-08d8d10b8e3c

Contents

Luka	1
Filemon	52

Luka i shi-ñu

Ġiwbraw

Bzüga go kako ġiwbraw na vyow vew a vetsü se ye he kako ye Luk i ġiw cheñe, sünda he kako yo danghuda i galyiw ksü go veksüw Kristan cheñe. Ñom-niti go homeje, i utro ġübye küġüw go da. I Tawgyew i shi-ñu truw nüna. I Tawgyew i shi-ñu seyo Tawgyew i shürhaw ná kako ġida. Ije Polus idra ye Kristan na chiġa daw Tawgyew ichi chiġa daw nüna (Kulu. 4:14, 2 Timu. 4:11; 11:1).

Ġiwbraw i djaga

Odje 60-80 kuw.

Luka i he kako í Kesriya ge ġilyeñe seyo Rome ge kakuñe ġimdzoadabi. Kako ġidaw dzaga na Betlehem, Galil, yahudiya seyo Yerusalemjo du.

Lajovo

Luka ubo yo Tawgyew i shi-ñu ye Tiyufilus í ġiilyeda. Tiyufilus chemeje “Tawgyew i nülvo daw.” I Kristan í küġüw ma mo i lyagoñ dawma se ye usu-pa yo madanghume. Luka í ġidaw ge í “Dyewfo” cheñe 1: 3 ge ġidaw í homeje i Roman gow babu dyew vedujo a du. Añe ge kako ngüdaw ná holaimeje he ye utro ġübye gojo du. Ichi ġidaw ge ana vedufodame, “Tawgyew i nüna” seyo “Tawgyew i ġadz” (Luka 5:24; 19:10; 17:20-21; 13:18).

Ha ma a vew

Jisu iñiñ lañe trumkoige, Luka i Jisu í “Nüna üsañe” cheda. I Tiyufilus í ana ġida, í ha ñu ná dadrüdama se na se í uw yo danghulafijodawe (Luka 1:4). Luka í ñiku-ñisüw djüngkoi ge í ġiw yo i kristan nabo hado chemeje Tiyufilus i danghulajobi Tawgyew i shürhaw na nüna mauw mow cheñe.

Ñustu gow

Jisu - Nüna uw a.

Udrüla

Jisu i saw seyo ichi kutcho shüw ___ 1:5-2:52

2. Jisu i nüna nabo chiġa daw ___ 3:1 - 4:13

3. Jisu ġaksüivo übraw ___ 4:14-9:50

4. Jisu i kros ge jiw ___ 9:51-19:27

5. Jerusalem ge Jisu i lüshüw paw, dzüw seyo üshükülyetcho ___ 19:28-24:53

Luka i galyiw

¹ Ñimko a ha ha lyilyedama, se ná nüna añe na galyiw ġipüñejoñe dada.

² Sünda he ñu ná dju nudzoġ iñiyo hohusedama se naje, seyo, Tawgyew i shi-ñu truñe kahisedaw se naje, se ñu ná ütrüyomdo ñí trukuida.

³ Sünambo, no je ütrüyomdo, he na he í, usupa yo hoksüñe kalyisedaw no, süvzüw Tiyofilus bábo, he na he í magabolyiw ġi vyeimeje ujoñe vyeda.

⁴ Hado cheholye, bá ha trudrülyedama, se ná umsowgo ba danghuweñe no vyedame.

Dzakariya ñe Elizabet

⁵ Nugo Herodes i Yahudiya ñetrü go ñetrü nugo dañe shüi ñeto ge ana lyikülye: Abiya müga go Jakariya cheñe mügaw a du. Üfum ye, mügaw Arõ yo samtolyiw namko yo a, iñiñi ye Elishiba.

⁶ Sünda se naksü Tawgyew uvro ge chiñifoñe, seyo Prabhu ichi shotuko dügyew ná je da shüw. Üġü dadrülyedaw ná je madatruw-makitrüw da shüw.

⁷ Sündá Elishiba i ügüzbümdá naksü agü je ñiwbi. Sündá se naksü kewje keahubi.

Sorgomuko i yo Yohañ í sakülyew ñihowtrü

⁸ Dzakariyas i í ñeşü ná dağañ kuwñe, Tawgyew uvro ge, i ñegru ge müga chew daw.

⁹ Sündada mügaw ná daw basha yo dañe kako dzulaw ge iñiñi kakülye, Tawgyew í küğüw ñegru ge jiñe shobrovzü foweñe.

¹⁰ Sündada shobrovzü fomkoi sese vyew na nopsü ge kahuañe küğütsü.

¹¹ Sese Tawgyew ichi sorgomuko a ye shobrovzü fodaw südzüvyepsüğü vyego psügañe ge gudzukülyedaw ye, í hohu.

¹² Sündá Jakariya í hoglye şüpo lamosha, sündá í ğew vyehua.

¹³ Seşo ye sorgomuko i í che, “Jakariya, djuğejodawe hado chemeje bá küğüdaw ye dzühujemme sündada bafum Elishiba yo babó saw a sakülyejome, sündá ba se iñiñi ye Yohañ ñe ñijodawe.

¹⁴ Sündá ba agü saahuñe şüpyo lüshüñe, lüshümfoajome seyo şüpyo nuna na agü sadabi cheñe lüshüjome.”

¹⁵ Hado chemeje i Tawgyew üvro ge sawlyiw chiñifojome; seyo tsü keje matujome; seyo iyañ ulhu ge duluge yo ğulo güdraw yo güdraavojobi.

¹⁶ Seyo Israyel yo naje şüpo nuna na Tawgyew ichi ge kakultrujome.

¹⁷ I ñihow Eliya í ğulo seyo küña dafidama dañe üvro üvro kutrojome hado chemeje awu na na üdrü-ulu ye agü nachi ge tchodügyeje; seyo zew chew madzüw na Tawgyewchi ge chiñidrüñe lakujo sündá Tawgyew ibó dafimsofiw dashütrüvojo.

¹⁸ Jakariya i sorgomuko í dzü, hei no kunda danghujowa; hado chemeje nobó mukroadabi seyo nofum boje mukromyadabi.

¹⁹ Sorgomuko i í trutcho, “No Gebriyalwa, Tawgyew ichi mukow kewwa sündá üdra gudzusaw ye wa; sündada nó badra chitruweñe seyo bá he ñu ye truweñe kiadaw yewa.

²⁰ Seyo hojo dawé, he ñu ye umsow makalu kuw ba mulyo ğyojome, sündá mazefijomme, hado chemeje ba nó ñu ye, i ke damdrüñe dafiajoma, sei umsow mavye.”

²¹ Nuna na Jakariya í ğyokrütsü, sündá mavyenghuahuw lyatsü, hado cheme ñegru ge aña kunda uwalajemañe? Vyeñe.

²² Sündá i ñopsü kahuadabi abó ñu mazefibi, sündawñe na danghuladabi i ñegru ulunge hama ñita homadadañe, sündá i sei vyeğelalye seyo mulyo lyadabiñe.

²³ Sündá i sehu datunofiahuñe i í ñe ge katcho.

²⁴ Setasağa yo ifum Elishiba somafobi, sündá hubye pom kuw i nudzoğ ana cheñe müşüñe vye.

²⁵ “Nuna nafo ge nó bümazeamedañe nobó Tawgyew i he ñeto ye ana daidawa.”

Sorgomuko i mariyam itrü a jiku

²⁶ Elishiba agü ñiw yo hubye ğe kuw sa a Tawgyewchi go sorgomuko Gebriyal i Galili iñiñi Nazrat ñetrü ge,

²⁷ Mimsa nano makaw a ichi ge kiku. Djú Joseb cheñe Dawud í ñeşü go Muhusa a idra ğulo daida, se nano makaw mimsa iñiñi ye Mariyamwa

²⁸ Sündá Sorgomuko i ichi ge ñelunge jimyoñe che, ba hu je adjüdjüw no je ağımiw lüshütukoaiwe, Djú Tawgyew í nülwov tukoaidama! Tawgyew i badraşome.

²⁹ I se ñu yo şüpyo ğelamoag, sündá vyemche, hei küna ñu a djüjemma?

³⁰ Séso Sorgomuko i í che, Mariyamy; djuêjoda, hado cheme Tawgyew í nülvo bá tukoaidawa.

³¹ Sünda hojodawe, ba somafojome, sünda ba saw a saküleyome, ba iñiñi ye Jisu ñe ñijodawe.

³² I šüglyiêjome; seyo bá Soêgro-yaloñe üsaw chejome; sünda Tawgyew i í awu Dawud i psüga ye í djüjome.

³³ Sünda i Yakub í ñešü ge shüwa nugo da shükejome; sünda í êadzü da shükyew ye keje mamütrajome.

³⁴ Mariyam i Sorgomuko í che, “Hei kúnda lyijowa? Nobó muhuje madanghulubi.”

³⁵ Sorgomuko i í trutcho “êulo güdraw ye baso ge kamyojome, seyo Toêgroyama í Êagra ye badru ge duñgudrujome; Hado chemeje í êulo güdraw yo sakülyalaibi, í Tawgyew üsaw chejome.

³⁶ Sünda hojo dawé, bá ñešüê go Elishiba i je mukromyadabi a saw sakülyemkoiba, hei ichimsoba í na Ügübzüm chebabi, i so mafow hubye êe kudaba.

³⁷ Hado chemeje Tawgyew ichi ge ha ñu je madafiwjo che ñiwme.”

³⁸ Mariyam i che, “Howe, no Tawgyew i chiêadambabi, bachi ñu trudo trüduyo dubroñe nodra ana lyimeje.” Sese sorgomuko ye itrü yo katrükralye.

Elizabeth ichi ge Mariyam i jiw

³⁹ Sündaw se ñeto Mariyam i kutcho yo gudzuñe pufo go Yahudi na ñetrü a ge ji.

⁴⁰ Sünda Jakariya iñe ge jiñe Elishiba í gagañe da.

⁴¹ Elishiba i Mariyam ichi gaga chewye dzühuhuwñe, sešügudoye ulhu go agü yeje gog, sünda ilishiba i êulo güdraw yo tukoa.

⁴² Sünda i gow yo êogzuñe che, ba mim naêi yo süvzüfowmme, seyo balhu go sheje ye šüvzüw me.

⁴³ Sünda noje hango yo nülvojema, no Tawgyew üyañ ye notrûgañ a jikuda.

⁴⁴ Sünda holabya bachi gaga chew ye nofu ge dzühubyo dzühügýowñe sešügudo ye nolhu go agü yeje lüshülye gogje.

⁴⁵ Sündada seiye šüvzüwmme, se í djuyo umsow vyeñe Tawgyew ichi go, ha ñu ye idra chedama, sei damsojebi.

Mariyam i Tawgyew í troi.

⁴⁶ Sese Mariyam i che, “Nodrü-nolu yo Tawgyew i troime.

⁴⁷ Sünda noêulo ye, nó güdraw choakejo Tawgyew yo lüshü damme.

⁴⁸ Hado chemeje i í chiêadam idru ge nülvo hoida, sündada holabya, ayo dalalye shüwa shüw pumnüshüêi kuw nüna na nó šüvzübram chejome.

⁴⁹ Hado chemeje se bolugobraw Tawgyew i nobo chiêa dew dew daida, sündada iñiñ ye güdraw me.

⁵⁰ Sünda i nülvo ye se nadra jome, dju í êeima, saltso saltsow daw kuw sünañgudrujome.

⁵¹ I í bolugow ye sheiwa, seyo dju nudzo drü-lu ge dafowêoñe daima sena daame-kiame vye.

⁵² I shotuko dümbraw na psüga go dügaaha; Sünda nülvodaw i udruda vye.

⁵³ Luhušümgraado na gañ uwyo da djü, séso dzomo-külyimodaw na ügzü ufobüla lyadügye.

⁵⁴ I í nüdzog aki-awu na, kulo Israyel na êaksüla, hado chemeje se nülvo ye büvyesüdañe.

⁵⁵ Shüwa Abraham ñe i saltsoahuw nadra shüwa duñgudrujo, I küna ñi bupye-ñipyen nadra chedama süna.”

⁵⁶ Mariyam i hubye dzü kuw idra g̃yoselyeñe, i ñe ge katcho.

Yohañ Baptisma djüw i sawfo

⁵⁷ Sese Elishiba i samdrü kudabi, sünda i saw sakülye.

⁵⁸ I g̃afopsü-g̃ampsü seyo i ñeşü-g̃nepeğ na sei dzühulye, Tawgyew i ídru ge şüpyo nülvo dadañe, idra ye lüshütuno.

⁵⁹ Sündalye ana a dadawa ñegi şügzü kuwñe se agü í fyuw ñeto kudabi sünda i ñiñi ye ichi awu Jakariya í iñiñ ye ñiweñeda.

⁶⁰ Séso iyañ i che, mowwe; i ñiñi ye Yohañ ñe ñijo dawé.

⁶¹ Sünda na í che, bá ñeşü ge ana üñiñi djuchije ñiwa.

⁶² Sese i ichi awu i damcheñe dzü, ba iñiñi í ha ñigoñda?

⁶³ Sündawñe i g̃ijo kako prülañe g̃iag, iñiñi ye Yohañ me, sündawñe vyew na mavyenghuatsü.

⁶⁴ Sündawñe ichi umdzu ñe zebüla naksü seşügudo ye zefikülye; Sünda i ñu zehuahuw ye Tawgyew i trokülye.

⁶⁵ Sündawñe iñisa ye g̃yodo na vyew g̃emoatsü; sünda se ñu ye vyew se Yahudiya nachi ñetrü üñisa üñisa naje şügeatsü.

⁶⁶ Sünda vyew dzühudo na nudzoğ nudzoğ drü-lu ge vyelatsü che, “He agü ye künajoješoma?” Hado chemeje Tawgyew i ügzü ye idra dubi.

Dzakeriya i ñihow

⁶⁷ Sünda iyaw Jakariya i g̃ulo güdraw yo tukoa, sünda ñihokülye.

⁶⁸ Israyel go Tawgyew í şüvzüwe.

Hado chemeje i í nudzo nuna ná hokrüvo,

Sünda ná g̃aksüivo,

⁶⁹ Seyo i kulo Dawud i ñe ge ñibo muchoaio hosüw üşüvzü a lahuaida.

⁷⁰ Sünambo i bzüga yomdo güdraw ñihow truw bupye-ñipye nayo, dju ñedzü üña no üña gomdo dulyisema, senayo trulyeida.

⁷¹ Chemeje ñi vyeñiw-vyeğaw nayo, seyo ñi homsüsew nagzü yo ñi muchoaio;

⁷² Sei ye ñi bupye-ñipye na nülvo dañe nudzoğ güdraw ñu i vyesüweñe,

⁷³ Seyo se trasğa sei, se í i ñi awu Abraham yo todoye,

⁷⁴ I ñi hei djüjo, sei ye ñi vyeñido nayo kahajoñe,

⁷⁵ Ivro ge chiñiw seyo güdraw g̃abo kaw ge şüdzowkuw mağew ichi chiğa dañgudruweñe.

⁷⁶ Seyo ba ye muhusa agüsa, Toğgroyama i ñihobraw chejome, hado cheme ba Tawgyew ichi g̃abo dashütrüvojoñe uvro uvro kutrojome,

⁷⁷ Sei ichi nuna na djumuchoawe, dju, ná lalo yo güdraw pawma.

⁷⁸ Hei ñi Tawgyew í nülvo dado yo lyijome, seiyo ñidru ge udrugo yo müsaw a dzüto-rünokülyejo.

⁷⁹ Sei ye nukuğuw seyo dzüjo g̃abo ge g̃yodo na müsaw djü, seyo ñishi í lüshüw g̃abo gudow lakutrokewe.

⁸⁰ Seyo se muhusa angasa ye Yohañ, şülyifi şülyi seyo g̃ulo ge gokülyefi gokülye seyo Israyel ge kakujo ñeto kuw i bye ge g̃yo.

2

Betlehem ge Jisu i saw

¹ Se ñeto ge ñubyu Kesar Agastas ichivye gow shotuko-kunu kihua, vyow Druguw-Drulyiw gow g̃adzü-g̃aği nañiñ g̃imiyoweñe.

² He uvromashü iñiñ g̃imiyow ye ñubyu Kerinias í Siriya gow dümbraw dadaw ñetow ge daw.

³ Vyew na nañiñ í g̃imyojoñe nudzo-nudzo ñetrü ge katsükügatsü.

⁴ Sündä: Joseb je Dawud i ñeşü go üşü umu, sündada i Galili go Nazrat ñetrü yo kañe Yahudiya ge Dawud i ñetrü Betlehem ge ka.

⁵ I iñiñ ġimiyow, í goidaw Mariyam dju so mafoma idra jisa.

⁶ Na Betlehem ñetrü ge dulu ge, i agü sajo ümdrü kuadabi.

⁷ Sündä i agü üsaw samkyo a saa sündañe í gyeka ge ġüşhüñe káko ge zua ve, hado chemeje nabo süge ñe ġyojo mapa.

Fugulu ġokrüw nabo soġgomuko í ñu kidaw

⁸ Seyo se ñetrü a küña fugulu ġyokrüw duma, se na ñegi ge vi ge ġyoñe ná hokrü ġow.

⁹ Seyo Tawgyew i sorgomukow a namgkow ge gudzukülye, sündä Tawgyew i ġagra namgkow ye dubrokülyeg, sündawñe na şupo ġeatsüg.

¹⁰ Sündawñe sorgomukow i na che, “Dju ġejo daw; Hado cheholye chemeje, howe, no tuġu-tumo vyow nabo şupo lüşhüw ñu a trujome.

¹¹ Yow ñubyu Dawud i ñetrü ge djobo muchoaijo a sadame, sündä se i Prabhu Masime.”

¹² Sündä se ye ba chi shewme, sei ye ba agü a ye gye ġüşhüñe seyo káko ge zuw hohujome.

¹³ Sündawñe sorgomuko a üdra ye soġgomuko upua a Tawgyew i iñiñ la troñe ana chew hohuda,

¹⁴ “Ñedzü ge Tawgyew í ġüdzüw sündä no ge se tuġu-tumo na ġüdzüw djüwe djü ñedzü Tawgyew i uw veima.”

Fugulu ġaksüw na Betlehem ge jiw

¹⁵ Sorgomuko i natrü go soġgo ge katrallyewñe, fugulu ġaksüw na ġütchü cheġi, “Tchow, ñi Betlehem jiñe he ñu chedaw i, seyo Tawgyew i trudaw í, hobo.”

¹⁶ Sündä na mekutcho djeñe Mariyam ñe seyo Joseb naksü ütrü ge anga i káko ge vedaw hohu.

¹⁷ I holyeñe na se anga ufo gow na ha trudama se ñu chedaw na truzeġiatsü.

¹⁸ Seyo vyew dzühutsüdaw na fugulu ġaksüvw na ñu trudaw yo mavenghu-atsüg.

¹⁹ Seşo Mariyam i he ñu na üdrü-ulu ge veñe vemchepüñe.

²⁰ Sündä fugulu ġaksüw na ná küna trudama, sünambo vyew dzühuñe hohuñe Tawgyew i trolyeñe lüşhüñe katsütcho.

Jisu ichi fyüñe seyo iñiñ ñiw

²¹ Ñegi şügzü kufiahuñe, seyo i Jisu i mükraksüw fyumdrü kuadabi, sündä iñiñ Jisu ñe ñi, he iñiñ ye sorgomuko i uluhudrü ge mañilugomdo djülyedabi.

²² Sündä Musa í shotuko dalyedaw yo Mariyam i güdraw ġyow ye ġomdzoahuwñe sündä Joseb ñe Mariyam naksü í Tawgyew uvro ge shew Yarusalem lañe jike.

²³ Tawgyew i shotuko ge ġimbo: “Vyew saw samkyo na Tawgyew ibó güdraw vyejome.”

²⁴ Sündä Tawgyew i shotuko dalyedaw go chemeje, “Aşüm osa ksü, momeje paġusa üsasa ksü lañe küġüwe.”

Simon i ñi-how

²⁵ Se ñeto ge Yarusalem ge Simon iñiñ yo nuna a duw, sündä i güdraw nuna seyo Tawgyew i küġüw nuna, sündä Israyel ge ġüdzüjo i ġyokrü, seyo ġulo güdraw üdra dusa.

²⁶ Sündä ġulo güdraw yo truhua, ba Tawgyew i saw Masi í mahohulu, ba madzüvzäjome.

²⁷ Sündá í Ġulo Gúdraw i ñegru nopsü ge jidügye; sündá iyaw ñe üyañ naksü se agüsa Jisu íbo, ahugo shotuko na dajoñe veñe lajikedaw sesse,

²⁸ sündá Simon i angasa í lolalyeñe, Tawgyew í troñe ana che:

²⁹ “He Tawgyewwa, ba ñu chew kudabi, bá kulo í ba ġüdzüw yo kadügyejodabe;

³⁰ Hado chemeje noñi yo ba muchoadügyedaw ye hohudamme.

³¹ Djú ba vyew druguw-drulyiw gow nuna na hovow sa a dadrü kikülyadama.

³² I utro sama nabo umsow truhoahuw müsaw da kakülyajome, sündá Israyel go djo nuna nabo lüshü-lübajome.”

³³ Sündá üyaw ñe üyañ naksü ubo gow ñu chedaw yo mavenghuatcheseñgudru.

³⁴ Sündawñe Simon i í gaġüzü djüñe, üyañ Mariyam í che, “Howe, i Israyel go na gaañe seyo pülyidügyejo go, seyo ana a chi shedügyejoñe ġyokrüdügyeda, seifo go ñu zeġijome.

³⁵ Sündá ba ġulo je vetsü yo vudüga-vudüga dajome. He yo šüpo na drü-lu ge vedaw na truhuañome.”

Hanna i yo tudaw ñu

³⁶ Sündá Asher ġübye go Fanual üsam a duw iñiñ Hanna, i ñihow trum: I šüpo mukrombi, I ülshi dzüwñe üdra gzü daw yo odje mro kuw shüfisawba.

³⁷ I odje šügzüġütrü psüġi gow müjem: sündá ñegru keje matrahuw ñegiw-ñetow drüpsü-ñilyi mañiw seyo küġüñe ġyonggudruwba.

³⁸ Sündá i sehu ñeto süge jikuñe Tawgyew i drü-lu yo uw che, sündá vyew ná, dju Yarusalem i yo muchoajoñe ġyokrüvodaw na, ifo go ñu trumyokülye.

Josep ñe Mariyam naksü ñe katcho

³⁹ Sündá na Tawgyew davyedaw shotuko üġü ye vyew damdzoahuwñe sese Galili ge nudzoġ ñetrü Nazrat ge katcho.

⁴⁰ Sündá angasa ye nugow lya, sündá bolu dukülyebi, seyo patsü-sholu tukoaha, sündá Tawgyew i nülvo üdra sa dusa.

Angasa Jisu ñegru ge

⁴¹ Üyaw ñe üyañ naksü oje drü-drü Yarusalem ge Fasa rhano ge jinggudru.

⁴² I oje ġüyo ksü kuwñe, na rhano ge ġidaw ñom í daw Jerusalem ge ji.

⁴³ Sündá na vyew ñegi ġyomdzolye sese katcho, se angasa Jisu Yarusalem ge ġyotralye; sei üyow ñe üyañ naksü madanghu.

⁴⁴ Na ana veñ, i upu jiw nadra dusamada, ñegi a kapseajebi: sündá na í nadraw seyo na ñešü nangko ge tchüpüñe.

⁴⁵ Sé matchülawñe na tchü-tchüñe Yarusalem ge katcho.

⁴⁶ Seyo ñegi dzü sefum ye na í ñegru nopsü ge dadrüw nangko ge ġyosañe, ná ñu dzüñe seyo naje i chi dzü ġyodaw hohu.

⁴⁷ Seyo küña na i ñu truw dzü ġyodama, se na vyew í danghuw yo seyo i ñu hutrow yo mavenghuatsü.

⁴⁸ Sündawñe na í holyeñe mavenghualyeñe seyo üyañ i í che, “No sawwa, ba ñidra ana hado dañe? Howe, baw ñiksü ba taġaw na veduw tchü ñegiaha.”

⁴⁹ I í che, “Ba no hado tchüña? Hadoma madanghuma, no nó awu i ñe ge dujobabi cheñe?”

⁵⁰ Sešo i í ha ñu chedama, i se i madzüsüla.

⁵¹ Sündawñe i üdra kasa, sündá Nazrat ge kaku, sündá na chew dzü ġyosa; sündá üyañ i he ñu ye üdrü-ulu ge ve.

⁵² Seyo Jisu i patsü-sholu seyo udru ge lyifilyi sündá Tawgyew ñe nuna naksü ubo yo go shülyi.

3

Yohañ Baptisma djüw ichi shi-ñu.

¹ Nugo Tibiriyus Kesar ñetrü nugo dañe oje ġütrüpom kuw sese, seyo Pontus Pilatus i Yahudiya go ñetrü nugo da shüi sese, seyo Galili ge Herodes, sünda üñu Filip Ituriya seyo Trakonitis go nugo da shüw sese, sündalye Abilene ge ye Lisaniyas go nugo da shüw sese.

² Seyo sese Anasñe Kefas naksü müga gow, seta-seġa Tawgyew ichi shi-ñu ye, ge bye ge Jakariya ichi üsaw Yohañ ütrü ge dzühuku.

³ Sündalye i Yordan hu itrüġaň go vyew ñetrü-ñetrü ge jiñe, lalo muchojoñe drü-lu ye vyegudoweñe baptisma ifo ye truzekülye.

⁴ Yasaya i ñihow trulyedaw shi-ñu kako ge ġidaw ye:
 “Bye ge shogzükülyedaw nüna i ġuksüwme he i:
 ‘Tawgyew i ġabo dashütrüvowe, i ġabo í gudow davowe.

⁵ Kaguġuahuw küñama kazeġiyijome,
 Seyo püsa je lüñew daajo;
 Seyo üküngüw ná gudojo, lüvzüw lüñew ġabo
 Sena ġabo rhugro lyijome.

⁶ Seyo uso duw chebiw ye vyew Tawgyew i muchoaihuw hohujome.’ ”

⁷ Dju upu dyam na ichi ge baptisma lajoñe jihuañe jikutsüdaw na, se na i che, “He byu üsa nawa, djó dju truda, he kalai lusuvyuw yo ġe jehuatsüwe che?”

⁸ Drü-lu vyegudofilaw kuw sheje lakuwe: seyo nudzoġ-nudzoġ drü-lu ge ana djuvyelajo dawwe, se ñi aki-awu ye Abrahameñe; hado cheme no dju chengkoime, Tawgyew i he kunu yo je Abraham íbo mulo lakülyefijobame.

⁹ Seyo ya bo puġje ye shoñ ükrütrü ge vyedabi, sündada ha shoñ ye sheje uw yo majema, se na poskealye mi ge foahuebabi.”

¹⁰ Seyo nüna na í dzü, “Sename ñi ha dajowa?”

¹¹ I ná tru, “Djuchi ge polu ksü duma, se djuchi ge ñima se i djüwe seyo djuchi ge tsajo duma, se naje süna datsüwe.”

¹² Seyo patso-law na je baptisma law jiku, seyo í dzü, “He dadrüwwa, ñi ha dajobya?”

¹³ I ná trutcho, “Dju djóbo ġyokrüima, se í fojelüzbüw patso djulajo dawwe.”

¹⁴ Seyo rhünakew na je í ana dzü, “Ñi ha dajobya?” I ná chetcho, “Djudru ge je külü djujowe, seyo mülaw-mütraw djufojo dawwe, seyo nudzoġ chiġa dadaw ge lüshüjo dawwe.”

¹⁵ Sünda nüna na se í vyeksüñe ġyomkoi sese, seyo vyew na nadrü-nalu ge Yohañ ifo go vyemkoi, haña he ashá he i Masi mošomachañe.

¹⁶ Sündawñe Yohañ i vyew ná che, “Nobó djo hu yo baptisma djüwbame, séšoye i kalaime, dju nó cheje saw-lyiw bolufowme; no ivro ge ichi shita udro tashaijoje ugō ñiw sü nabame, se i djó ġulo ġüdraw seyo mi yo baptisma djüjome.

¹⁷ Ichi chiaġi ye ichi ügzü a me; seyo i í ñetchü ye uw yo dagüdrajosome; seyo pulgü tcholadaw na üšaka lakeġijome, séšo üġütchü na ye mi ge foajo se mi ye keje madzoñoajo.”

¹⁸ Sündalye i nüna na dadrüñ-dadrülye shi-ñu uw je trusejome.

Herodas i Yohañ í pache ge kiw

¹⁹ Sešoye i psüġimko yo ñetrü a go nugo Herodes í iñuw Filipus ufum Hirodiyas ifo go, vyew lalo datruw nafo se na sei í dadaw na fokülye.

²⁰ Sündada Hirodes i vyew naġi yo je i fow lalo je datru, Yohañ í pache ñe ge shü yewewe che.

Yohañ yo Jisu í baptisma djüw

²¹ Vyew na baptisma latsüwñe, seyo Jisu je baptisma lalyeñe kügü gyo, sündawñe ñedzü müsaag.

²² Seyo gulo güdraw pağusa veduw ye uso dañe idru ge gûdrokülya, sünda ñedzüdru go ñu zekülye “Ba nó sawme, ba yo no şüpo lüshüdame.”

Jisu i galyiw

²³ Jisu i shi-ñu trukülyewñe, sese i oje dzüğü kuw. I Joseb üsaw (nüna na ana vedabi), seyo i Eli ichi,

²⁴ Seyo i Mattat üsaw, seyo i Lewi ichi, seyo i Malki ichi, seyo i Jannai ichi, seyo i Yusuf ichi,

²⁵ Seyo i Mantiyah ichi, seyo i Amos ichi, seyo i Nahum ichi, seyo i Asaliya ichi, seyo Naggai ichi,

²⁶ Seyo i Mat ichi, seyo i Matiyah ichi, seyo i Simi ichi, seyo i Yosek ichi, Seyo i Yoda ichi,

²⁷ Seyo i Yohañ ichi, seyo Resa ichi, seyo i Jarubbabel ichi, seyo i Shaltiyel ichi seyo Nari ichi,

²⁸ Seyo i Malki ichi, seyo Adi ichi, seyo i Kosam ichi, seyo i Almadam ichi, seyo i Er ichi,

²⁹ Seyo i Jisu ichi, seyo i Aliyejer ichi, seyo i Yorim ichi, seyo i Mantat ichi, seyo i Lewi ichi,

³⁰ Seyo i Simon ichi, seyo i Yahuda ichi, Seyo i Yusuf ichi, seyo i Yonan ichi, seyo i Eliyakim ichi,

³¹ Seyo i Maleyah ichi, seyo i Minnah ichi, seyo i Mantat ichi, seyo i Natan ichi, seyo i Dawud ichi,

³² Seyo i Yise ichi, seyo i Obed ichi, seyo i Boj ichi, seyo i Salmon ichi, seyo i Nason ichi,

³³ Seyo i Amminadab üsaw, seyo i Arni üsaw, seyo i Henson üsaw, seyo i Peres üsaw, seyo i Yahuda üsaw,

³⁴ Seyo i Yakub ichi, seyo i Isahak ichi, seyo i Abraham ichi, seyo i Terah ichi, seyo i Nahor ichi,

³⁵ Seyo i Sarug ichi, seyo i Rawu ichi, seyo i Peleg ichi, seyo i Eber ichi, seyo i Shilah ichi,

³⁶ Seyo i Kenan ichi, seyo i Arafzed ichi, seyo i Shom ichi, seyo Nuha ichi, seyo Lemek ichi,

³⁷ Seyo i Matushilah ichi, seyo i Hanok ichi, seyo i Yirid ichi, seyo i Mahallel ichi, seyo i Kenan ichi,

³⁸ Seyo i Enosh ichi, seyo i Shet ichi, seyo i Adam ichi, seyo Tawgyew ichi üsawwa.

4

Jisu i purkya

¹ Sünda Jisu i gulo güdraw yo tukoañe, Yordan hu go kakutcho; seyo gulo yo bye ge lağüşhi lağüşhi vye;

² Seyo ñegi piğü kuw mütü na dakütso-kikütso ho. Se ñeto ge i haje-haje matsa-matuw seyo se ñeto kamdzohuñe, sese i luhuşüku.

³ Sündañe mütü ye í che, “Sünameje ba Tawgyew üsawşommeje, he kunu ye cheha odje lyaweñe.”

⁴ Jisu i í trutcho “Ğidame, nüna na odje yo aka mashüjome.”

⁵ Sündatchowñe mütü ye í la djeketcho sündalye lügañe pu udru gow vyew druguw-drulyiw go ñetrü ná shemdzoa.

⁶ Sündalye mütü chetcho, “No he na he i vyew bá übraw dawene djüjome, sünda no gagra djüjome, hado cheholye he na braw nobabi, seyo no dju djügoñdama djüfjobame.

⁷ Sündada ba nó kügümeje, he na vyew bachi lyajo.”

⁸ Jisu i í chetcho, “Ana gidame: ‘Ba bá nudzoğ Tawgyew í gaga dawewe; seyo í kügüjo dabawe.’ ”

⁹ Sündatchowne i í lalye Yarusalem go kügüw negru ñelütsü udru ge lalyi vye, sündalye í che, “Süname ba Tawgyew üsaşommeje, babraw bá nudzoğ he ayo üla ge gaawe.

¹⁰ Hado cheme gidabi, ‘I bábo í sorgomuko ná babo gaksüweñe dügyejome’

¹¹ Seyo ‘I bábo ügzü yo lolajobame, hado chemeje bá gaañe kunu ge bashi í mapadügyejoñe.’ ”

¹² Jisu i í chetcho, “Ana je chedame; ‘Ba nudzoğ Tawgyew í dafimsoima djuhojo dawewe.’ ”

¹³ Mütü ye í dafiyima madafima da hopüñemdzoahuñe, sündawne memja kuw ütrü yo kahatrükralye.

Galili ge Shi-Ñi trukülyew

¹⁴ Sündatchowne Jisu i Gulo Gúdraw yo tukoañe, Galili ge katcho, sünda ífo go ñu ye üñisa üñisa yo küña ñetrü duma vyew dzühuzeğatsü.

¹⁵ Seyo i süge Tawgyew í kügüw melye ñe ge truw ñe ge shi-ñu truñgudru, sünda vyew na í trotsüküğatsü.

Nasrat ge Jisu í mağoñiw

¹⁶ Sündalye i Nazrat ñetrü ge jiku; hayo sa a í dalañe shükyedama sese; seyo í nudzoğ daw ügü dajo ge gyogow ñeto kuwne kügüw negru ge jiñe kako ngüjoñe gudzu.

¹⁷ Ñihow Yasaya í gilyedaw kako ye í djü, sünda i kako ye tahalye, hayo sa a gidama se i lakülye:

¹⁸ “Tawgyew í gulo güdraw nodra dume,
Sündada i sapse na shi-ñu truweñe nó lakülyedame,
Seyo nó ana dawene kiadame, külyidaw ná shaaweñe,
Seyo üñi gew ná hofidügyeweñe shi-ñu na truñe,
Seyo dügrülyadaw na lahuiweñe,

¹⁹ Seyo Tawgyew ichi lüshü gyojo oje í shi-ñu trujo.”

²⁰ Sündalye i se kako ye pyelyealye í shürhaw ügzü ge djü, sündalye gyoag: seyo se kügüw negru yo nuna na í homdzoatsü.

²¹ Sündawne i ná che, “Yow he gidaw ye djovro a damdzojemme.”

²² Seyo vyew na í umsolyeñe vyeatsü, seyo ha shi-ñu ye i umdzu yo zehuahima, se na i djühulye vyengatsü; sünda ná ubo chetsü, “Haña he i Joseb üsaw mowma?”

²³ I na chetcho, “Djo nó he anabo zeğajobamme, ‘He mügawwa, nudzoğ í uw dagyolatchowe! No hadamje ñu dzühudaw ye ba Kafarnahum ge dadaw ná age nudzoğ ñetrü a je dawewe.’ ”

²⁴ Seyo i je chetcho, “No djó umsow cheime, djü ñihow je yow kuw nudzoğ ñetrü ge ügö mapawme.

²⁵ No bá umsow cheime, Eliya í ñeto ge oje dzü kuw ñedzü ye pyelyeatrülye, ana lyiladjew vyew druguw-drulyiw ge luhuşümoatsü, sese Israyel ge şüpyo müjem kadã dutsü.

²⁶ Séşo Eliya í se namko ye djuchi ge je maki, Sidon go Sarfat ge Jewishñim mo müjem a ichi a aka ki.

²⁷ Seyo ñihow Elisha i shüi ñeto ge Israyel to şüpyo ĝoĝo naw kadã, sêso Naman ñidaw Jewish mo Siriya go nûna yé tralye vyew na so güdraw madaw kadã.”

²⁸ He ñu ye dzühubyo-dzühuĝyowñe küña na se ñegru a duma, se na vyew lusvyumfoatsü.

²⁹ Sündalye gudzulyitsüñe í na se ñetrü yo lahua, sünda ha pudru to í ñetrü ĝyodama, se pudru ulodza ge la jiku, í seyoşü üla ge dügaajoñe.

³⁰ Séso i nalumko yo kahulalye katrükralye.

Ĝulo ma uw í ñepsü ge lahuahuw

³¹ Sündatcholye i Galili ñetrü go Kafarnahum ge jiku, sünda ĝyogow ñeto ge nûna ná shi-ñu tru.

³² Se na í shi-ñu ye dzülye mavyenghuatsü hado chemeje í ñu ye dügyebyo-dügyeĝowdra du.

³³ Melye ñe ulunge nûna a du, djuso ge ĝulo mauw kamyö ĝyodama. Se i şüpyo gow yo şogzukülye,

³⁴ “He Nazret go Jisua, no bá ha tsünghu? Haña ba no damtrüajoñe jikuwma? No bá danghuwşowa ba djuma? Ba Tawgyew ichi güdraw üsaw ñe sakülyedaw yewa!”

³⁵ Jisu i í züñe che, “Mazüda ĝyo sünda i yo kahuag!” Sündawñe se ĝulo mauw kamyodaw ye ilungo haje ma uw madalyew kahuag.

³⁶ Sei hollye vyew na aañiñe vyeatsüg, seyo se na naĝütchü ge ñu truĝiñe che, “He i ye küna ñu bajeşoma? I se ĝulo ye ñigudu yo maĝew dügyebyo-dügyeĝyoiwa, sündawñe se i je kuhuabai.”

³⁷ Hangge je hangge je ímdo í kadang ifo truĝitsüabaibi.

Patras ichi apyeñe utro nûna na dagyow

³⁸ I ñegru yo kahuañe simon í ñe ge ji, süge se Simon (Pirat) ichi apye ye uso shüñe nala. Sündada i íbo i küĝütcho.

³⁹ I ichi üñisa a gudzulye se usso shü nadaw í züg, züwñe sese usso shüw ye gabruag sünda uwabyo-uwaĝyowñe i süge age da í datunotcho.

⁴⁰ Dru guamkoi sese dju-dju sama-sama yo nomñew yo so natsüdama, se na ichi ge la jikutsü, sündawñe i ügzü ye nadru ge a a dañe vyeñe na dagyotsü.

⁴¹ Sündawñe ĝulo mauw na şogzuñe che, “Ba Tawgyew ichi üsawwa,” şüpyo nachi go kuhuatsü, sêso i se na züñe seyo ñu mazüdügye, hado chemeje na danghudabi, i Masi cheñe.

Galili ge shi-ñu tru

⁴² Sünda ñetoahuwñe i namko yo kahuañe ĝüdzüw ge katrükralye, sündawñe upu na í tchüsetcho ichi a kakusetcho, sünda í dügotha, nachi go djuka-trükralyewñe.

⁴³ Séso i ná chetcho, “No ñetrü utro ge je Tawgyew ichi shi-ñu trujo dulumme, hado chemeje nó he í daweñe kiabadamme.”

⁴⁴ Sünda i Galili ñetrü go ñegru ge shi-ñu tru.

5

Jisu ichi shürhaw

¹ Upu na ichi ge gapulotsüñe, seyo Tawgyew ichi shi-ñu na dzütsüküĝütsü, sünda íbó ge Gannesrat go huĝülyi üdza to gudzu, sese ana a da.

² Sese i huĝülyi üdza ge lü ksü vyedaw hohu, seyo tromaw-dzükrüw na ná tromaw na tchegüdrankoi.

³ Se lü namko ye a ye, se Simon ichi ye lyimyoalye, i í hudza ge me latrüyewñe küĝüñe che, sündawñe i lü ge ĝyolye i nûna ná shi-ñu trukülye.

⁴ I ñu trufiahuwñe, sese i Simon i che, “Gyuw ge la jikewe, seyo tchü lügyejoñe bá tromaw ye majo dawwe.”

⁵ Simon i í chetcho, “He Tabrawwa, no yakülyi ñegimütrü kuw koñiw dawye ha malügyelafibi; sedamje ba ñu cheda, tromaw mamkoime.”

⁶ Se i süna dawñe, ichi tromaw ye tchü aña-ñütchüw tromaw gağalajew malgrula.

⁷ Sündaw i í draw utro lü ge gyodaw na, age djeñe latunoweñe naje damche: seyo se na djekutsüñe, se lü ksü ye gudze-gulüşüahuw lagu vye sünda lü yeje mülaño ladjew latchuño vye.

⁸ Se na holyebi Simonñe Patras naksü Jisu üshitrü ye gaañe, seyo che, “He Tawgyewwa, notrügañ yo katrülyewe, hado cheme no lalo nünabame!”

⁹ Hado chemeje aña ñütchüw tchü lügyeladaw í holyeñe i seyo üdra ayo na mavenghuatsüdabi;

¹⁰ Seyo sünatchombo Jabdi í üsaw Yakub ñe Yohañ naksü je, dju Simon í shürhawma, mavenghuatsü dawñe Jisu i Simon í chetcho, “Djuñejodawe, ayogo ba nuna ná üshü tsülaño dawwe.”

¹¹ Sündawñe na lü ye hudza ge lakulye seyo sa a tralye ífum ífum kase.

Goño í güdraw daihuw

¹² I utro ñetrü ge dula sese, se süge goño yo tsafoahuw nuna a ye jiku, sünda i Jisu í hohulye uvro ye gakülyea, sündalye küñüñe che, “He Tawgyewwa ba dagyojoñe vyedameje nó ba muchoadügyefijoñe.”

¹³ I ügzü ye djüñe dadülye che, “Bá muchogüdraweñe, no vedame.” Sündawñe ichi se goño tsadaw ye señügudo ye kagüdrüatsü.

¹⁴ Sündawñe i í trudrüse, “Djusaje djutruwe, séso kañe babraw ba mügaw na shewe, seyo ba künda güdraw mucholawma se fo ye, se hadamje Musa i djüvyelyedama se í djüwe ifo gow trufijoñe.”

¹⁵ Séso íbo gow ñu süpyo tüga-zeñitsü, seyo süpyo nünapu ye ichi ge shi-ñu dzüjoñe seyo sonaw na dagyolajoñe ichi ye keñitsü.

¹⁶ Séso i nuna ñiw ge utroga kagañe küñüñgudru.

Jisu i külyi-ñüdjew naw í dagyo

¹⁷ Ahua ye ana a datcho, i shi-ñu trumkotchoi sese, Farisiñe dakyew kikyew na sa a gyoda, dju Galili seyo Yahudiya go küña ñetrü dulumas go na, seyo Yarusalem go jiku; sünda naw na dagyoiñe Tawgyew í gagra gokyew ye idra ye duse.

¹⁸ Seyo howe kagua na külyi-ñüdjew naw nuna a ye, ñelütsüdrü ge lalyi, seyo na í gütrü ge la jikuñe lamyoañe seyo Jisu ivro ye vyejoñe daahi.

¹⁹ Seyo na upu mutchusübyeñe ñelunge la majimyofiñe, na ñelütsü udru ge lyilyiñe seyo ñeltsü tahalye, í gütrü nadra ye Jisu uvro ge ulungko ye kikülyeaha.

²⁰ Jisu i na umsow lutuksüw vyedaw ye holyeñe che, “He nuna bá lalo ye muchoajemme.”

²¹ Sündawñe shizew-ñuzew nañe Farisi nañütrü cheñi, “He i djubajema, Tawgyew í mow uw zehi ye? Tawgyew í tralye dju lalo na muchoifiwa?”

²² Jisu i nalu ge vyedaw danghulye ná che, “Djo djolu ge ha vyemkoiya?”

²³ Hado vyedona? Ana chejoma, ‘Djo lalo ná muchoadama,’ semome ana ma ‘Gudzuñe seyo kutro djeg?’

²⁴ Séso ye ana dadá djo danghujo dawwe nuna üsaw í druguw-drulyiw ayo lalo muchoaifiwme.” I se külyi-ñüdjewa nado í che, “No ba chemkoi me, gudjuwe seyo bá gütrü ye lalye ba ñe ge la kabi.”

²⁵ I jeañe ütrü a gudzu, seyo hayo sa a í gudru dama se í lolalye, Tawgyew í troye í nudzoğ ñe ge kajebi.

²⁶ Sündawñe vyew na mavyenghuatsüñe Tawgyew í trotsü, sündalye şüpyo ğeñe che, “Yow ñi sama a ñu hohujemme.”

Matti í balaw

²⁷ Seyo sefum a i ñepsü ge jihua, seyo Leviñe ñidaw a ye patso-law nuna ye patso ñe ye ğyodaw hohu, sünda í che, “Nófum kasewe.”

²⁸ Sündawñe i vyew tratsülye ífum kase.

Lalo nadra tsasaw

²⁹ Sünada Levi i í ñe ge ava tsaw rhano a djü; seyo sünda se patso-law nañe seyo nuna utro a upua nañe üşa ğyoñe ava tsa, şüpyo upu dyam.

³⁰ Seyo Farisi nañe seyo shizew-ñuzew nañe í shürhaw ná ana cheñe zekütso-zemrhü “Djo patso-law seyo lalobraw nadra hado ğyoñe üşa tsa-tu daiya?”

Luhuşüw-lukrow ğyow ge Jisu i dzüw

³¹ Jisu i na chetcho, “Müga ñachi ge so manaw na majijome, séšo sonaw na jijome.

³² No nuna güdraw na mowme, lalo duw ná nadrü-nalu lagudoijoñe balaw kakuwme.”

³³ Seyo na í chetcho, “Yohañ í shürhaw na ye şüpyo uw yo matsa-matuw küğüñe ğyoiwa, seyo sünambó Farisi nachi go na je, séšo bá shürhaw na ye tsa-tuiwa.”

³⁴ Jisu i ná chetcho, “Hawa ba name gzü jiw nuna ná gzübraw ye nadra dulu sese, matsa-matudügyefijoma?”

³⁵ Séšo se ñeto je kakujome, sayo sa a gzübraw ye nayo utroga dajome, sese na se ñeto ge matsa-matuw dajome.”

³⁶ Ná i zeğaw a ze tru, “Dju nuna yo gye ükün ye tağañe dju matüpsüwme, semome ükün ye tağajobabi sedamje se tüpsüdaw ye je gye üme üdra makamyogijo.

³⁷ Seyo dju je tsühu ükün ye dzaği üme gye mapyujö, semome tsü ükün ye se dzaği üme yebó byoğalye kasuajo, seyo dzaği je mau lyajo.

³⁸ Séšo anggur uhu ükün ye dzaği ükün ge pyujö dume.

³⁹ Kagua nuna na tsühu üme ye tulye ükün ye matuğonjo, hado chemeje na truiji, üme ye ufomdodaşo cheñe.”

6

Jisu Sabbat go Tawgyew

¹ Sündalye ğyogow ñeto sehu i vi goşü dañe kamkoi sese, seyo í shürhaw na pu ye trükülyelalye, ügzüku yo shükrüñe tsa-tsa ka.

² Sese Farisi namko yo na hadamje chekülyetcho, “Djo süna chiğa hado dawwa hai ye ğyogow ñeto ge madafiwjoma?”

³ Jisu i ná trutcho, “Hawa djo he í mangüma, nugo Dawudñe üdra ayo na luhuşüda sese ha dawma?”

⁴ I kundañe Tawgyew ichi ñe ge jima, seyo lapsü djüdaw go odje na lañe tsa, se na bó müğaw ná tralye djusaje matsafijo, seyo idra yo naje djüdalubi?”

⁵ Sünda i ná chetcho, “Nuna üsaw ye ğyogow ñeto ge je Tawgyewbamme.”

Ğyogow ñeto ye sonaw ná dagyow

⁶ Sünda ana dañ ahua ye ğyogow ñeto kuw sese i ñegru ge jiñe shi-ñu trutchoñe da ğyo; seyo sa a nuna a duw ye ügzü fuvro go krosdzüada.

⁷ Shizew-ñuzewñe Farisi na í hadamje zeñe ñu jojoñe hoksü ğyo, i ğyogow ñeto ge dagyoahima madagyoima hojoñe.

⁸ Séso ibó nalu vyedaw dāhuñda; sündada i se ügzü kroadaw nūna í che, “Pūlyiñe, umko a gudzug.” I pūlyiñe gudzu.

⁹ Jisu i í chetcho, “No djo he dzüime gýogow ñeto ge ha dafijowa, uw dajo veima mo mau dajoma; shüw ná gaksüjoma mo mağaksüjoma?”

¹⁰ Seyo i vyew ná hozeğatsülye, se nūna í che, “Bagzü ye vro ge djüwe.” I süna da, sündawñe ügzü ye muchoañe uw lya.

¹¹ Séso se na ñepsü ge kuhuatcholye lusvyuñe nağütchü poğitcho, ñi he Jisu idra ha dañelye?

Shürhaw gū yo ksü

¹² Seyo se ñeto bó i pudru ge kügüw katrükralye, seyo akülya ñetow Tawgyew í kügü ñetoaha.

¹³ Ñetoahuwñe, i í shürhaw ná balalye namko ye gū yo ksü ye pola, sündalye ná shürhawñe che.

¹⁴ Sünda se na heimme; Simon í ñiñi ye i Patras ñe je vye; seyo í ñuw Andriyas, seyo Yakub, seyo Yohañ, seyo Fillipus, seyo Bertulme,

¹⁵ Seyo Matti, seyo Tomas, seyo Halfais í saw Yakub, seyo Simon dju í Jeletes je chewma,

¹⁶ Seyo Yakub í saw Yahuda, seyo Yahuda tcho Iskariyoti, se i í tsadrüahuw lyikülye.

Jisu i nūna ná truñe dagyow

¹⁷ Sündawñe na ídra kagalye no üpra a ye gudzutsü, sünda ichi shürhaw na upu mutchu, seyo vyew Yahudiya na, seyo Yarusalem, seyo Sor seyo Sidon go sütügülü üdza ge küña ñetrü ma sego şüpyo nūna upu na je,

¹⁸ Dju i shi-ñu truw í seyo gulo ná muchoañe dagyojoñe ichi ge jikutsüdama, süge dutsü. Seyo chigüje na maw da vyedaw na je uw dagyo.

¹⁹ Seyo vyew na í kidügyoñ vyetsü, hado cheme íso go gagra na kahuañe ná muchoahi.

Gağüze shi-ñu

²⁰ Sündawñe i í shürhaw nachi ge hoñe che,
“Şüvzüwme bá, ñeto daw ye,
Hado cheme Tawgyew ichi ñetrü ye bachime.”

²¹ “Şüvzüwme bá je, dju luhuşüdama,
Hado cheme gaksüjome,
Şüvzüwme bá, dju ksei ma;
Hado cheme tchüjome.”

²² “Şüvzüwme bá, dju nūna üsaw íbo
Bá mau dajome,
Seyo bá lahuajome, seyo bá tchügo-hoğojome,
Seyo bá ñiñi danghulye vyetsü djojome.

²³ “Sehu ñeto lüshüñe gyojo dawwe, hado cheme hojo dawwe, babó soğgo ge lapsü dume. Í bupye-ñipyen ñihow kew nadra je süna dawbamme.”

Dzüngawhuw shi-ñu

²⁴ “Séso tui me djo, dju bo-luko duma,
Hado cheme djo djolu vyew apyew pajebi.”

²⁵ “Tuime djó dju hesahe gaksüwdadama,
Hado cheme luhuşüjome.”

“Tuime djó, dju hesahe tchüima,
Hado cheme duhu pajome seyo ksejome.”

²⁶ “Tui me djó, nūna na djodruge uw chejome,

Hado cheme ná bupye-ñipye na mülaw ñihow nadra je ana dawbamme.”

Vyeñiw na je nülvowe

²⁷ “Sešo dzüvodo djó no chei me, bá vyeñido na nülvow dawwe; bá dju mau daiba sena uw dajo dawwe.

²⁸ Bá dju chemui ma, sená gağüzü djüjo dawwe; bá dju zeamei ma, senábo küğüjo dawwe.

²⁹ Dju bákrumo ge tcheima, ichi ge krumo a go je djüwe; seyo dju bachi güfaw lağaima, se í bá polu djulawe djuchewe.

³⁰ Dju damje bá prüima sená djüwe; seyo bachi gañ lağaimaje, í djuprüwe.

³¹ Seyo ba nuna ná bá küna dawene vyedama, baje ná süna dajo dawwe.

³² “Sešo ba bá nülvow dai ná akasa ba nülvow dame je, ba ha dew dawwa? Hado chemeje lalo dado na je, ná dju nülvow daima na je sená nülvow daşoi.

³³ Ba bá dju uw daihi ma sená akasa uw daijobame, bá ha dew chejowa? Hado chemeje lalo daw na je süna bó daşoi.

³⁴ Sešo ba í chi gudzumeje, nachi go patchojoñe vyemeje, bachi ha uwwa? Hado cheme lalo daw nağütchü je chi bó gudzuşoi.

³⁵ Sešo bá vyeñido nadra nülvow dawwe, seyo uw dawwe, seyo patchojoñe mavvew chi gudzujo dawwe; seyo babó dew lapsü lyijome; seyo ba Tawgyew í üsañe chejome, hado chemeje í se nabó dju maşüvzüdügyejome, dju kew nadru ge nülvoi me

³⁶ Baw küna nülvosüwma, sünambo ba je nülvojo dawwe.

Udru ge dju truchoawe

³⁷ “Külü dju jowe, sündame badru ge je külü majojome; trudañe djuchewe, badru ge je truda machejome; aloijoda, sündameje bá je alojome.

³⁸ Djüjo dawwe, sündame bá je djüjome: nuna na düsdzü-düsdzüñe seyo so-soñe seyo gusuañe badru ge suijome, hado cheme ha chi yo ba tsoima, se chi yo babó je seiyo tsojome.”

³⁹ Sündatcholye í ná zegaw a yo chetcho: “Hawa ñiğew ye, ñiğew í ğabo trufijoma? Hawa naksü noğu ge magaaajoma?

⁴⁰ Shürhaw na nudzoğ chi dadrüw na yo madewfojome, sešo djudamje dagro dama, í í chi dadrüw imbó vyeduojome.

⁴¹ Ba bá ñuw ichi iñi go gashüsaw shobosa í hado hoiya, seyo bá nudzoğ bañi go sholbosa duw ye maholama?

⁴² Seyo ba bá nudzoğ bañi go sholbosa mahomeje, ba bá ñuw ichi í künda chefijowa, ‘No ñuwwa, mola bañi go gashüdaw ye lahuajoma?’ He dakulyutchüwba, uvromashü bachi iñi go sholbosa lahuavzüwe, sündameje sese bachi üñuw ichi iñi go gashüdaw ye hohulye lahuahifijome.

Shoñ í hosüjo ye üje yo

⁴³ “Ha shoñ uw a je ñime, dju sheje ha madağiw jewma, seyo ha madağiw shoñ je ñime, dju shejo uw jewma.

⁴⁴ Shoñ küña duma, nudzoğ üje yo hosüwme; hado cheme nuna na gralye go lufuje mapyowme, seyo küfsüje go angur mapyofijome.

⁴⁵ Nuna uw na nudzoğ lu go ñu uw chehuahi; seyo nuna mau na nudzoğ lu go mau ñu na mau yo chehuajome; hado cheme lu ge ha gudama se í namdzu go kahujome.

Ñe daw nuna sama ksü yo duw

⁴⁶ “Ba nó ñu chew ná madzüjomeje, sünameje hado nó ‘He Tawgyewwa, he Tawgyewwa,’ cheiya?

⁴⁷ Dju damje nochi ge jikuima, seyo nó ñu í dzühulyeñe zew dzüima, no djo trujome, na dju vyeduwma?

⁴⁸ I se nuna i vyeduwme, dju ñe damkoi sese nogüdzü ye gyuw chigalye kunu ge ñekrü dzuñe, seyo hutchuño-ñolüñü ye idru yo da kaa, séño í madañifijome; hado chemeje i lyow yo dada.

⁴⁹ Séño dju dzhutcholyeñe zew madzüma, se i se nuna i dambo vyeduwme, dju nogüdzü ye ñekru lyow madaw dadama. Se udru ge hutchuño-ñolüñü kame, i sebyo-seño ngüañe seyo se i gaañe ganü-gañoaaha.”

7

Kulokyew ichi umsow vyedaw ye Jisu i vyelamoa

¹ I í ñu ná nuna na trumdzoalyeñe Kafarnahum ñetrü ge jiku.

² Sünda mükaw a ichi kulom djü í, í ñeñümbo veduw vewma, usso nañe dzüjo veduw lyada.

³ Jisu iñiñ hutraw-notraw dzühulyeñe Yahudi ñetrü go nugow na ütrü ge í kulo í jikuñe dagyoiwe cheñe ki.

⁴ Na Jisu ichi ge jikuñe ishitrü ge gaañe ana che, “Ba ibo he i daijo daw

⁵ Hado chemeje i ñi gñübye na nülvo daw, sünda ñi melye ñe ije i daihu.”

⁶ Jisu i nadra nadra hutro jisa, sünda i ñe yo aña üga ñibisa sa a, mükaw i üdraw na yo ana cheñe ki, “He Tawgyewwa, ba ñikuñisüw djudajodawe, hado chemeje nochi ge übadzü ñime, ba no ñelütsü pudaw ge jimyojo.

⁷ Sündada nudzo no bachi ge jikujo übadzü duñe mavemme, sé ba bá ñu i truñe no kulo usso dagyoiijodawe.

⁸ Noje nuna na üla yo nünabame; sünda shipashi na nogzü geme, sünda nuna a í ‘Kab’ chewñe se nuna ye kaw, sünda ütro a í ‘age kab’ chewñe i kaku; sünda no kulo na ‘He i da’ chewñe na se chiña i daag.”

⁹ He ñu í dzühulye Jisu i lumashüw vea, sünda i ufum ge nuna upu kalasalai nachi ge tcholtruñañe cheñ, “No djo he trungkoi heme, Israyel ge je no ana veksüw mapame.”

¹⁰ Sünda nuna kidaw na ñe kaku hobanda, kulo usso nadaw i dagyovodabi.

Dzüdo í shüdügye

¹¹ Me ñegi fum sa a i Nayan cheñe ñetrü a ge ji, ichi shürhaw nañe seyo nuna upu üdra jisa.

¹² I se ñetrü gow füta ütrü iñisa jiku, hojodawe, nuna na ñimo a í ñepsü ge la kahuangkoi; se ye üyan üsaw akasa ba, sünda i müjem: sünda ñetrü gow şüpo nuna aña üdra dusa.

¹³ Í hoñe Prabu üdrapra-ulupra na, sünda i cheñ, “Dju ksewe.”

¹⁴ Sündawñe i iñisa ge jikuñe ñimo vedaw i ki; sünda gidaw na gogog jebi, sündawñe i cheñ, “O muhumya, No ba chengkoime, paküleyejodawe.”

¹⁵ Sündawñe se dzüdaw ye pakülye gyo, sünda ütrü zekülye: sünda i í üyañ i djülye.

¹⁶ He yo vyew na gëatsü, sünda na Tawgyew ibo gow troñe ana che, “Ñimko a şüpo dyew ñihow truw a kakülyadame, sünda Tawgyew i í nülwöw í nuna na she.”

¹⁷ Sünda ibo gow ñu ye vyew Yahudiya seyo iñisa gow vyew ñetrü ge truzeñiatsü.

Yohañ Baptisma djüw í dzüw

¹⁸ Sünda Yohañ i í shürhaw na he ñu na trutsü.

¹⁹ Sündawñe Yohañ i í shürhaw nangko yo ksü i balalyeñe Prabu ichi ana dzüw ki, “Kakujo ye babamma, mo no utro na gyokrüjoma?”

²⁰ Na ichi ge jikuñe cheñ, “Yohañ baptisma djüw i ñi bachi ge ana a dzüw kidame, se ye kakujo ye babamma, mo no utro gyokrüjoma?”

²¹ Sa yo sa a i šüpo na usso naw yo seyo duhu yo lahuaida; sünda mütü kamyodaw seyo šüpo iñi ġiw na iñi djü.

²² Sünda i í che, “Djo ha ha hohuñe dzühudama, kañe Yohañ i trujo dawew; iñi ġyew hohungkoimme, üshi lyew kahingkoimme, ġoġo nadaw i dagüdrajemme, ufu vaw dzühungkoimme, sünda dzüdaw ye üshükülyejemme, sünda sapse na Tawgyew i shi-ñu trujeme.

²³ Tawgyew i šüvzüw djudra duma na ushi mahütrüjome.”

²⁴ Yohañ i kidaw nüna na kawñe, Jisu i Yohañ ubo gow nüna na ana tru, “Djo bye ge ha how jiña? Ha, ñedzülyiw yo age ngüa süge ngüa daw müsüġ i?

²⁵ Nameje djo ha how jibaña? Ha, nüna gye howsa shedaw í? Howe, dju gye-ġuvo uw sheima sünda ñe uw ge gyoima, na mahal ge ġyowwa.

²⁶ Nameje ha how jimdobaña? Ha, djuma a ñihow í? Am, no djo trungkoime, ñihow truw ije dyewfo.

²⁷ He ye sebamme, djubo ġidama: ‘Howe, no muko í bavro bavro kijome, dju bavro ge kañe ġabo gudow davojome.’ ”

²⁸ “No djo trungkoime, mim naluhu yow sadaw na, namko ye Yohañ i dyewfo djuje mome sé dju Tawgyew i ñe ge imisafo dama, i se ije dyewfo me i.”

²⁹ Sünda vyew nüna na seyo patso-lavow naje dzühuñe Yohañ ichi gow baptisma lañe Tawgyew i umso ve.

³⁰ Sé Farisi seyo shotuko-kunu davow na ichi baptisma malañe Tawgyew i ġabo shedaw i madzü.

³¹ “Sündada: no he shülsongkoi gow nüna na ha üdra tsojowa? Na ha veduda?

³² Na se angasa na veduw dju bajar ge ġyoñe naġütchü ġuksuġiñe ana cheġiw, ‘Ñi babo bzüva viw, se ba ñuksu je mada, sünda ñi duhu dawgeje ba kseje makse.’

³³ Hado chemeje Yohañ baptisma djüw i odje je matsaw kakülyada seyo tsü je matuw kakülyada, sé ba cheiye, usso ge mütü du.

³⁴ Nüna üsaw na tsa tuñe kakülyahume; se ba chewye, ‘Howe, tsaġotüw sünda tsü tujetchüw nüna nawa, patso-law üdraw seyo lalo gifuġuw nadraw.’

³⁵ Sé patsü-sholu ye nasaw nachi í umsoñe da veda.”

Simon Faresi ichi ñe ge lalobram í muchoahuw

³⁶ Sünda Farisi a ye í üdra ava tsasaweñe bakuda; sündawñe: i se Farisi i ñe ge jiñe ava tsajone ġyoha.

³⁷ Süge se ñetrü yo lalobram a ye, i Farisi i ñe ge ava tsaw jikuñe ġyoda che danghulye, kunulüzbü yo daw shüve a ge šowsa šow uhu lajikuda.

³⁸ Sünda üshi ütrü ge, fum gow gudzüñe kseñe üshi i üñiñü yo daġüñe sünda nudzo ükye gow ükyetrü yo dügüdra sünda üshi ge umdzu yo tsa tsañe, šowsa šow uhu yo šüi.

³⁹ He í holyeñe, se Farisi dju í baladama, üdrü-ulu ve vemche, “I ñihow truw nünan meje i danghujobi, dju i kingkoima, se ye djuma seyo küna mimma cheñe? Hado chemeje ibo lalobrambabi.”

⁴⁰ He í dzühulye Jisu i hutrolañe cheñ, “Simonña, no ba hadamje a chejome.”

⁴¹ “Bo djüw a ichi gudzuvaw ksü duw, a ye lumu yo bosüñ fo pom, seyo utro a ichi ge lumu yo bosüñ pomġü duw.

⁴² Ichi ge domġütchojo ñiahuñe, sündawñe i naksü maksü i ujobammeñe traaha. Sünda: naksümko a dju í nülvo fo vejowa?”

⁴³ Simon i cheñ, “no vew ge, i djü añe traafodama.” I í cheñ, “Ba uw vebadamme.”

⁴⁴ Sündá se mim ichi ge tcholtrüñe i Simon i che, “Ba he mim i homa? No ba ñe ge jikuwbi sé ba nó üshi chejo hu je madjü, se i noshi i iñisü yo dagzüida, seyo i nudzo ükyetrü yo dügüdraida.”

⁴⁵ Ba no umdzo yo bubu matsa, se no jikuw yo i noshi i umdzo yo bubu madamdu.

⁴⁶ Ba no kye ge tel je maşüi; se i noshi ge şowsa şow uhu şüida.

⁴⁷ “Sündada no ba chengkoime; i lalo şüpo duw ye, muchoihumme, hado chemeje i şüpo nülvo dada; sé djuchi mesame muchodama, i nülwov je mesame dawba.”

⁴⁸ Sündá i mim í che, “Ba lalo muchoajemme.”

⁴⁹ Sündawñe üdra a ava tsaw gýosadaw na, nadrü-nalu ve vetsü, “He lalo na muchoihu ye djubajema?”

⁵⁰ Se i mim i che, “Ba kügüw ye ba gaksüi damme, lüshüw yo kajodabe.”

8

Jisu ichi shürhaw na

¹ Se yo na ñetrü ñetrü shi-ñu tru ka, seyo Tawgyew í ñe gow shi-ñu na truñe kahi, sündá i nadra shürhaw gû yo ksü duse,

² seyo mim üchea naje djuso gow mütü na lahuañe so naw na dagyodama, se iñiñ ye Mariyam Magdalini chewme, djuso gow mütü mro kahuadama.

³ Seyo Herodes i hokrúvov Kuja ufum Yoanañe Susana seyo şüpo mim na í ná gañ-miği yo na kulom na hotunovow.

Iği truw ichi zeraw

⁴ Nüna upu jikyeğatsüwñe, seyo ñetrü ñetrü gow na je ütrü ge jikutsüwñe, i zeğaw tru:

⁵ “Üsü traw nüna a ye üsaw traw jihua: trangkoi ye üsü üchea ye gábokutru ge gaa, sündá dügrüprag, seyo ñedzü gow musu na pilag.

⁶ Seyo üche ye kunuka udru ge gaa, sündá shükülye, séşo hu gzüw mapawtro graha.

⁷ Üchea ye tsü namko ge gaa, sündá tsü na üşa üşa shüsañe i shümüla.

⁸ Seyo üchea na no uw ge gaada, sündá shülyilyeñe sheje fuğua dzaw djüda.” Ana chefialyeñe i gow yo ñu che, “Djuchi ge dzüjo ufu duma dzüsawe.”

Zeğaw yo trudrüw

⁹ I shürhaw na i dzü, “He zeğaw ichi hawa?”

¹⁰ I cheñ, “Djo Tawgyew i ñe go ñu na dzüsüdügýewbi, se utro na zeğaw go tru-jome, hado chemeje na hohuñe mahohujome, seyo dzühuñe je madzüsüjome.”

¹¹ “Zeğaw í chemeje ana me: üsü ye Tawgyew í ñume.”

¹² Gábo üdza ge gýodaw na dju dzühudama; sündawñe mütü na jikuñe nadrü-nalu gow Tawgyew í ñu i lañe katrükralye, hado cheme ana malyajoşoma na Tawgyew i küğüñe na gaksüw pajo.

¹³ Kunnu udru ge duw na, dzüñe lüshüw yo shi-ñu bo laşoi, séşo ükrü ñiw tro ye na umso mesame kuw ve, sündá muchow ge gaaha.

¹⁴ Dju kusu ge gamyoadama, se na, dju dzüi na, sé vro ge kañe vesumow seyo bo-luko seyo shüng-dongkoi ge duhu ge gamyojome, sündá na sheje mañujo.

¹⁵ Sé no uw gow na he me, dju shi-ñu lu-drü lümyew yo dzüñe veima, na se yo sheje lakufijome.

Mitrü yo zeğaw

¹⁶ “Djuje müsaw tchüholyeñe boğtom yo pelye mavejo, seyo buğo ufum ge mavejo, sé mütchü ubo ge vejo, hado chemeje nüna jikudaw na müsaw pajo.

¹⁷ Haje mamüşüme, ha ye matruhoajoma; seyo haje trumsüw ñime, se ye madanghujome sünda müsaw mapajoma.

¹⁸ Sündada gûdzüw gýowe, ba ha vego dzüngkoima? Hado chemeje djuchi ge dumañe vedama, i djüpyojolume; seyo djuchi ge ñima, ichi gow se ije lağajome, ha ye ichi nudzoğchiñe vedama.”

Jisu ichi ñeşügmüsaw

¹⁹ Ūyaññe uñuw naksü ütrü ge jiku, sé nuna aña duw tro sa í matüvafilye.

²⁰ Sünda í tru, “Baññe bañuw naksü ba tüvajoñe ñepsü ge gudzudame.”

²¹ I í ñu i hutrolañe che, “No añañe no ñuw he bamme, dju Tawgyew i shi-ñu dzüñe seyo umso vewma.”

Şüw-lyiw law kaw í dağüdzüahuw

²² Sesüyo ahua ye i seyo i şürhaw na lü ge gyolyi, sünda i ná cheñ, “Age djebya, hu dügepsü ge jibo.”

²³ Sündawñe: na lü í shaa.

²⁴ Sündawñe na jiñe í dapüñe, sünda cheñ, “Tawgyewa! Tawgyewa! Ñi mauwfimauw lyangkoimme. Sündawñe i pakülyeñe ñedzü şüw-lyiw seyo hu i lashüraw i miği sündawñe na damudoañe gûdzüw lyaha.”

²⁵ Sünda i na che, “djo küğüi ye hanga?” Se na geaglye seyo mavenghuañe nağütchü cheği, “He djubajema, ñedzü şüw-lyiw seyo hu naje dügyeiye, sünda na i chew dzütsü.”

Ġuló mauw na lahuahuw

²⁶ Sünda Giraseni na ñetrü ge jiku se ye süge pseğ ge Galili hu ütrü iñisa ge.

²⁷ I hudza ge jikuwñe, se ñetrü go nuna a í tüva, djuso ge mütü kamyodama. Seyo şüpo üğaluw gomdo gye-ğuvo je mashew seyo ñe ge je mağyow nuğu ge aka gýow.

²⁸ I Jisu i hoñe şogzu, sünda uvro toi gaañe gow yo ñu che, “He Toğgroyama Tawgyew üsaw Jisu! No badra ha dajo duwa? No ba chengkoime, no ñiku-ñisüw djudjüjodawe.”

²⁹ Hado chemeje i mütü í se nuna usso go kahuawe cheñe dügyengkoi, sündada i üdra gow lyanggudrulai. Sünda nuna na í sülyeñtchü seyo sülyebu yo vogo vew, sedamje i se sü na gokyoaha, sünda mütü ye i sümbye ge sagañgudrudügye.

³⁰ Jisu i í dzü, “Bañiñ hawa?” I cheñ, “Upu,” hado chemeje şüpo uğulo na usso ge kamyolyedabi.

³¹ Sünda i í cheñ, “No noğu ge djukadügyejowe.”

³² Süge puge vo upulo dyew a tsamroñe gýoda, sünda: i í cheñ, “No nalung ge kamyodügyewe.” Sünda: i í kamyodügye.

³³ Sündawñe se uğulo ge nuna usso go kahuañe vo usso ge kamyoad sünda se vo upulo ye go ge gúañe husu ge gamyoñe gamüla dzüag.

³⁴ Fugulu gýokrüw na se dagjew i holyeñe ge djeshükralyetsü, sünda ñetrü ñetrü ge kañe he ñu i trutsüküğa.

³⁵ Sünda nuna na se dajew i how jihuatsü, sünda Jisu ichi ge jikuñe dju nuna usso go uğulo mauw lahuadama se ye Jisu ishitrü ge gye sheñe gýodaw i hohuñe geag.

³⁶ Sünda hohusadaw nuna na ná tru, se uğulo mauw ye nuna i ñiku-ñisüw da vedaw í kündañe uw dagyodama.

³⁷ Sündawñe Giraseni ñetrü uñisa gow nuna na Jisu i cheñ, ñichi ayo kahuajodabe; hado chemeje na gemğekyoatsüdabi. Sünda: na lü ge gyolaye katrükralye.

³⁸ Djuso gow uḡulo mauw lahuadama se nūna ye í che, no badra ḡyokyejodawe, séšo Jisu i kadügyelye cheñ.

³⁹ “Bañe ge kañe nūna na truwe, Tawgyew i kúndañe babo añña šüw-lyiw chiḡa dadama.” I kañe vyew ñetrü ge trüzeḡiatsüḡ, Jisu i nobo kúña šüw-lyiw chiḡa dadama.

Sonaw mim seyo dzüdaw mimsa naksü dashütcho

⁴⁰ Jisu i Galili ñetrü go kalai sa a, nūna na lüshüw yo i tüva; hado chemeje na í ḡyokrüñe ḡyow.

⁴¹ Sündañe howe, Yayir cheñe nūna a iñiñ dju ñegru go dyewma, i jikuñe Jisu ishitrü ge gaañe cheñ, “Noñe ge jisawe.”

⁴² Hado chemeje ichi oje ḡüyo ksü yo üsam akasa a duw ye dzüasalaibi. I jingkoí ge nūna ishitrü ge gaatsü.

⁴³ Sünda mim a dju oje ḡüyo ksügomdo šü lu ḡyowma sünda dju nudzo shüw-duw na so naw dagyow nadru ge tratsüdabi sedamje djugzü gow je i madagyofibi,

⁴⁴ fum gow jiñe i gye üdza ge kig sündawñe sešüḡdo a i šü luw ye lumudoag.

⁴⁵ Se yo a Jisu i cheñ, “No dju kidüḡña?” Vyow na makitsüñe chetsüwñe, Patras seyo üdra ayo dusaw na cheñ, “He Tawgyewwa, bá he nūna fupulodaw na düñe badru ge gaiwa.”

⁴⁶ Séšo Jisu i cheñ, “Djudamje a no kidawa hado chemeje no danghudabi nochi gow mu kahuajewwa.”

⁴⁷ Mim ye holyeñe no mamušufijobañe vewñe, usso somsokyo jikülye, sünda ishitrü ge gaañe vyew nūna navro se trukülye, i hado kima, sünda kúndañe mekutcho dagyogdama.

⁴⁸ I í cheñ, “Nosamya ba küḡüw ye ba dagyodašoñe, lüshüw yo kajodawe.”

⁴⁹ I trungkoibalubi ye, ñegru go müḡaw i nūna a jekuñe che, “Basam dzüdamme: müḡaw i duhu djujüwe.”

⁵⁰ Jisu i dzühuñe cheñ, “Djuḡejodawe; küḡüjodabuwe; i basüjošome.”

⁵¹ Ñe ge jikuñe i üdra ye Patras, Yohañ, Yakub seyo mimsa üyow-üyañ na tralyeñe djuje ütrü üñisa ge majidüḡgyew da.

⁵² Sünda vyew na ubo kse-ñiḡitsü, séšo i cheñ, “Djuksejodawe; I madzüme, i drumubadame.”

⁵³ Nūna na i dzüdabi che danghuñe, i chedaw i dzüñe tchüḡ.

⁵⁴ Sé i ügzü í kigolañe ḡuksuñe che, “He akoa pakülyebi.”

⁵⁵ Sündawñe ḡulo üshükülyeñe pakülyeg; sünda i na dügye í tsajo hadamje djüwe che.

⁵⁶ Üyawñe üyañ naksü mavenghutsüḡ, sé i ná cheñ, he ha dajema se i djuje djutruwe.

9

Shürhaw ḡüyo ksü ná jidügyew

¹ Sündatcholye i na ḡüyo ksü shürhaw na balañe ná ḡuló mauw seyo so naw na dagyow dajo gow bó vye.

² Sünda ná Tawgyew i ñe go shi-ñu uw truww, seyo so naw na dagyowe cheñe ki.

³ Sünda i ná che, “Jiw ge haje djulawe: shobo je djulawe, kapüḡa je, odje je, bo je seyo polu ksü ksü djulawe.

⁴ Seyo dju ñe yedamje ba ḡyogoima, se a ḡyojodawe; sünda se yo kahuaodawe.

⁵ Dju bala maḡokyema se ñetrü yo kahuañe ishigo ñelümo na pafiajodawe, hado chemeje nadru ge na je truksüfijo.”

⁶ Sündä: na jihuañe ñetrü, ñetrü shi-ñu uw tru kaahi, seyo nüna ná djuje djuje dagyoñe kaahi.

Herodas í velamow

⁷ Seyo ñetrü go psügi fum yo nugo Herodes i he í dzühulyeñe mavenghuag, hado chemeje küña nüna na trudabya, Se i Yohañ dzüdo go üshükülyetchoda cheñe.

⁸ Sündä küña nüna na he i, se Eliya i hohuda: utro na ana je chetcho, ahugo ñihow truw mügaw namko yo djuma üshükülyetchoda.

⁹ Seño Herodes i che, “Yohañ ükye bo no poskeadügyembi, he ye djutchoa, djufo go ana ñu dzühumkotchoiya?” Sündä i í hoñoñikülye.

Nüna hadza pom ná gyew

¹⁰ Sündä í shürhaw na kakuñe na ha ha dalyedama ná í truatsü. Sündä i ná utro ge lagañe, Betseda cheñe ñetrü a ge lañe kakye.

¹¹ He i danghulyeñe nüna na ufum fupuloatsü, sündä í ná lüshüw yo tüvatsü, seyo ná i Tawgyew i Nogofo shi-ñu trukye, sündä djú dagyodügyeñoñdama, ná dagyo.

¹² Ñeto kapsealaibi a, se í shürhaw güyo ksü jikuñe che, “Upu na kadügyejodabe, kañe na ñetrü ge ná gyoyo seyo tsajo bühohidame, hado chemeje ñi güdzüw ñetrü ge dume.”

¹³ I ná che, “Djo ná tsajo djübalabya.” Na cheñ, “Ñichi ge odje pom seyo tchükro ksü yo haje ñime; sé ñi jihuañe vyow nabo tsaw-tuw prülameje, se ye dujome.”

¹⁴ (Hado chemeje sa yo sa a muhu fo pom kuw du.) Sündä i í shürhaw na che, “Ná pom gü, pom gü dañe gyodügyewe.”

¹⁵ Na süna dabadába, seyo vyow ná gyodügye.

¹⁶ Sese Tawgyew i ülgü odje pom seyo tchükrosa ksü í la, seyo ñedzüdru ge hotroñe na gağüzü djü, sündä tchekuği, tchekuğiñe í shürhaw na djü nüna na hawe cheñe.

¹⁷ Sündä: vyow na tsalyeñe tsaşelatsüdabi, seyo godza daw yo mo gü yo ksü guw trügula.

Patras i Jisu í Tawgyewñe vyew

¹⁸ Se i akasa güdzüw ge kagañe kügümkoï sese, seyo idra ye ichi shürhaw na idra dusa, sündawñe i ná dzü, “Nüna na nó ha cheiya?”

¹⁹ Na che, “Yohañ baptisma dju ye, seyo kagua na mügaw Eliya, seyo kagua na chew ye ahugo ñihow truw mügaw nangko yo a üshükülye da.”

²⁰ I ná dzü, “Seño djo nó ha cheiya?” Patras i che, “Tawgyew i üsaw Masi.”

²¹ Sündawñe Jisu ná züpsügeñe che, “He ana djúje djuchewe.”

Jisu i í nudzo dzüjo í ñihow tru

²² Sündä i che, “Nüna üsaw í duhu paketrjobamme, seyo dasüñejome seyo kew mügaw na seyo mügaw sawlyiw seyo shizew-ñuzew na í hosügew vyeñe shijobamme, sündä i ñegi dzü ye üshükülyetchojome.”

Jisu ufum kasaw ye

²³ I vyow ná che, “djuma no fum kasajo vedama, nudzoğ yo makasajoñe trawe seyo shüwa nudzo shokru i gilañe no fum kasajodawe.

²⁴ Hado chemeje dju yo nudzoğ shüw ye fupojome vedama na shokru í moajome, sé djudamje nobo nudzoğ uluvyu takyoima se iyo í fupojome.

²⁵ Nüna na vyow druguw-drulyiw í patsülameje, seyo nudzoğ uluvyu ye takyoame, semome ñiku-ñisüw pa, se yo ha palajowa?

²⁶ Djudamje no yo seyo no ñu yo ñimtchũñjema; nūna üsaw ye je ichi seyo i awu ichi sünda güdraw sorgomuko ichi lüshüw pawñe, ije ñimtchũñjome.

²⁷ No djo umso trungkoime, dju ayo ha a gudzudama, namko he a üchea na ana dame Tawgyew i ñetrü mahohumdoluye, na dzüw ye künama madanghujome.”

Musa ñe Iliya naksüdra Jisu

²⁸ He ñu na chelye ñegi şügzü fum sa a Patras, Yohañ seyo Yakub na üdra kügüw pu a ge lañe jike.

²⁹ I kügüngkolui ye, ukrumro utro a lya, seyo i gye ye grobülaşüksüñe lüna-lünakülye.

³⁰ Sese, muhu ksü se ye Musa ñe Eliya naksü üdra ñu chitrungkoi.

³¹ Na ğulo güdrawdra hohu, sünda i dzüjo go ñu poĝi, se ye Yarusalem ge dajo.

³² Patras ñe üdraw na drumuĝoñatsüdabi, sünda na pakülyewñe, i ğulo güdraw; seyo se nūna ksü ye dju üdra gudzüsadama, hohu.

³³ Na ichi yo kajoñe dawñe, Patras i Jisu í che, “He übrawwa, ñi ha a ğyow ye uwme: sünda: ñi lañe ulüğü dzü dajome, a ye babo, a ye Musa ibo, seyo a ye Eliya ibo.” I madanghu, i ha chengkoima.

³⁴ I ana chengkobaiye, ná mumu yo boshiĝiag, ná mumu yo bolyangkoi ye na ĝeatsüg.

³⁵ Sünda se mumu yo ana ñu a zekülye, “He ye nosaw seyo no i golawme, i chew dzüwe.”

³⁶ He ñu i dzühungkoi ge, Jisu i akasa hohuda; sünda i mazüda ĝyoda, sünda ha hohudama, se ñu í se ñeto ge djuje malakülye.

Muhusa í ğulo mauw yo lahua

³⁷ Seyo se draha na pu goşü kagaahuñe, upu dyew a í jiñe tüva.

³⁸ Sündawñe, upumko yo nūna a ye şogzuñe che, “He dadrüwa, no ba chengkoime, nosaw i nülwov hoijodawe; hado chemeje i nosaw akasame.

³⁹ Sünda howe, ğulo mauw a usso ge kamyo, sünda i ülya akaye şogzukülyeg; seyo i se í ana ĝüşhülyiĝiada, se i üga ge üzetcho fegukülye; seyo í ana damgzüw yo ñiku-ñisüw da tra.

⁴⁰ Seyo no bachi şürhaw ná che, í lahuawe; séşo na malahuafi.”

⁴¹ Jisu i che, “He maküğü seyo bolu datchüw şürhaw nawa, no djodra küña kuw ĝyofisajowa, seyo djó daw na vejowa? I muhu i cheñ, basaw i age la jekuha.”

⁴² I jimkolai ye ğulo mauw ye í lola padubug, sé Jisu i ñişgzüñ ğulo í miĝiñe seyo muhusa í uw dagyoñe uyow ügzü ge djü.

⁴³ Sündawñe vyow na Tawgyew i gow yo mavenghutsü. Sé vyow na í ha ha chiĝa dadama se na trongkoiye, sese i í şürhaw na che.

⁴⁴ “He ñu ye djo djofu ge vejodawe, hado chemeje nūna üsaw í nūna nagzü ye kigo ladügyejome.”

⁴⁵ Sé na he ñu i madzüsü; se i í madanghdügye; seyo na he ñu ífo go idra dzüjoje ĝetcho.

Vyow namko yo dyewfo djuwa?

⁴⁶ Sünda şürhaw naĝütchü ge ñu a kakülye, se i ye nangko a dju dyewfoma?

⁴⁷ Seşo Jisu i nalu ge vedaw í danghula, sünda muhumsasa a í lañe idra a gudzüdügye,

⁴⁸ Sünda i che, “Dju damje noñiñi yo he muhusa i hutroima, se i nó hutrolawme; seyo dju nó hutroima, se na nó kidaw na je hutrolawbamme, hado chemeje djomko yo imisa yo imisafodama, se ye dyewfobamme.”

Dju maveñisama, na udrašome

⁴⁹ Sündawñe Yohañ i che, “He übrawwa, ñí nuna a ye bañiñi lañe ġulo mauw í lahuahuw hohudame, sündada ñi í gohame, hado chemeje i ñidra ñisañe bafum makasa.”

⁵⁰ Jisu i ná che, “Í djugohajo dawew; hado chemeje dju djo mauw madama, na djodra dujome.”

Jerusalem ge jiw

⁵¹ Se í sorgo ge lalyimdrü ñeto kakusalaibi sese, sündawñe i Yarusalem ge jijoñe vye.

⁵² Seyo i ivro ge mukow ki: i Samariya na ñetrü a ge ji, ibó ġyojo dashütrüivojoñe.

⁵³ Sé na i magyogadügye, hado chemeje i Yarusalem ge jingkoida.

⁵⁴ Se i hoñe í shürhaw Yakub ñe Yohañ naksü che, “He Tawgyewwa; ba ha tsüda, se i ñi dügye, se i ñedzü go mi gaañe ná damyaweñe ma?”

⁵⁵ Séso i tcholtruġiañe na ze, [Seyo che “Ba madanghuwa ba ha uġulo yo ma. Hado chemeje nuna üsaw ye nuna nachi luvyu ye damütrajoñe madaw se í ġaksüjoñe kakuwme.”]

⁵⁶ Sündalye iñe i shürhaw na ñetrü utro ge jitrükralye.

Jisu ufum kasaw chemeje

⁵⁷ Se i ġabo jimkoi ge, se djuma a ye í che, “Ba hange hange jiyima, no bafum kasajome.”

⁵⁸ Jisu i í che, “Şelü ichi uksu seyo ñedzü go musu nachi üdrü duwme, sé nuna üsaw ichi ükye vejo je ñe ñime.”

⁵⁹ I utro nuna a i che, “Nofum jisawe.” I che, “He Tawgyewwa, nó uvromashü kadügyevzüwe, no awu í ġuavzüjome.”

⁶⁰ I í che, “Dzüdaw na ná nudzoġ dzüw í büġudame, sé ba jiñe Tawgyew ichi ñetrü go shi-ñu trujodawe.”

⁶¹ Utro a ye je che, “He Tawgyewwa, no bafum kasajome; sé uvromashü nó kadügyevzüwe no nochi ñe go nuna na yo mülüñ kajoñe.”

⁶² Jisu i í che, “Djudamje nudzo ügzü i luksungkuġu ge kiñe fum ge homeje, i Tawgyew i ñetrü ge ġyofiwjome.”

10*Shüraw mroġü ná kiw*

¹ Seyo he ñu nafum sa a Tawgyew i nuna mroġü lapyo, sünda ha ha ñetrü ge i jijoma, süge ksü, ksü dañe ivro kibraġitsü.

² Sünda i ná che, “Rhamu kiw aña dume; séso chiġa daw mesame duba sündada vi übraw i küġüwe chejodawe, se i í nudzoġ vi í tcholajo vi nuna kiwe.”

³ Jiwe; howe no djó fugulu vyeduw dañe fumsu namko ge kijome.

⁴ Sündada dzulngasaje djulawe, kapüġa je, seyo shita je; sünda ġabo ge je nuna ná dju je gaga djudawe.

⁵ “Dju ñe ge jihima, uvromashü chevzüwe, ‘He ñe ge ġüdzüw djuwe chewe.’ ”

⁶ Süge djuma ġüdzüw pafiwjo dumeje, ba ġüdzüw djüdaw ye üdra dusajome, momeje bachi ge kakutchojome.

⁷ Se ñe ge ġyowe, sünda ichi go ha paima, se í tsa-tuwe, hado chemeje chiġa daw nuna na ná shishü patsüw; ñetro-ñetro djukahijodawe.

⁸ Seyo ha ñetrü ge jiyima, sügow nuna na hutrovowñe, se bavro a ha vedama se i tsajodabuwe.

⁹ “Sügow sonaw ná dagyojodawe: sünda ná chewe, ‘Tawgyew í ñetrü ye batrü iñiñisa ge kakudamme.’ ”

¹⁰ Sé ba ha ñetrü ge jimyoima, seyo sügo nüna na bá mahutrovolaime, ná bodzağ ge jeñe ana chewe,

¹¹ “Djo ñetrü yo ñelümo naje, ñishi ge güdrüsadow na, ñi djovro a pafi-amkoimme, sedamje he í danghujodawe, Tawgyew i ñetrü djotrü iñiñsa ge kakulaimme.”

¹² No djo trungkoime, se niyay ñeto se ñetrü ye Sodom ñetrü i je mofokaw gijo lyajome.”

Üdrü-ulu mavvegudow ná tui

¹³ “Tui Kurajiña! Tui Betseda! Dju dyew chiğa dafiw ye djo ge dadama, sese í Sor ñetrüñe sidon ñetrü ge dameje, na ke ge gye güpañe seyo kütsesüpu ge gyoñe na kye ge dru-lu vyegudoñjemma.

¹⁴ Sešo, melye gzuñe cheğiye sehu bafo vyego yo yeje Sor ñe Sidon naksü vyego ye vyeksufofijome.

¹⁵ Seyo Kafarnahum ñetrü, hawa ba soğgo kuw lüvzüw dalyijoma? Ba bó noğu üla ge kuw üla kaajome.”

¹⁶ “Dju ba chew dzüima, se i no chew dzüjo, sünda ba dju mauw daima, noje i mauw dajome; seyo dju no mauw daima, se ye no kiadow i je mauw dajome.”

Shürhaw mroğü na kakuw

¹⁷ Se shürhaw mroğü yo ksü na lüshüw yo kakutchoñe che, “He Tawgyewwa, ba üñiñi yo se gúló mauw na je ñichi pudu-puña ulunge pumódame.”

¹⁸ I ná che, “No mütü í ñedzü lüğaw veduw ñedzü go gaahu hohuime.”

¹⁹ No djó byu na seyo mütü güdzü na dügrüdzagofijo djüwme, seyo vyeñi nachi go vyew mau dafiwo ná madafijo pudu-puña djüwme; seyo ha gañ yo je djo naw madafijomme.

²⁰ Sé sünašo cheñe djulüshüwe, se gulo mauw na djo pudu-puña yo pumoda cheñe, sešo djo lüshüjo dawwe se djo ñiñi Ñedzü ge gi vyedotro yo.

Üsaw udru yo uyow í duw

²¹ Sa yo sa a i gulo güdraw yo dañe lüshüdzoalye, seyo che “He Awa, Ñedzü ñe No i Tawgyewwa, no ba ulu yo uw cheime, se ba he ñu na danghu-kinghuw nüna seyo vyesü-vyelüw na yo müşüñe veda, sünda angasa natrü ge duda. Am, he Tawgyewa, hado chemeje bá he í uw veda.

²² No awu i nó vyow nodru ge traadamme; seyo djuje madanghu se saw ye djujema, awu aka danghuba seyo awu djujema se je dju madanghu, se i ye sawchi gemdo aka seyo se djudru ge saw i dujoñe vyedama.”

²³ Seyo í shürhaw nachi ge tchoñe akasa ge che, “Süvzüwme se iñi ye, se he ñu ná se ba hoiwa hoiye,

²⁴ Hado chemeje no djo chemkoime, şüpo ñihow truw na seyo ñubyu na tsüdaw ye, se ba ha ñu ye hoima howe; sé maño seyo ha ñu ye ba dzüima dzüwe, sé madzühu.”

Samri nüna uw a i zeğaw

²⁵ Sündawñe nüna a gudzülyi; sünda ana cheñe í küna daima hopüñew che, “He shotuko-kunu go dadrüwa, şüwa şüw şüjo ibo ha dameje ujowa?”

²⁶ I í che, “Shotuko-kunu ge ha gida? Ba künda ngüña?”

²⁷ I trutcho, “Ba Tabraw bá nudzoğ Tawgyewchi go vyew nudzoğ drü-lu seyo nudzoğ krâşe seyo nudzoğ budzu vyew se nadra nülwov vyejodawe; seyo nudzoğ gáfopsüği-gampsüği go ná nülvojo dawwe.”

²⁸ I í che, “Ba umso chedaba, he ana dabya sündame üshü gyojome.”

²⁹ Sé i í nudzo í usu dajoñe veñe Jisu í dzü, “Nameje nochi gáfopsüği-gampsüği na djuwa?”

³⁰ Jisu i che, “Nüna a ye Yarusalem yo Jeriko ge jinkoi ye ñigudu tsaġaw na djeshiġiaña i gye í na shalügülag, sünda gü-shü dañe atrü dzüw datralye katrükralye.

³¹ Sünda ana da, se ġabo ge mġgaw a kamkoi, séšo í holye ġeaglyeñe djetrükralye.

³² Ana vedumbo Lewi a ye je sešü katcho, ije í holyeñe ġeaglye djetrükralyetcho.

³³ Séšo djudamje Samari ñetrü a go sa a kakükülye, sünda í hohulyeñe nülvo vyela.

³⁴ Sünda itrüġañ ge jikuñe seyo ichi üshi ge luvuhu seyo tsühu prüñe gyeche-gyelye yo pyogo, seyo í güġedru ge gyodügyelyeñe ñe ġyow ge lajiky e sünda í uwyo hoivo.

³⁵ Se draha í lumu yo bosüñ ksü lahuañe se ñebraw i djüñe che, ‘I uwyo hoivojodawe, seyo bachi go küña kapyoima, se ye no kakuwñe doajome.’ ”

³⁶ Hesahelu he ba vyew ge se na ñigudu-tsaġaw süna ge lyalahado, nadzüngko a dju ichi ġafopsüġi ġampsüġi go na ñe veiya,?

³⁷ I che, “Se i dju í nülvodama.” Jisu i í che, “Kai, baje kañe süná dajodawe.”

Marta ñe Mariyam

³⁸ Sündatcholye Jisuñe i shürhaw na jimkoitchoi ye, se i ñetrü a ge ji, seyo Marta cheñe mim a ye í iñe ge balada.

³⁹ Seyo Mariam cheñe uñum a duw, i Tawgyew ishitrü ge ġyoñe i shi-ñu dzüw.

⁴⁰ Sé Marta chiġa da dañe mavenghua sünda itrü iñisa ge jikuñe che, “He Tawgyewwa, ba haje mavema, noñum í no akasa chiġa dawene traadaw ye? Sündada í chetcho, nó datunowe.”

⁴¹ Tawgyew i í trutcho, “Marta O Marta; ba šüpyo ñu ha vejema venglyeñe seyo mavenghu lyaha.”

⁴² “Séšo ñu a ye umsone, seyo se chiġa uw í Mariam i golame; se i ichi go malaġafijomme.”

11

Tawgyew Küġüw í dadrüw

¹ Sündatcholye ahua ye i nolu a ye küġüngkoi. Seyo i se küġüfiahuwñe, ichi shürhaw namko yo a ye í che, “He Tawgyewwa, Yohañ i í shürhaw ná küna veduw küġüdrüdama baje ñi süna veduw küġüdrüwe.”

² I í che, “kye damje djo küġümkoime, sese chejodawe: ‘He Awa, Bañiñ güdraw vejome, ba ġadzü kakülyawe.’ ”

³ “ ‘Ñichi muhu muhu yo tsajo-tujo í ñi djüijodawe.’ ”

⁴ ‘Seyo ñi lalo na muchoaijo daw e, Hado chemeje ñi je, ñi mauw dado na muchoaijome, Sünda ñi mauw uw dajo yo ġaksüiwe.’ ”

Prünggudruwe

⁵ Sünda Jisu i ná che, “Djumko ye üdraw a duw ye djuwa, sünda i ñegimko ge pakülyeñe ichi ge ji í chewe, ‘He drawwa; nó odje üka dzü djüwe.’ ”

⁶ Hado chemeje, kasew-bišew go draw a ye nochi ge jikuda, sünda ivro ge vejio nochi ge haje ñime.’ ”

⁷ Sünda i ulung gošü ñu tru, se nó afafsüw djudjüwe; yabó ñegüdrüšü je dugoadammje, sünda nosa ye nodra buġo ge ġüsadame, sündada no bá pakülyeñe haje madjüfijomme.

⁸ No ba trungkoime, se üdraw duñ sese je í pakülyeñe haje madjüfisabamme, sedamje i ñimtchüñ ye tralye prüdo ye í küña tsüdama süña pakülyeñe djüjošo.

⁹ Sünda no djó cheime; prümeje, djo djüjome; tchümeje djo pajome; dümeje, djobo voaijome.

¹⁰ Hado chemeje dju prüima, ná pajome; sünda dju tchüima, na pajome; seyo dju düima, nabo voaijome.

¹¹ Djomko ye dju ana awu duwa, se üsaw ye odje prüme, se í kunnu djü, seyo sündalye tchü prümeje, se tchü madjüw byu djü?

¹² Semome jeje prülaime, se í mütü güdzü djü?

¹³ Sünda, ba maulyeñe je basa ná gañ uw djüjo danghumeje, se djo ñedzü go Awu, i ichi nudzoğ nüna prüi ná hado ġulo güdraw madjüjowa.

Jisu ñe mütü na go dyewfo

¹⁴ Sündatcholye Jisu i ügadow ġulo mauw a í lahuatcho; se ġulo mauw ye kahuahuñe, ügadodo ye ütrü zekülye; sünda nüna na mavenghuatsü.

¹⁵ Séšo namko ye küña na cheda, “I bó ġuló mauw nachi go dyewfow mütü ichi datunow yo lahuabaiwa.”

¹⁶ Utro na í dafidama hojoñe í ñedzü udru ge hadamge sheweñe cheshew shewe che.

¹⁷ Séšo Jisu i, nadrü-nalü ge vedaw i danghulyeñe, na che, “Ha ha ñetrüğüfo ge brağidama, se ñetrüğüfo ye mütrüajome; sünda ha ñe ye brağidama, se ñe ye je mümyajome.

¹⁸ Seyo sünda mütü ye í nudzo íbo magotchow dame, se ichi ñetrüğüfo kúndañe dujowa? Hado chemeje djo nofo go ana chešoibi, se mütü i datunow yo se mauw ná lahuabaibi cheñe.

¹⁹ Senameje no mütü i datunow yo ġuló mauw ná lahuabaimeje, se djó agü na dju tunow yo kakülyebaiya? Sündada ná djo niyay djüw nüna chejome.

²⁰ Séšo no Tawgyew udruyo yo uġulo mauw na lahuameje, Tawgyew i ñetrüğüfo ye djotrü ge kakujome.

²¹ Nüna gow na nachi ñe i ġaksüw chiaği pyogoñe ñe í hokrüimeje, se ichi gañ-miği na ġüdzüw dujo.

²² Sešo ije gofotchow na djuma a í tumuvojoñe í dafoahuñe, í se chiaği na ha ye i veksüdama, sena lağalag seyo ichi gañ-miği na lağañe habrağiame.

²³ Dju nodra ñima se i no mavyewme, seyo dju nodra dukyeğiyima se i trabrağiajome.”

Ġuló ñișgzüñ ye ñe tchüw

²⁴ “Nüna usso go ñișgzüñ ġulo kahuahuñe nokro ge ġyogojo tchüğijome, sünda mapawñe i chejome, no ha ñe yo kahua dama se ñe ge kamyotchajome.

²⁵ Sünda kakuwñe i gümsa-gümğañe howsa hohujome.

²⁶ Sündawñe i idra ye í je mofokow uġulo mauw mro ye idra ye lakujome, sünda na ilunge kamyoñe sayo sa ġyojome, sünda se nüna ye uvro gow ije mokofow mauw lyajome.”

²⁷ Sese i he ñu i trungkoi ye upumko go mim a ye gow yo che, “Şüvzüwme se uluhu ye hayo sa a ba ġyodama seyo se apu ye ha ye ba mütsüdama.”

²⁸ I che, “Am; séšo Şüvzüwme i, dju Tawgyew i ñu dzüñe i chew dzüima.”

Ñedzü go ñu prüw

²⁹ Se şüpyo upu kyeğipyo dawñe, i che, “He ñishü yo nüna na maume; na chishew tchünggudru; se ná Yona i chishew í tralye seyo haje chi mashejome.

³⁰ Yona í küna veduw Ninwe ñetrü go chishew vewma, sünambo nüna üsa ye he ñishü yo nüna na chishew vedujome.

³¹ Müdzavye go nugom niyay djüw se ñetomüdrü ayo nuna nadra gudzuñe, í datrüwñe chejome, hado chemeje i Suleman i ñu dzüjoñe druguw-drulyiw udza go jikuda, sünda holabya he ayo he a Suleman ije dyewfo a du.

³² Ninwe go nuna na Niyay djüw ñetomdrü ye hesalu yo nuna nadra gudzuñe, naso ge truchoaijome; hado chemeje na Yona i ñu tru í dzüñe nadra-nalu muchoagye sünda howe, age Yona ije dyewfo a dume.”

Ussó go mütrü

³³ “Dju nuna je bela ge mütrü tchühoñe gumşü ge seyo ñeshü ge mavewme, seşo mütrü ubo ge dzugo vewme hado chemeje nuna jikui na hohujoñe.

³⁴ Baso go mütrü ye bañi ye me, sündada bañi güdrameje, se basso naje vyow müsajome; seşo se ye maumeje, basso ge je nukuğujome.

³⁵ Sündada ufu je ksü-üñi je ksü dañe gyowe, se müsaw ye baso duwye nukuğuañeme.

³⁶ Sündada baso ye vyow müsazeğame, seyo se ichi hangeje manukrumeje, se sündame se vyow na müsajome, süna vyeduw ñeto ge dadawa, se mütrü ye ichi lünaw yo djó müsaw djüiwa.”

Mim na seyo Farisi na gohaw

³⁷ Jisu i ñu trungkoi ye, djudamje Farisi a ye i che, se nochi ge jiñe ava tsawe; sünda i ñelu ge djemyoñe ava tsajoñe gyog.

³⁸ Farisi na basha go na ava matsalu üshi-upo machew í holyeñe mavyenghua.

³⁹ Tawgyew i í che, “O Farisi, ba bekasa seyo bela na udru udru go güdrawşo, seşo balung ge vyesbiw seyo mauw vyesumokradama.

⁴⁰ Budzu ñiw nawa, dju ñepsü go vye ye dadama, hawa se i ulung go i madaima?

⁴¹ Am seşo, ulung go gañ-miği duw na chi djüajo dawé, sündameje bábo vyow güdraw lyajome.”

⁴² “Se Farisi nawa, djo tui me! Ba pudina ñe sudab yo, seyo vyow ñomñow shege bağüdo yo ülye gü tronguaña djüşoma, seşo Niay i seyo Tawgyew i nülvo í mahutroiwa; tsüwbo tsüda hena je dañgudru seyo sena je tratcho.

⁴³ Farisia nawa, djo druge tui me! Djo ñegru ge nugo buğo uw vye seyo badzağ ge ye djó gaga tsüw.”

⁴⁴ “Djo tui me! Hado chemeje djo se pelyado nuğu vedudame, süge nuna na udru ge dügrüñe kahi, se madanghuw nuğu du cheñe.”

⁴⁵ Südawñe mükyew a ye í che, “Dadrüwa, he ana cheñe ba ñi tchügoime.”

⁴⁶ Jisu che, “Oi shotuko-kunu dakyew nawa, djoje tui me! Djo ana loje-malofi w gañ me, nuna nadrü ge joşoi seşo yabó djo djogzütsü a je madadü.”

⁴⁷ Djo je tui! Djo se ñihow truw na nuğu chiw, dju djo aki-awu na shilyedama.

⁴⁸ Sünda: djo truksüw nuna me, seyo djo aki-awu na dalyedaw yo uw vye; hado chemeje na bó ná shidabi sünda djo ná nuğu í daw.

⁴⁹ Sündada Tawgyew i patsü-sholu je chedame, se no nachi ge ñihow truw seyo shürhaw kiajome, seyo na nağiyó küña na shijojema seyo küña na daşedamejojema.

⁵⁰ Se i ye küña ñihow truw duma naşü í he druguw-drulyiw í dakülyejobo a fualyedame, vyew na gilyedo ye he ñefo ayo nuna nachi yo lajodawe.

⁵¹ Habil í üşü yo dalalye Jakaria í shiw kuw se psügañe mügañe naksümko ye shiw: no djo umso truime; ichi gidoye he ñefo syo şüdo nuna nachi go lajome.

⁵² Shotuko-kunu dakyew djo tui me! Se djo je patsü-sholu veğiw bo ladaşome, seşo djo djoluvyo makakume, seyo kakujoñe dado na dugo vye.

⁵³ Sündalye i sa yo kahuahuñe, sese shizew-ñuzew nañe seyo Farisi şüpyo ifum kase seyo i dagtso-damrhüñe, ha ha ñu bütroluweñe da, se i şüpyo ñu ufo bütroluweñe

⁵⁴ sünda na i ha ñu chehualaima gyokrü gyo, se umdzu yo ha damje ñu zetrualuw ye kigolajoñe.

12

Givow seyo Farisi na dambo djulyawe

¹ Aña a sese hadzağ-hadzağ dzaw nuna fuguñe, aña ana kuw nağütchü tcheği-lügyeği da, se i uvromashü í shürhaw ná che, “Farisi nago loğaloğe yo üga gyojodawe.

² Vyojo haje dümyoñe maveme, madanghujo haje müşüñe maveme.

³ Sündada ba ha damje nukuğuw ge chedo ye, se i müsaw ge dzühujome; seyo ñeğün ulung ge ufu ge ha aşesa yo chedama, se ye ñelütsü udru go yo trujome.”

Iyo gwe

⁴ “Séso no djo trungkoime, nodraw nawa, dju usso i shifidama se na seyo ha madamñefijomme, ná djuğejo dawe.

⁵ No djo trumchemjome djo djú ġejoma, dzüwñe djú chigüje ge lañe djoafima, se í ġejo dawe; no djo trupangkoitchoimme, se í ġejodabuwe.

⁶ Hawa ajolya ksü yo sülyisa pom madrüafima? Sedamje Tawgyew i namko ye a ye je makoşoa.

⁷ Bakye go vyow ükyetrü duw naje ngümdzo vedame, sündada: djuğejo dawe, ba sülyisa na dafowme.

Jisu í matsüñe chewye hama

⁸ “No djo chengkoime djudamje no nuna navro ge nó noşobiñe danghumeje na je nuna üsaw ye je Tawgyew i sorgomuko uvro ge eşobijome.

⁹ Séso dju nuna navro ge no hopseğiahima ije Tawgyew í sorgomuko uvro ye hopseğiajome.”

¹⁰ “Dju nuna üsaw ütuma mauw truima, i datrudaw í muchoaijome. Séso dju ġulo ġüdraw ütuma mauw trüima, í datruw í mamuchoijomme.”

¹¹ “Nuna na ba mügaw-ñegru seyo mükyew seyo damikyew navro lakuwñe, ba navro ge ha chemeje ujojema seyo küna chejojema se na djuvengüajodawe.

¹² Hado chemeje ġulo ġüdraw ba sayo sa a ha chejome zedrüjome.”

Nuna nugo a ye veduw

¹³ Seyo upu go nuna a ye í che, “He dadrüwa, noñuw í awu í bo-luko ná noje hawe chejodawe.”

¹⁴ I í che, “Nuna nawa, nó dju niyay djüw seyo bağügiw nuna boña?”

¹⁵ Sünda i í che, “Uw yo ho gyojodawe, seyo tsağa-lağaw süna yo basü gyojodawe; hado chemeje nuna na şüw ye dju bo-luko duw yo mashüwme.”

¹⁶ I í zeğaw a tru, “Tümbum nugo a í no ge rhamu şüpo kakülye.

¹⁷ Sündawñe i ulvyu ge no hadajojemmañe ve, hado chemeje nochi ge bo no dakülyedaw rhamu na vejo buğojome.”

¹⁸ Sünda i che, ‘no ana dajobabi: no nó ñetchü í tashalyeñe dyew dalajo; sünda no rhamu seyo bo-luko na vyow süge vejo;

¹⁹ sünda no ġulo i chejo, ġuloa, bachi ge oje şüpo üğalaw kuw bo-luko vewme; ġyogowe, tsawe, tuwe seyo lüshüw yo ġyowe.’

²⁰ Seşo Tawgyew i í che, ‘Chi madnaghuw nuna! He ñegimdo ñegi a ba lutuw ye lutukyoadügyejomme; sündawñe ba küña dashütrüñe vedama, se ye djuchi lyajowa?’

²¹ Ana je nūna duwme dju nudzo ubo bo-luko dashütrüñe ve, sé i Tawgyew iñigzü ge nugo mo.”

Ha ñu yo je duhu djudajo dawé

²² Sünda i í shürhaw ná che, “Sündada no djo trungkoime, nudzo shüjodujo ubo djuvewe, no ha tsajojemañe; seyo nudzo usso ubo je ha gye-ğuvo shejojemañe.

²³ Hado chemeje tsaw-tuw í shüw ye, seyo gye-ğuvo í dyewfo usso yeme.

²⁴ Pülğam na hojodawe; na zuje mazuw seyo ñetchü ge rhamu je mapaw; sedamje Tawgyew i ná tsakyewšo. Bá musu na fow go aña dufowme.

²⁵ Djomko ye dju duwa, dju vengaw yo nudzo i shüngkoi ge ganta a ña damje shafijo ye?

²⁶ Sündada ba imisa fo chiğa íje madafimeje, hado utro ñu ná lañe vemyoñña?

²⁷ Bye go shoba ná hojo dawé, na kűndañe shülyima; na chiğa je madaw chitra je madaw; sedamje no djo chengkoime, Suleman je í kűña übadzü gidama, namko ye ana veduw gañ a je magime.

²⁸ Sündada Tawgyew i no go suso-mütchü namaje yow gye sheida sünda draha ná boti shüw ge joañe, anambo gye-ğuvo sheñe veihume; Tawgyew ge mesame veksüw nawa, djo kűnadañe aña masheijowa?

²⁹ Sünda djo ha tsajojema ha tujojema süna ve djuğyowe, sünda meaje mavemyow djudajodawe.

³⁰ Hado chemeje he druguw-drulyiw ayo go vyow tuğu-tumo na he ana veduw bostu na tchünggudruwme sünda ba Awu danghudame djo he bostu na şüpo tsüda cheñe.

³¹ Séšo ichi ğadzü i tchüjodawe, sündameje, he bostu naje pajome.

Bo-luko ná hange dashütrüñe vejowa?

³² “Nūna imisa nawa, djuğejodawe; hado chemeje ba awu i bá ğadzü paweñe vedame.

³³ Nudzo ichi fuñ-voñ na draalyeñe tunoajodawe; sündalye nudzo ubo ana dalajodawe, ha ye üme malyajoma, sünda soğgo ge ana bo-luko dashütrülajo dawé ha ye makaajoma, djutrü iñisa ge tsaksutchüw naje majikujo seyo bulu naje mauw madajo.

³⁴ Hado chemeje hange bachi bo-luko duma, badrü-balu he süge dujome.

Dashütrüjo ğyovojo dawé

³⁵ “Djotsü na pyogo vejo dawé, seyo dju mütrü na dzodügyejo dawé.

³⁶ Sünda djo se kulo na veduw dajo dawé, dju nudzo dadrü í gzü jiw go ke kakujojemañe ğyokrü ğyow veduw; i kakuñe ñegüdrüşü düwñe mekutcho djeñe voa.

³⁷ Gağüzewe se kulo í, djú dadrüw ye kakuñe madrumuvow hohudama; no djo umso trungkoime, i ütsü ge pyogolañe ava tsajoñe ğyojo, sünda üñisa jiñe í hoijo.

³⁸ I ñegi ge ülye ksü seyo ülye dzü ñepüñew ge je pakülyew hohumeje, se kulo ye gağüzebamme.

³⁹ Djo he i danghujo vejo dawé, ñe übraw ye tsaksutchüw na tsaksuw ke jikujoma se í danghubammeje, i pakülye ğyojobamme, sünda nudzo ñe ge majimyogyejome.

⁴⁰ Baje dashütrü ğyojodawe; hado chemeje ha homoi ye jikujoñe mavew se homoi ge nūna üsaw jikujome.”

Veksüfiw kulo djuwa?

⁴¹ Sündawñe Patras i che, “He Tawgyewwa, ba he zeğaw ye ñi aka bama mow vyow naje truwma.”

⁴² Tawgyew i che, “He veksüw seyo patsü-sholu hokrüw ye djuwa, djuchi dadrüw ye ná tsaw-tuw homai ge djüweñe kulo-kutro boñe ve.

⁴³ Se kulo ye gağüzeme, djú í dadrüw ye ana dangkoiye hohudama.

⁴⁴ No djo umso cheime; I í nudzo ichi vyow bo-luko ge zeğiw vejobamme.

⁴⁵ Séšo se kulo ye ulu ge ana vemeje, no dadrüw ye üğalaw ge kakujobañe veñe, sünda kulo seyo kulom na güñe seyo tsañe tuñe tukrañe gyomeje.

⁴⁶ Se kulo i dadrüw ye ana ñeto a ye, i madanghuw ñeto a ye, i í mağyokrüngkoi ye, seyo i madanghuw homai ye, kakujo sündañe í sojai djüñe í usu maw ge ngüañe vejo.

⁴⁷ Seyo se kulo dju nudzo dadrüw í véw í danghuñe, seyo madashütrüvoñe seyo í vew kuw ge makasabammeje, šüpo tsalajobamme.

⁴⁸ Séšo dju madanghuñe güw tsalajo chiğa dadama se ye me tsalajobame, sündada dju aña djüdama, í aña prújome; seyo dju šüpo boñe vedame, ichigo aña lajome.

Ğüdzüw dušome

⁴⁹ “No druguw-drulyiw ge mi dahow kakülyahume; sünda ha tsüdawa chemeje hesalu mi dzomzoaweñe!

⁵⁰ No baptisma lajome; sünda no malamdolu kuw no küna mauw ñiku-ñisüw ge gyojojema!

⁵¹ Ba vedaw ye no he druguw-drulyiw ge ğüdzüw kakudañe vedama? No ba chengkoime; mome, no dabrağiahuw kakülyahume.

⁵² Hado chemeje hesalu yo ñe ge nüna pom nağütchü ge magağijome, dzü ye ksü üdra seyo ksü ye dzü üdra.

⁵³ Awu ye saw üdra, seyo saw ye awu üdra maveğijome; añ ye sam üdra seyo sam ye añ üdra, apye ye safu üdra, seyo safu apye üdra maveğijome.”

Ümdrü í hosüw

⁵⁴ Sünda i upu naje che, “Mumu íje druguw go kalyiw hohumeje, djeañe ñedzü šüjo chew; sünda süna dabaibi.

⁵⁵ Sünda müdza gow ñedzü lyiw hohuñe cheibi, ñedzü shüw lyijome, sünda süna dabyo-dağyotcho.

⁵⁶ Loğa-loğe nüna nawa, djo ñedzüñe no naksü í utroñe danghudameje, hado he shüw-duw ubo kündañe madanghufia?”

Nudzo ñu duw ná chebruawe

⁵⁷ “Ba hesalu ba nudzo yo hado ñu mavelafia?

⁵⁸ Ba bá fodaw nüna üdra mukow ichi ge jingko ye, ğabo ge ñu chegüdrajo dawwe, momeje ba í mukow ichi ge šüñe lajikyeneñe, sünda mukow i bá shipashi nagzü ge djüñe seyo shipashi na bá pache ge shüñeme.

⁵⁹ No djo trungkoime, ba ajolya ajolya dañe magimdzoalu kuw, ba makahuafijome.”

13

Vegudolawe mome mütrajobamme

¹ Nüna üchea sayo sa a djeku, seyo Jisu í Galiliyo nabo go ñu dzüngkoi, djušü í Pilatus i í küğüw ge djüasadamma.

² He í dzühuñe Jisu i na che, “Djo ana veima, he Galili na utro Galili ná lalofoñe, hado chemeje nadru ge ana veduw ñiku-ñisüw djüda che?

³ No djo trungkoime, mowme; séšo djo djüdrü djolu mavetülümeje djo vyow he ñom yo mütratsüjobamme.

⁴ Mow djo ana vedama, Shilom ge nūna ġütrü şügzü djudrü ge post gaañe trüalyañe dzüdama: na vyow Yarusalem ge küña tuġu-tumo şhütsüdama ná lalofoma?

⁵ No djo trungkoime, mowme; séšo djo djüdrü djolu mavetülümeje djo vyow he ñom yo mütratsüjobamme.”

Lufuje üyañ üje majew

⁶ Sünda i he zeġaw ije tru, “Djuchidamje anggur vi ge lufuje üyañ a zuñe veda: i sayo sa a sheje thcüw jikuda, sé í mapa.

⁷ Sünda i vi ġyokrüw nūna i che, ‘Howe oje dzü gomdo no he lufuje üyañ go sheje tchüw jikunggudru, sé keje mapa, he í chepyojo dawwe, i hado no í ġyokrügejowa?’

⁸ I í ana che, dadrüwa, í oje a kuw ġyokrülüwe; no üdza üdza ge no chiguġuañe nobi sujome.

⁹ Sündañe, drawha ge sheje jelaimeje uw; se molaimeje chepyojo daşobe.”

Mim utsubo kuw í dagyow

¹⁰ Ġyogow ñeto sehu Jisu küġüw ñegru a ye truñe ġyoda.

¹¹ Süge mim a du, dju oje ġütrü şügzügomdo ksüw kaw mütü a kamyoda, sünda i utsubo kuw lyada, sünda i keje gudow magudzufiwbi.

¹² Jisu i hohuñe balayeñe, che, “O mimya, ba bá hamalyiw yo kahua-jemme.”

¹³ Sünda i ügzü í udru ge ve, sünda i djeañe gudow lyajebi, sünda Tawgyew í trokülyejebi.

¹⁴ Hado chemeje Jisu i ġyogow ñeto sehu dagyoda, mügaw na seyo nugobraw na nūna na che, “Ñegi ġe duw me, sa yo sa chiġa dajo dawwe, seyo se ñeto ye jikuñe dagyojo dabuwe; séšo Sabat ñeto ge djudawe.”

¹⁵ He í dzühulye Tawgyew i che, “Loġa-loġe nūna nawa, ġyogow ñeto sehu djo djó nudzo fulhu seyo ġiġá na ñe tashalyeñe hu tuw lañe majikewma?

¹⁶ Seyo ha ye madafijo cheña, he mim Abraham üsam djuso ge oje ġütrü şügzügomdo mütü ye pyogodama, se í ġyogow ñeto ye vogodaw i kihuaajo?”

¹⁷ Ná he ñu na chewñe, í ubo mauw dai na ñimtchüñ lyatsü, seyo vyow upu na se uw chiġa dadaw ubo lüshütsü.

Pemdu üsü seyo pa í shipyew

¹⁸ Sünda Jisu í chetcho, “Tawgyew í ġadzü dju veduda? Seyo no í ha shipyew üdra djüsejowa?

¹⁹ I pemdu üsü a veduwbame, djú nūna na lañe ná vi ge trawma; sünda i shülyiñe shoñ lya; sünda ñedzü go musu na ufotsa ge guñe ġyow.”

²⁰ I sünda chetcho, “No Tawgyew í ġadzü í dju vedu dañe vejowa?

²¹ I pa vedudame, djú mim a ye lañe oje ulumo tola dzü ge ġülüşüġia, sünda ñu-ñuñe oje ulumo ye pa lya.”

Ñegüdrüşü imisa

²² I ñetrü-ñetrü jiñe dadrüşü Yarusalem ge ji.

²³ Sünda djudamje a í che, “He Tawgyewa, nūna mesame basüafijobama?” I í che,

²⁴ “Ñegüdrüşü imisa yo jimyojodawe, hado chemeje no djo trungkoime, şüpo nūna na jimyojoñe dajome, se majimyofigjome.

²⁵ Ñe ubrow gudzülyiñe ñegüdrüşü dugoahuñe, seyo ba ñepsü ge gudzuñe ñegüdrüşü düñe che, ‘He Tawgyewwa, nobo vojodawe,’ sünda i sügow no ba madanghume, ha hanggowa?

²⁶ Südawñe ba chejo, ‘No ba how ge tsa-tuw sünda ba ñi bodzaġ ge dadrüda.’

²⁷ Séšo i chejo, no djo chengkoime, ‘No madanghume djo hanggoma. Mütü chiğa daw nüna nawa, djo vyow no yo üğa gýojodawe.’

²⁸ Süge ksew seyo utu trashügrüjome, ba Abraham, Isahak seyo Yakub seyo vyow ñihow truw ná Tawgyew ge gâdzü ge gýodaw hohuñe nudzo í ñepsü kahuahuw hohujome.

²⁹ Sünda druguw seyo drulyiw; tchüsa seyo müdza go nüna na jikuñe Tawgyew i ñetrüğüfo ge dusejome.

³⁰ He i danghulajo dawé, küña ná fum ge duma, na uvro ge dujome, seyo küña na uvro ge duma, na fum ge dujome.”

Herod i vyeñiw na

³¹ Sa yo sa küña Farisi na jikuñe í chejea, “Ayogo kahuañe kajo dawé; hado chemeje Herodes í ba shijoñe vedame.”

³² I ná che, “Kañe se šelü í trujodawe, howe, no yow je seyo draha je uğulo na lahuañe seyo usso naw na dagyojolume, sünda ñegi dzü ye no chiğa damdzoajome.

³³ Sedamje no yow, draha seyo pülha kuw jijome, hado chemeje dju ñihow truw na Yarusalem í ñepsü ge madzüfijome.

Yarusalem ubo duhu

³⁴ “He Yarusalem! He Yarusalem! Ba se ñihow truw ná shiye, seyo bachi ge dju kiima ná kunu yo trümoahiye; no ana veduw küña tsüda, joñi i üsa ná utupro ulung ge küna tchelaima, sünambo noje basa ná lakyeğiajoñe daw, sé ba he í matsü.

³⁵ Howe, bañe babo kabra-kasağijjome, sünda no djo chengkoime; ba ‘Ná üdrü-ulu yo uw cheime, se nüna ye gağüzü dume dju Tawgyew iñiñi yo lañe kakuima,’ machemdolu ba nó keje mahohujome.”

14

Gýogow ñeto ge dagyow

¹ Sünda í gýogow ñeto sehu djudamje Farisi nágo nugo a i ñe ge odje tsaw ji: sünda ná í usu yo hopasa.

² Süge í veduw muhu a du, dju usso dalfuñe nada.

³ Jisu í Farisi seyo shotuko-kunu damivro ná che, “gýogow ñeto ge dagyomeje ujo ma mow ma?”

⁴ Sé na madañda gýo. Sündawñe Jisu í í ügzü kiñe dagyo, sünda kadügye. Sünda i í ügzü kidüñe dagyo, sünda kadügye.

⁵ Sünda i ná che, “Djongko ye dju duwa, djusa seyo fulhu ye kalü ulung ge gamyoya sünda gýogow ñeto ye kutcho malahuajo.”

⁶ Sé ná he ñu ge haje machefibi.

Tumowna ná hovow

⁷ I hobanda, tumona baladaw na uw uw buğo tsatchüñe lai sünda í se ná hoñe zeğaw ze,

⁸ “Djuma djo gû ge balai ye, buğo dyew tsatchüñe djuğyojodawe, asha baje dyewfo tumona baw je dufijome.

⁹ Sünda dju ije seyo baje badama, bá jikuñe ana chemeje, ‘Í buğo djüjo dawé,’ sündawñe ba ñimtchüñ lyañe ülafo buğo ge gýow dujobamme.

¹⁰ Sé bá bawñe, ülafo buğo ge jiñe gýojo dawé, bá badaw nüna ye jikuwñe, bá ana che ‘Drawa, uvro ge kalyiñe gýoa,’ sündawñe badra a gýosadaw navro ge udru kalyijome.

¹¹ Hado chemeje dju nudzo yo dyew dalaima, se ye imisa lyajome; seyo dju nudzó í imisa dalaima, se ye dyew lyajome.”

Dakülyew

¹² Sündawñe Jisu i í baladaw naje che, “Djo ñeto ge damje ñegi ge damje ava tsaw ge, nudzo draw, ayo-ñuw, ñeşü seyo nugo na djubajodawe, ana dañeme, naje djo balañe dağũñeme.

¹³ Sé ba ava tsakelai ge sapse, hamalyiw, üshilyew seyo iñiğew ná bajo dawe.

¹⁴ Sündawñe ba gağüzebamme, hado chemeje nachi ge djó djüjo haje ñiwme, séşo djó ná güdraw yo üshükülyejo go küğüijome.”

Tsaw-tuw dyew go shipyew

¹⁵ Üdra ava tsasangkoi go nüna a ye he ñu ná dzühulyeñe che, “Gağüze nadra dujome, dju Tawgyew í gadzü ge odje tsaima.”

¹⁶ Ná i che, “Djudamje nüna a ye ava dyew tsakeñe seyo sünda şüpo ná ba.

¹⁷ Tsaw-tuw dafiñe, i í kulo ná tumona baladaw ná cheñe ki, ‘Age djebe; tsaw-tuw dafiadamme.’

¹⁸ Sé vyow na chetsü, ‘uvro go ye í che, no vi a prülawme, sünda no se í hojo dume; no ba chengkoime, no maf daijo dawe.’

¹⁹ Utro a ye che, ‘No fulhu fulshi pom lawme, sünda no he na dañe how jingkoime; no ba chengkoime, no maf daijo dawe.’

²⁰ Sünda a ye che, ‘No gzü dawme, sündada no majikufijome.’

²¹ Se kulo ye jekuñe i ñe übraw í he ñu ná trutsü. Sündawñe se ñe ubraw ye lusuvyulalye í kulo í che, ‘ñetrü go bozağ seyo ğabo ge kutcho jeñe sapse, kiği, üshilyew seyo iñiğew ná age lañe kakuwe.’

²² Kulo ye che, ‘O übrawa, ba küna chedama, süna damme; sé yaje buğo ufo dulumme.’

²³ Übraw ye kulo í che, ‘Ĝabo ge seyo fûta duw ge djeñe nüna ná künadamje lañe kakujodawe sündameje noñe gujome.’

²⁴ Hado chemeje no djó trungkoime, se tumona badaw ná no tsaw-tuw í tsapũñe matsapũñejome.”

Dju Jisu í kulo lyafijowa?

²⁵ Sünda upu na ufum kasawñe, sünda Jisu i fum ge tchoñe ná che.

²⁶ “Djudamje nochi ge jikuñe, seyo nudzo awu, añ, ufum, agü, ñu seyo ñum seyo nudzo şüw-duw naje mahosübammeje, í no şürhaw mowme;

²⁷ Seyo dju nudzo shokru íje magilama; sünda nofum makameje; se je no şürhaw madafijome.”

²⁸ “Djomko ye dju post dzuğõñdama, seyo uvromsahü bo küña kajoma, damdzojo kuw nochi ge duşoma ñima mahow?

²⁹ Ana dawñe, i shobo dzugoñe ñekru makrufiwn, sündawñe hovow nüna na vyow í tchüğõjoşo,

³⁰ ‘He nüna ye damyowbo damyodaşowa, sé madamdzofiwa?’

³¹ Mo dju ñubyu duwa, utro ñubyu nadra tumo daw jiw, sünda uvromashü ğyoñe mavemchevzüme, se hadza büsha kulo lañe nodrü ge tujovodawye no hadza ğü lañe üdra dağufijoşoma mo mowma?

³² Mowmeje üğa ğyodamje, mukow kiñe ñu ğüdzüagyefijo.

³³ Ana veduw djo nudzo ichi küña duma ná nobo matrafimeje, se ye no şürhaw malyafijome.

Tsamtsalyow ğu

³⁴ “Ĝu bo udame, sé ğu tsamğüw lyameje, se í ha yo ğu lüw dajowa.

³⁵ Se ye no ubo je seyo nobi ubo je chiğa ge makakujomme: se í nüna na ñepsü ge joajohubamme. Djuchi ge dzüjo ufu duma dzülasajodawe.”

15

Fugulu moahuw i shipyew

- ¹ Vyow patso-law na seyo lalo ubraw ná ichi ge dzüw jikuw.
² Seyo Farisi na seyo shizew-ñuzew na dubyoğunguñe che, “I bó lalo ubraw ná tüvañe seyo nadra ava je tsasai.”
³ Sündawñe i ná he zeğaw í tru:
⁴ “Djongko ye djuwa djuchi fugulu fuğua дума, sünda namko sa a moahuñe se sütü ġütrü sütü ná nodo ge tralye, se a moadaw í matchülalu kuw tchü ġyo?
⁵ Sünda tchülawñe, i şüpo lüshüw upostu ge trütalañe ka.
⁶ Sünda ñe ge kakuñe draw seyo ñeşü na bakeğiañe che, ‘Nodra lüshüsawe, hado chemeje nochi fugulu moadaw ye tchüladamme.’
⁷ No djo truime; ana veduw ñedzü ge je lalo a dju vyegudoladama ubo lüshüjome, küñambo sütüġütrü sütü nüna ġüdraw dju ulu mavegudojo дума nabo madama.

Bosüñ moahuw i shipyew

- ⁸ “Ana mim dju dujowa, djuchi ge bosüñ ġü duw, sünda namko ye bosüñ a moadabi; sündawñe i matchü uw mütrü tchühoñe seyo ñe na süñe, dju uw yo matchüjowa?
⁹ Sünda tchülawñe, i üdram na seyo ñeşü ná balañe che, nodra lüshü-lübasawe nochi bosüñ moadaw ye tchüladamme.
¹⁰ No djo truime; ana veduw, lalo nüna a í ulu vyegudolaw ge Tawgyew í sorgomuko ná ana lüshüjome.”

Saw tsağudroahuw i shipyew

- ¹¹ Sünda Jisu i che, “Nüna a ichi saw ksü duw.
¹² Naksümko ye kiğiw ye uyow í che ‘Awa, nobo go bo-luko duw ye, no djüjo daw.’ I í ichi bo-luko na hağiağ.
¹³ Sünda ñegi aña makulu fum ye üsaw kiğiw ye vyow dashütrü lalyeñe ñetrü üğa a ge katrükralye, sünda süge bo-luko duw na vyow tsağudroamdzoag.
¹⁴ I vyow damdzoahuñe, se ñetrü ge nokrow kaku, sünda i usso ufobüla lya.
¹⁵ Sünda i se ñetrü go nüna a ichi ji, se nüna ye í í vi ge vo na ava gyew ki.
¹⁶ Sünda i ve uluhu í gudugyejoñe se votsa pago go vo na tsa; hado chemeje í djuje haje madjü.
¹⁷ Í vepalawñe, sünda che, ‘No awu ichi küña vi daw ná tsaw-tuw aña paw, seyo no age luhuşüw yo dzüangkoibi.
¹⁸ No gudzulyiñe no awu ichi kañe í chejo, awa no ñedzüñe ba how ge lalo datroadaşomme.
¹⁹ No basaw chejo haje matramme, no ba vi daw a veduw vejodawe.’ ”

Saw tsağudroahuw í kakutchow

- ²⁰ “Sünda i gudzulyiñe, i awu ichi ge ji: uğa gudzudalu sa a uyow i í hoñe nülvo veag, sünda gyojeñe í krumogo lag, seyo şüpo chuma tsa.
²¹ Üsaw ye í che, ‘Awa, no ñedzü í hovow seyo ba how ye lalo dadamme; sünda hesalu basaw chejo go ñimme.’
²² Sé uyow i í kulo ná che, ‘Kutcho shedra uw yo je uw lañe í sheijodawe, sünda üğzütsü ge ġütsülye lyeijo daw, seyo ishi ge shita duijo daw,
²³ Sünda rhano a dajo daw, sünda me ñi tsa-tuñe lüshüfijobi.
²⁴ Hado chemeje nosaw ye dzüwmme, sünda üshükülyedamme: moahumme, hesalu tchülatchodamme.’ Sünda í lüshü-lübaw da.”

Saw nugow i shipyew

²⁵ “Sé üsaw nugow ye vi ge du. Sünda í kañe ñe kakulai ye, i nuḡuw dagruw seyo ñuksu daw dzühu.

²⁶ Sünda i kulo a í balañe dzü, ‘He ha dangkoiya?’

²⁷ I í che, ‘Ba ñuw kakudamme, sünda ba awu i tsa-tuw dyew vedame, hado chemeje i í nuna uw hohuda.’ ”

²⁸ “Saw nugow ye he í dzühulyeñe i lusuvyumfoag seyo ñe ulung makamyogoñ lyag: séso uyow i ñepse ge jihuañe í nü.

²⁹ I uyo i che, ‘Howe; no aña ojegomdo bá ḡaksüñe ḡyow, sünda ba chew keje madzügaahuw, nodraw nadra lüshü-lübaw dajo, ba no yow kuw küsüsa üsa adamje madjülu.

³⁰ Séso he basaw ye ba bo-luko ná utroñiw mim nadru ge djoañe kakuwñe, ba ubo aña dyew tsaw-tuw dañe gyew.’

³¹ I í che, ‘Sawwa, ba shüwduw nodra dusaw; seyo nochi ha duma se vyow bachibamme.

³² Séso hesalu lüshü-lübajodume hado chemeje he ba ñuw ye dzüñe üshükülyetchodabi; moadabi, se hesalu tchülatchodabi.’ ”

16

Budzu duw nuna

¹ Sünda Jisu je í shürhaw ná che, “Nugo a ichi ge hokrüḡiw a duwme, sünda nuna na i howye se hokrüw í i bo-luko ná tsaḡudroahime cheñe usso ge trutchoañe ve.

² Sünda nugo ye í balañe che, ‘He hawa no babo go ñu dzühuiye? Ba hokrüšo cheñe shewe; momeje ba hokrüḡiw ge maḡyofijome.’

³ Sündawñe hokrüḡiw ye vemchepüñe, ‘Hesalu no hadajobya? Hado chemeje no übraw ye hokrüḡiw go no lahuangkoibi: noje no machifi; seyo no tsatuḡujoje šüpo ñimtchüñ vei.

⁴ No danghudaba no ha dajoma: nó hokrüḡiw go lahuahuwñe nuna na nó nañe ge lajo.’

⁵ Sünda i übraw i chi gudzüdaw ná a a balañe dzüpüñe, no ubraw ichi ge ba küña dojo duwa?

⁶ I che, ‘Fuḡua tsow psüw tel du,’ sünda i í che, ba kutcho ḡyoañe kako ge pomḡü ḡijo dawewe.

⁷ Sünda i utro a í dzütcho, ‘Bachi küña dojo duwa?’ I che, ‘Pu ulumo fuḡua tsow dume,’ sündawñe i í che, ‘Bá kako lañe šügzüḡü ḡijo dawewe.’ ”

⁸ “Übraw ye se machiñiw hokrüḡiw í tro, hado chemeje i budzu yo chiḡa dadabi; hado chemeje he druguw-drulyiw go nuna na ná ñeto go nuna nadra chiḡa dasaw ge, müsaw go nuna ná fow budzu du.

⁹ Sünda no djo cheime, mauw go bo yo ba nudzo ubo üdra dalajo dawewe; hado chemeje i kaahuñe, bá na shüwa-shüw lüshüw ge lamyosajo.

¹⁰ Dju imisa yo je imisa ge usuima, ná añe ge je usujobamme: seyo dju imisa yo je imisa ge usu mowma: se na añe ge je usu mojome.

¹¹ Sündada ba he druguw-drulyiw ayo bo-luko ge usu mowbammeje, bo umso dju djüjowa?

¹² Sünda ba tuḡuda-ḡuvodzü i bo-luko ge je usu mowbammeje, ha ye bachi ma, se í dju djüjowa?”

¹³ “Dju kulo ye je übraw ksü í maḡaksüfijome hado chemeje i a í mahoḡoñ dajo seyo a í nülvo dajome; mome a udra gaaḡijo seyo a üdra magaḡijo: ba Tawgyewñe bo-luko naksü í maḡaksüfijome.”

Tawgyew í gadzü i go

¹⁴ Farisi na, dju tsaḡotüdama, he na dzühulyeñe Jisu í maw-uw zekülye.

¹⁵ I ná che, “Djobó nüna na how ge uw dañe she, séso Tawgyew í djodru djolu ná danghuwme, hado chemeje ha gañ ye nünan na how ge dyew dama, se ye Tawgyew i iñigzü ge imisame.”

¹⁶ Yohañ í kakuw kuw, shotuko-kunu seyo ñihow truw naje ná chiğa daw. Sehu ñetogomdo Tawgyew i ñetrüğüfo go shi-ñu truñe kaw, sünda vyow nüna na süna datsü.

¹⁷ Nedzüñe no naksü í kabrağiahu ye shotuko ütra a yo lyajobame.

¹⁸ “Dju nudzo ufum udra brağilyeñe utro nadra gzü daima, se na lalo dawme, seyo dju brağiñe gyodaw mim í gzü daima se ye lalo dawme.

Nugo nünañe sapse Lajar

¹⁹ “Nugo nüna a duw dju djüw rong seyo gye uw shewma, seyo shüwa-duwa lüshü-lübaw dañe gyonggudruw.

²⁰ Sünda Lajar iñiñ yo sapse seyo tsadu yo guñe í molgi ütrü toi tralye.

²¹ Sünda í vew, nugo í tsamyew djoadaw yo uluhu í tsaşelajo; momeje şulyo na je í tsadu í kañe tsalowba.

²² Sünda se sapse ye dzütrükralye, sünda sorgomuko na í Abraham ichi laku. Seyo nugo ye je dzüdañe zuadabi,

²³ Sünda noğu üşü ge şüpo naw yo iñi voaño üğa go hobanda, Lajar í Abraham í udru ge ggyodaw hohu.

²⁴ Sünda i guksuñe che, ‘He Awa Abrahamya, no nülvo veñe, Lajar í kiñe, ügzütsü üdza ge hu pagzüñe nozelbüla í ngüadügyejo daw, hado chemeje no he mi ulbu dzongkoige dzahiimme.’

²⁵ Séso Abraham i che, ‘Sawwa vehujodawe, ba bá shülye ge gye-ğuvo uw shehulyewme, sünambo Lajar i gye-ğuvo mauw, seşo i hesalu age güdzüw pangkoimme, sünda ba namoahibi.

²⁶ Sünda he ñu na traañe no seyo ba, ñiksüngko ye go dyam a dzühadame, ago dju bachi ge jilağon dama, na majilafijomme, seyo sügo dju age nochi ge jikuğon dama na majikufijomme.’

²⁷ Lajar i che, ‘He awa, no ba chengkoime, ba no awu iñe ge kiyajo daw,

²⁸ Hado chemeje no ñu pom duwlume, i na hovrow ge he ñu na trume ujome, mowmeje na he anambo ñiku-ñisüw no ge kakuñeme.’

²⁹ Abraham i í che, ‘Nachi ge Musa seyo ñihow truw ná kako duwbase, na se í chew büdzüda.’

³⁰ I che, ‘Awu Abrahamya, mowme; nüna dzüw a nachi ge jikülyameje, na nadrü-nalu vyegudoğijome.’

³¹ I í che, ‘Na Musa seyo ñihow truw na chew maje madzübi se í, nüna dzüw namko yo djudam üşükülyeñe jiadamje, na madzüjomme.’ ”

17

Zehaw

¹ Sünda Jisu i í shürhaw ná che, “He ye umsome ha ñu ye lalo yo ma, se ye kakujome, séso se nüna í lalome dju yo kakuima.

² Dju he gato kunu namko ye djudamje a í dügaima, ibo shedra psüm yo udum ge pyogolyeñe, huği ge djoahuye ufojobamme.

³ Vemcheñe gyojodawe; bañuw datrulaimeje, zehajodawe, seyo vepalaimeje í muchoaijo daw.

⁴ Í ahua ye ülye mro datrudamje bachi ge ülye mro jikuñe che, no datru-daşomme, sündawñe ba í datrudaw í muchoaijo daw.”

Bá veksüw küña dyewda?

⁵ Sündawñe í shürhaw na Tawgyew i che, “Ñí veksüw í damñeijo daw.”

⁶ Prabu i che, “Bachi ge pemdu üsü ütraña kuwdamje veksüw dumeje, ba he kumtchü iyañ í ükrügomdo taprülañe huği ge shüwe chejo, sündameje i ba chew dzüjo.

Chiñiw kulo

⁷ “Sé djomko ye ana dju chejowa, dju kulo ye no chi momeje fugulu ná saw, sünda i vi go kakuwñe, sünda í che, ‘Kutcho age jeñe gyoñe ava tsabe?’

⁸ Haña i ná machejoma, no ava dashütrübe: no tsangko tungkolui kuw toi bašümpe í kidzagolalyeñe no hoiwe; sünda se fum ye baje tsa-tuwe.

⁹ Haña i se kulo í ulu yo vejoma, hado chemej i í dügyedaw chiğa í aka dabada?

¹⁰ Anambo ba je, se vyow chiğa dügyedaw ná damdzoahuñe, baje chewe, ‘Ñi machiñiw kulome; ñi ha dasajo duma se í aka dabadame.’ ”

Tabüñ naw a í nülvo

¹¹ Sünda ana da, Jisu Yarusalem jiw ge Samariañe Galili ñetrü yo jipseañe ji.

¹² Sünda ñetrü a ge jimyongkoi ge í südzüm gü gôgo nadaw na tüva, dju na üğa gudzudama.

¹³ Sünda i üğa ge gudzüñe, gó yo che, “He Jisu, he dadrüwa, no nülvojo dawel!”

¹⁴ Jisu i í hoñe che, “Jebe; sünda bá nudzo í mügaw ná shejo dawel.” Seyo kabyo-kağyowñe güdrajebi.

¹⁵ Sündawñe namko yo a ye hoñe dagyolagdabi, gow yo Tawgyew í troñe katrükralye.

¹⁶ Seyo Jisu ishitrüge gaañe ukrumro yo ishi ge drüñe, ulvyu yo uw che; sünda í nüna uw.

¹⁷ He íbo Jisu i che, “Haña na gü güdraw malyama, nameje se sütü ye hanga?”

¹⁸ Haña he tuğuda-ğuvodzü í tralyeñe dju ñimma Tawgyew í trojo?”

¹⁹ Sündawñe i í che, “Gudzuñe kabi; ba veksüw ye bá dagyodamme.”

Tawgyew í ġadzü kakülyahuw

²⁰ Farisi namko yo a í Tawgyew í ġadzü ke kakülyajowa che dzüñe, Jisu ná che, “Tawgyew í ġadzü ana holaw dañe makakülyajome.”

²¹ Sünda nüna naje ana machejome, age howe, age dume, süge dume. Hado chemeje, Tawgyew í ġadzü djumko ye dume.

²² Sündawñe i shürhaw ná che, “Sé ñeto je kakujome, hai ba nüna üsaw í hoğöñiw dzüajo, sé mahohujome.

²³ Nüna na ba chejome, ‘Howe, süge dume!’ Mome ‘Howe age dume!’ Séšo ba djujejo dawel sünda nafum je djudajo dawel.

²⁴ Hado chemeje ñedzü-lüğaw ye ñedzü üdza a yo utro üdza ge kuw müsakumbo, nüna üsaw ye je í ñeto kuwñe kakülyejošome.

²⁵ Séšo uvromashü i šüpo ñiku-ñisüw gilajome, seyo he shülyiw yo nüna na í matsüñe chejome.

²⁶ Nuha i ñeto ge küna dadama, sünambo nüna üsaw i ñeto ge je dajome.

²⁷ Nuha i lü ulung ge magyomyolu kuw, nüna na tsa-tu gyo, seyo namko ye gzü dañe gyo; sündawñe hulüşü kaküñe vyow mauw damdzoa.

²⁸ Seyo Lut i ñeto ge dambo veduw, nüna tsa-tuñe bumdzu dağiw, shobro zuñe seo ñe daw.

²⁹ Séšo ha ñeto Lut í Sodom ge kadama, sehu ñeto ñedzü go mi seyo ecid šükülyañe vyow mauw damdzoag.

³⁰ Nüna üsaw í kakülyahu ge je ana dajobamme.”

³¹ “Sehu ñeto, dju ñelütsü ge duma; seyo na gañ ñe ulung ge du, na se na law ulung ge djukamyowe, sünda sünambo dju vi ge duma na fum ge djukawe.

³² Lut ufum í vehujodawe!

³³ Dju nudzo í ġaksüjoñe veima na maġaksüfijome, seyo dju nudzo shüw í maġaksüfima na basüjome.

³⁴ No djo trungkoime, se ñegi nüna ksü buġo a ye üša dujome, a í latrayemjomme, seyo utro a í traalyjome.

³⁵ Mim ksü ye ġato üša ġüjome, a í latrayejo, a í traayejome.

³⁶ [Nüna ksü vi ge dujome, a í latrayejo seyo a í traayejome.]”

³⁷ He ná dzühuyeñe na í dzü, “He Tawgyewwa he na hai dajowa?” I ná che, “Hai ñimo duma, süge kurkukiñ dujome.”

18

Müjemñe mauw zevow

¹ Sünda Jisu i ná he ubo go zeġaw a trulyeñe udrü-ulu magaada, mamuduw küġüweñe che:

² “Hange damje ñetrü a ye mukow a ġyow; dju Tawgyew ije maġew seyo nüna nabo je mavew.

³ Sünda se ñetrü ye müjem je a ġyow: dju ichi ge jikunggudruñe í chenggudru, ‘No insaf djüiyeñe nobo ġaksüijodawe.’

⁴ I üġaluw kuw madzü séšo fum ye ulu ge vepüñeñe che, ‘No Tawgyew ije maġew, seyo nüna nabo je mavetunow;

⁵ Sedamje he müjem ye no matraa, sündada ubo insaf djüijo, mowmeje i nochi ge jikunggudruñe no ġüdzüw maġodügyejo.’ ”

⁶ Tawgyew i che, “Dzüwe, he magüdraw mukow ye ha cheima?

⁷ Nameje: haña Tawgyew i í nüna basü ladaw ná mamutchoaijoma, dju ñegiw-ñetow í küġüñe ġyowma; seyo i ná üġaluw vejoma?

⁸ No djo chengkoime, i mekutcho ná mutchoijome; sé nüna üsaw kakülyahuñe, i he druguw-drulyiw í umso vefijosoma?”

Dju güdrawñe chejowa?

⁹ Seyo Jisu i shürhaw na dju nudzo í güdrawñe veksüw veima, sünda utro na mauw daima ná ana zeġaw che:

¹⁰ “Nüna ksü ñegru ge küġüw ji; a ye Farisi seyo a ye patso-law nüna.

¹¹ Farisi i gudzulyiñe üdrü-ulu ge ana küġü, ‘He Tawgyewwa no ba ulu yo uw cheime, no utro nüna na dambo tsaksu-laksuw, mütü chiġa daw, seyo mim ġubuw, seyo he patso-law na dambo nüna mowme.’

¹² No sopta ye ülye ksü tsaw-tuw matsaw ġyowme, seyo no bo-luko dalaw gow üchea je djüwme.”

¹³ “Séšo patso-law nüna ye üġa gow gudzuñe, ñedzü ge je iñi maholyi dá i ülüjetchü ge güñe che, ‘He Tawgyewwa, he lalobraw no nülvojjo daw!’

¹⁴ No djo cheime, i ufum yo mowme; séšo he nüna ye güdrañe ñe ge kajeme; hado chemeje dju nudzo í dyewñe veima, i imisa lyajome; seyo dju nudzo í imisañe veima, i dyew lyajome.”

Tawgyew í ġadzü anagasa na vedumbo

¹⁵ Sünda nüna na na sa naje ichi ge lañe jikeñe nagzü Jisu udru ge vefijoñe; sünda shürhaw na hohuñe ná goha.

¹⁶ Jisu i angasa ná ichi ge balañe che, “Angasa ná nochi ge jigyejo daw, seyo ná djugohajo daw: hado chemeje Tawgyew í ġadzü he nambo nabome.

¹⁷ No djo umso truime, dju Tawgyew í ġadzü í angasa na dambo malama, ná keje süge majimyofijome.”

Nugo nüna a Jisu í ñu dzü

¹⁸ Djudamje dümbraw a ye í dzü, “He uw übrowa, no shüwa-shüw shüjo ye küna dameje ujowa?”

¹⁹ Jisu i í che, “Ba nó hado uw chewwa? Djuje uw mowme, nūna a akasa uw bame, se ye Tawgyewme.

²⁰ Ba shotuko-kunu í bo danghušo: ‘Mim dju ġubuwe, djushiwe, djutsakšuwe, mūlaw-mūtraw djutruwe, nudzo awuñe nudzo añ naksü í chew dzüwe.’ ”

²¹ I che, “Nobo he ná vyew angasa ulvyu ladañe vewbame.”

²² He í dzüwe, “Jisu i ná che, bachi ge yaje ñu a ñilumme, bachi vyew ha duma ná draatsülyeñe sapse ná hatsüwe; sünda bá ñedzü ge luko pajome, sünda kakuñe nofum kasajo dawwe.”

²³ He í dzühulyeñe i šüpo duhu da, hado chemeje i šüpo nugo.

²⁴ Jisu i í holyeñe che, “Bo-luko duw na Tawgyew ichi ġadzü ge šüpo ataġa yo kamyofijobame.

²⁵ Tawgyew i ġadzü ge bo-luko duw na kamyajo í bo ut í sütrü üšü yo kamyow je ufojomabe.”

²⁶ Sünda dzühu daw na che, “Nameje djú basüafijowa?”

²⁷ I che, “Haye nūna yo madañima, se ye Tawgyew i dafijome.”

²⁸ Patras i che, “Howe, nobó ñe-vi je tralyeñe bafum kasawme.”

²⁹ I í che, “No bá umso truime, ana djuje ñime, dju Tawgyew í ġadzü ubo, ñe, mim-kiġi, ñu, awu-añ seyo saw-sam ná trahuw.

³⁰ Sünda sa yo sa a na haje aña djupawe; seyo dzüwñe druguw-drulyiw ge shüw lüshüw pajodawe.”

Dzüñe üshü lyajo go ñihow

³¹ Sünda Jisu na ġüyo ksü shürhaw ná üdra lañe ná che, “Ñi Yarusalem ge jingkoime, sünda küña ñu nūna üsaw ibo ñihow truw na ġi vedama, se na vyow datsüjome.

³² Hado chemeje i tuġuda-ġuvodzü nagzü ge djüjome, sünda na í tchügoñe-hoġojome, sünda zehu je müdrüdzajome.

³³ Sünda na í ġüjome, sünda shijome, sünda i ñegi dzü ye üshükülyetchojome.”

³⁴ Sünda na he ñu namko ye haje madzüsü sünda he ñu na namko ye müsütsü, sünda ha trudama se ye na madzüla.

Iñi ġew í iñi

³⁵ I Jeriko ñetrü ütrü üñisa jikulai sa a, iñi ġew a ye üdza ge tsatuġuñe ġyoda.

³⁶ Sünda i upu na dügrü jiw dzühuñe dzüpüñe, “Ayo a ha dangkoiya?”

³⁷ Na í tru, “Jisu i Nasri ge jingkoime.”

³⁸ Sündawñe i ġuksuñe che, “He Jisu, Dawud i üsaw, no nülvoijo dawwe.”

³⁹ Dju vro-vro jeima, na í madañda ġyo cheñe ze, sé i umsow šogzukülye, “He Dawud üsawa, no nülvoijo dawwe.”

⁴⁰ Sündawñe Jisu i gudzulyiñe í ichi ge lañe jikuwe che, sünda i iñisa jikuwñe, i í dzü,

⁴¹ Bá ha tsüda, “No babo daijome?” I che, “He Tawgyewa, nó hofidügyewe.”

⁴² Jisu i í che, “Hojodabe, ba veksüw ye ba dagyojemme.”

⁴³ Sünda í djeañe hohu; sünda Tawgyew í troñe, ufum kase, sünda vyow nūna na hohuñe, Tawgyew ibo trotsü.

19

Jisu Jakariya ichi ñe ge

¹ Jisu Jeriko ge jimyolye jimkoi sese.

² Süge Jakkai cheñe nūna duvo, i patso-law go mukyew sünda nügo je nügo.

³ I Jisu í hoġoñ vyew i djuma cheñe? Sešo upungda sese mahofi. Hado cheme i üchesada.

⁴ Sese i í hojoñe vye uvro ge gyo djeñe lufuje shoñ udru a ye lyilyig, hado cheme Jisu i se ġabo kajoda.

⁵ Sese Jisu se a jikuñe, udru ge hotrolyiñe í che, “He Jakkai, kutcho lyiga; hado cheme yow no bá ñe ge ġyojo dume”.

⁶ I kutcho yo lyigalye lüshüldzulalye í ichi ñe ge la kake.

⁷ He í hohulyebi nūna na zeġi, “I bó se lalo nūna ichi ñe ge jijebe.”

⁸ Jakkai i gudzuñe Tawgyew í che, “He Tawgyewwa, No nó bo-luko üchea ye ñiw ná djüjome, seyo üchea ye sena djüjome djuchi go no laġamüñeda ma se na no psüġingua fow djüpyojome.”

⁹ Sese Jisu i í che, “Yow he ñe a muchoahuw jikudame, sündada he i je Abraham ichi sawbamme.

¹⁰ Hado cheme nūna üsaw ye moadaw ná tchüw seyo ná basüaijo kakuwme.”

Bosün uvyu ġü

¹¹ Sese i he ñu ná dzümkoise, i zeġaw a ze, sündada chedawa i Yarusalem ütrüañ a duda, seyo i vyesüw je vyesüw, se Tawgyew ichi ġadzübraw ye hesahe kakudalaibiñe.

¹² Sünda: I che, “Nūna nugo a ye ge ñetrü üġa ge ka sügo nugo pafiñe kakutchofijo.

¹³ Seyo i í kulo naġi yo ġü ye balalye ná bosün uvyu ġü djü, seyo ná che, ‘No kakuw kuw bumdzu davojo dawwe.’

¹⁴ Sešo í ñetrü ge ġyodaw na í mahoġoñ daw, seyo ífum ge muko kiñe ñu che ki, se i ye no matsüme, se i ñidru ge ñubyu dañjo.”

¹⁵ “I ñubyu lyibiñe kakutchow sese, i ana a da, ichi se kulo ġü ye dju í bosün uvyu ġü djülyedama, se na itrü a balaku sünda danghujoñe vyeñe se na se i yo küña ha ha dashaladama.

¹⁶ Sese uvromashü yo a ye jiku che, He übrawwa bachi djüdaw bosün uvyu ġü yo dañe ġü müñew damñeladame.

¹⁷ I í che, ‘He kulo ülüksüfowwa, bá šüvzüw me, ba šüpyo mesame sese ba umsowda kakülyeda, ayo ba ñetrü ġü yo übraw dabei.’

¹⁸ Sefum yo a ye jikuñe che, ‘He übrawwa, hošoa, bachi bosün yo uvyu pom dashamüñewme.’

¹⁹ I í chetcho, ‘Ba je ñetrü pom yo übraw dabei.’

²⁰ Sefum ye a ye jikuñe chetcho, ‘He übrawwa, hošoa, bá bosün ye he duw ye, he í no nó gye ġüpaw üdza toi pyogoñe vyedaw he.

²¹ Hado chemeje no bá ġedabi.’

²² I í che, ‘Mauw kuloa, no bamdzu yo bá no trudañe chei he me.’ Ba nó danghuwbi nūna mügzütchüwñe, ha ye no ma vyema se í dzula, seyo se no ma zuw, se í djoahuwme;

²³ Ba nochi bo ye bo dashabraw ná hado madjüña, se í no kakuñe sashadaw ye lakeġijobi?

²⁴ Seyo dju nūna na üñisa gudzudama, se na í che, ‘Se bosün ye ichigo latchojodawe, seyo djuchi ge bosün ġü duma se í djüpyojo dawwe.’

²⁵ Na í che, ‘He übrawwa, ichi bosün ġü bó dušo.’

²⁶ ‘No bá chemkoime, se djuchi ge duma, í seyo djüpyojoluwe; seyo djuchi ñima ichi go se í je lajodawe se ichi ha dusama.

²⁷ Sešo nochi se fugulu ná se vyeñidaw na se no nadru ge ñubyu dame, se na age lakuñe noñisa a shiwe.’ ”

Jerusalem ge fojelübzüw kakuw

²⁸ Jisu i he ñu na chelye i Yarusalem ge navro-navro ka.

²⁹ Seyo se i Jetun üñiñi yo pu sa a Betfage ñe Betniyah üñisa ge jikuwñe, sese i í shürhaw naġi yo ksü ye ana cheñe ki,

³⁰ “Ŭñisa yo ñetrü ge jijo dawé, seyo süge jikubyo jikuḡyoñe giḡe ichi üsa a udru ge djusa je magyoluw, pyogo vyedaw bá pajome, se í tashalye lakuwe.

³¹ Seyo djudamje bá dzülaimeje, hado tashamkoiya chemeje, se a ana chejodase, se Tawgyew í he í tsüdame”

³² Se kidaw ná, na jikuñe i ná ha chesedama, süna pabadabi.

³³ Se na giḡe üsa ye tashamkoi se, ichi übraw ye ná dzü, “He üsasa ye hado tashamkoiya?”

³⁴ Na che, “Tawgyew í he í tsüdame.”

³⁵ Na í Jisu ichi ge la kaku seyo nudzoḡ gye ye tapualye se udru a ñeilye Jisu í giḡe udru ge gyodügye.

³⁶ Sünda na kamkoi sese, na nudzoḡ polu ye ḡabo toi ñevoñe ji.

³⁷ Seyo űñisa kakulye se i Jetun pu i ḡo ge kaku, sese shürhaw na vyew upua na vyemoñe chiḡa dadaw ibó i hohuda na, lüshüldzuañe gow yo ñu zeñe Tawgyew ibo trokülye:

³⁸ Šüvzüwme se ñubyu ye, dju Tawgyew iñiñi yo jikuma!

Sorgo ge ḡüdzüw seyo ñedzü ge lüshüwme!

³⁹ Sese upu na yo süña Farisi na í chengkoibi, “He Danghubrawwa, bá shürhaw ná zea.”

⁴⁰ I ná chetcho, “No djomko a chemkoime, he i maziw ḡyome, kunu na šogzukülyejome”.

Jerusalem íbo ksew

⁴¹ Se Jisu űñisa kakuñe se ñetrü í holye ubo kse.

⁴² Sündalye che, “Ha ye ujowa, he ba; am, ba bába, he ñeto ai lüshüjo ñu danghudama, séšo se i yabó bañisa yo mušuadabi.

⁴³ Hado cheme se ñeto ye badru ge kakujo se bá vyeñiw na sülyeñtchü pyogoñe bá djetuḡujome, seyo djetuḡulye bá ñujome.

⁴⁴ Seyo bá seyo badra ayo a ná bachi angasa ná, nogüdzü nadra gülyiajome, seyo badru ge kunu yo je kunu matrüjome; hado cheme ba süna dajo ye kye badru ge nülwov vyeñe hojema sei madanghuje”.

Ñegru í dagudrahuw

⁴⁵ Sese Jisu i ñegru ge drüñe ḡyodaw ná nopsü ge lahuatsü.

⁴⁶ Seyo ná che, “Ḡidame; ‘Nochi ñe ye küḡüw ñejome,’ séšo djo he í tsaḡa-laḡaw nachi ñe da joadamme.”

⁴⁷ Seyo i muhu-muhu ñegru ge shi-ñu truñgudru: seyo se müga sawlyiw na seyo shizew-ñu zew na vyew djekeḡiñe í shijoñe tumuñgudru.

⁴⁸ Séšo haje ḡabo matchüla; he í küna dañe dajojema, hado chemeje vyew na dru-lu djübyo djüḡoñe ichi ñu dzüñgudru.

20

Yahudi na Jisu í ñu dzüw

¹ Ahua ye ana a da, jisu i sese ñegru ge shi-ñu trumkoi sese, mügaw dew seyo shi zew-ñu zew kew nadra jikuñe sese gudzu.

² Seyo chemkoibi, “Ba ñí truwe, ba he chiḡa ná dju dadügyedañe dawdo daña, seyo se i djua, dju bá he i daweñe dügyedaye?”

³ I ná trutcho, “No je djó ñu a dzüjome; nó trujo dawé

⁴ Yohañ ichi Baptisma djüw ye Soḡgo go ma mo nuna yo ma?”

⁵ Sündawñe naḡütchü zeḡi, “Se ñí chebammeje, ‘Soḡgo gobabi,’ süñchewñe i chetchojo; ‘Sünameje djo idru ge hado umso mavyeña?”

⁶ Seyo ñi chetchojobi, ‘Nuna yo me chetchobamme,’ se vyew na ñidru ge kunu trüjobi, hado cheme i umsow go danghudabi, Yohañ i ñihow cheñe.”

⁷ Dañdañlye na tru, “Ñi madanghume, se i djuchi go jema.”

⁸ Seyo Jisu i ná che, “Nameje no je djo matrujome no he chi ná dju dügyeñe dadama.”

Bolu mau vi daw nüna i lağüşhi truw

⁹ Sese i se nüna ná he ana zeğaw go tru, “Nüna a ye anggur zugua, sündalye vi daw ná howeñe bo ve seyo şüpo uwalaw kuw utro ñetrü ge jitrükralye.

¹⁰ Bomdrü sese i vi daw nachí ge kulo a ki, se vi yo kakülyedaw anggur üje íbó je djüweñe cheñe k, sé vi daw na í gümoamdo gümoañe ufo kadügye.

¹¹ Sündawñe i kulo a ye kitcho, sé na se í je gütholyebi zeaşe zeameñe ügzü ufo kikutchó.

¹² Sündatchowñe i ülye dzü kitcho, seyo na se í je dzütchüzew gimoañe lahuag.

¹³ Sündawñe se anggur go vi übraw ye che, ‘No há dajobabya? No nó saw í kijobaba, asha na í chew dzüw dujojeşoma.’

¹⁴ Sese vi daw na i hohulyebi nağütchü poği, ‘He i bó üsaw ye ba; age djebya, ñi í shibow, sündañe he na ñichi lyajobi.’

¹⁵ Seyo na í se anggur vi yo lahuañe shiag: sündada vi übraw i nadra ha dajobabya?”

¹⁶ “I kakuñe se anggur vi daw nüna ná damütrajo, seyo vi ye utro ná djüjo.” He í dzühulye na che, “Tawgyewwa ana djuda.”

¹⁷ I nachí ge holye che, “Se he ye ha ġida: ‘Ha kunu ye ñe dasüw na ha madağiwñe süñeadama, Se i ukutru go dakrükye se i lyada.’

¹⁸ “Djudamje se kunu ge gaahima se i ganüajobamme, seyo djudru ge i gahima, se í ġünü-ğüğajobamme.”

Shi-ñu zekyew nañe Mügaw sawlyiw na lütsa

¹⁹ Seşügudo ye Shi-ñu zew nañe seyo Mügaw dew na í külyijoñe vye, hado cheme danghula dabi, i nabó magow ñu zeğaw yo tru, sešo í ná büğedañe vye.

²⁰ Seyo na í hokrübabiñe seyo ichi ge hotumuw ki, se hadowo cheme i alyamo alye ye shi-ñu trutroameje sese ñustu kigojoñe, se í nugo ichi ge trutroadame che djüfijoñe.

²¹ Na í ana dzü, “He dadrüwwa, ba mülaw truiñe ñi danghudame, Seyo dadrüw je darüi, Seyo djubó go goñeje mache; Semome Tawgyew ichi ġabo ye umsow trufijo.

²² Hawa ñi Kesar í patso djümeje ujoma, mo mowma?”

²³ I ná budzu yo dzüi ye dzüsülye che,

²⁴ “Bosüñ a nó shejo dawé. He a djuchi ġiğe düdama seyo dju ñiñ duma?” Na che, “Kesar ichi.”

²⁵ I ná chetcho, “Se Kesar ichimeje í djüwe, seyo Tawgyewchimeje í djüwe.”

²⁶ I nüna ñisa a se ñu ye madzüsüla, semome ichi ñu hutrodaw se i yo mavyenghuatsü.

Güdrakosküwñe gzü

²⁷ Sündatcholye Saduki i chew ye, nüna dzüw na kenghuañe maüşhüjome, naği yo nüna üchea na ichi ge jikuñe dzü.

²⁸ “He dadrüwwa, Musa i ñibó ana ġidawa, ‘Se djuchi damje üyalyo a ichi ufum ye saw-sam malaluye dzütrükralyemeje se üñuw ye se mim üyañedra i gzü datchowe, seyo üyalyo íbó agü mulo sakülyewe.’

²⁹ Sünda ye alyoñuw mro duw, üyalyo nugowfow ye agü je masakülyelubi ye dzütrükralye.

³⁰ Sefum yo ye je,

³¹ Seyo seladzü kiğiŵ ye je se mimdra í gzü daladabi. Se ana dadañe namro mamro agü masakülye dzümdzoaha.

³² Se nafum se mim ye je dzüase.

³³ Se a na üshükülyemeje se mim ye djufum lyijowa, hado chemeje i na mro mamro üdra gzü datsüwdabi.”

³⁴ Jisu i ná che, “He ñefo go shüdaw agü na gzü daibi,

³⁵ Se dju nüna damje ana lyifikülyemeje, sé ñeto go dzüdaw nüna na üshükülyetchojo lyifime, namko ai gzü madafijo.

³⁶ Se i dzü je madzüjo; hado cheme i sorgomuko vyeđujo, seyo güdrakoşksüw yo agü üshükülyemeje Tawgyew ichi je agü lyijo.

³⁷ Seşo he ñu ye dzüdaw na je üshütchoi, Musa je shoñ ge süna folakülyeda, i Tawgyew í ‘Abraham üsa, seyo Isahak üsa, seyo Yakub üsa ana chelyew.

³⁸ Tawgyew ye dzüw nachi mow seşo üshü nachi Tawgyew: hado chemeje ubo yo vyew na üshütsü.”

³⁹ Sese na se í dzühulye Shi-ñu zekew küña duma na che, “He dadrüwwa ba uw chejejeba.”

⁴⁰ Seyo bó na í ha madzülofibi.

Jisu Dawud üsawma mo Dawud ichi Tawgyew ma?

⁴¹ Sündatcholye Jisu ná dzütcho, “Masi í Dawud üsaw cheñe kündañe cheña?”

⁴² “Dawud i üsaw Masi i kako ge cheda:

‘Tawgyew i nochi Tawgyew í cheda,

Nochi südzüvopsügi ge gyowe,

⁴³ No bá fugulu ná bashitrü ai malakyeğitsülu kuw.’ ”

⁴⁴ “Dawud bó í Tawgyew chew; se sünameje i í üsaw künda cheña?”

Shi-ñu zekyew nüna zew madzüw ná Jisu í trüdrü

⁴⁵ Vyew na dzümkoï sese, i í shürhaw ná che.

⁴⁶ “Shi-ñu zekyew na yo hochigiwe, dju shedra psüw sheñe kahiŵ uw vewma, seyo ná bodzağ ge gaga daw, seyo küğüw ñegru ge psüga dew ge gyoyo uw vyejome.

⁴⁷ Na müjem nachi ge tsaw jiñe seyo bühodañe uwalaw kuw küğüw dawme, he na şüpyo mau ñe ge gajome.”

21

Haje ñiw müjem ichi umsow lapsü djüw

¹ Sündatcholye Jisu i ñni yo lapsü dzüw nüna na nudzoğ nudzoğ lapsü í lapsügyebyo ge trümkoï hohu.

² Seyo i haje ñiw müjem a ye je i sayo sa a bosüñ ksü trümyoajew hohu.

³ Sese i che, “No djó umsow chejome se i ye he haje ñiw müjem ye fow trümoabajeme.

⁴ Hado cheme nabó nachi nudzoğ nudzoğ lapsü yo me trüje, seşo i í shüda yo küña dusama vyew trümdzoajebi.”

Ñefo i mudzoajo go hosüw daw

⁵ Küña nüna na ñegru ufo go chemkoï ye, se i küña kunu howsa yo seyo gañ yo chibra daida, se i che,

⁶ “Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome.”

⁷ Na í dzütcho, “He dadrüwwa, he na kye dajowa? Seyo he ñu na dajobi sese, ha chi hosüw dujowa?”

⁸ I chetcho, “Chitchühivowe, dju dzüſeawe, hado chemeje ſüpyo nuna na nó ñiñi lañe chejome, no se ibamme; seyo he i damdrü kakudamme: djo se nafum djukasejo dawe.

⁹ Seyo djo psegi-lugi daw süna nafo go dzühulaimeje, dju gejo dawe; hado cheme he na uvromashü davzujowbamme; sešo se ñeto kutcho mamütrajome.” Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome, Süna ñeto je kakujome, sese he na he i ba hohui na, namko ye ha yo ha a kunu udru ge kunu je matrajome,

¹⁰ Sündawñe i ná che, “Gübye yo gübyeğütchü seyo ñetrü yo ñetrüğütchü pseğijome.

¹¹ Seyo ñeğüzüw je dew dew dajome, seyo ñetrü ñetrü sapseañe seyo gañemu kajome, seyo ñedzü ge ñiğeñiw ñu seyo dew dew chi shejome.

¹² Séšo he ñu na madaluye na uvro nó ñiñi yo kigovzujome, seyo maw-uw ze dajome, seyo ñegru ge djujome, seyo pache ge shujome, seyo ñetrü ge ñetrü ñubyu natrü ge lajikujome.

¹³ Se he na babó ñu truvomdrü kakülyejome.

¹⁴ Sündada nudzoğ nudzoğ drü-lu ge pyogo vyejo dawe, no vrogomdo trufijo se í duhu madadañe.

¹⁵ Hado cheme no bá ana chejo seyo ana budzu djujome, se bá mau zeñe zeaşe zeame dai na madafijo.

¹⁶ Seyo bachi awu-añ seyo ñuw-ñum seyo ñeşüğ-ñepyeğ, seyo draw na je tsüladügyejobamme; aña kuw dajome, djomkoye şüpo na dzüdügyejome.

¹⁷ Seyo no ñiñi yo badra mau dajome.

¹⁸ Séšo bakyetrü umu a je matrüafijome.

¹⁹ Ba nudzoğ drü-lu ye güdzüw yo şütrüñe vyejo dawe.

Jerusalem í mütrüw

²⁰ “Ba kyedamje Yarusalem í rhünokew na yo jiğshiğiahuw hohume, sese ichi mütrüjo üñisabammeñe danghujo dawe.

²¹ Sese dju Yahudiya ñetrü ge duma se na pu udru ge djetralyewe, seyo dju Jerusalem ulung ge duma se na djehuaajo dawe; seyo dju ñetrü ge duma se na süge djujijo dawe.

²² Hado che se i dutruğijo ana ñeto kujome, sese ñu giñe vyelyedaw na vyew lyitsüjobamme.

²³ Se ñeto ge dju agü ñiw seyo agü apu tudügyeima, se nabó tui! Hado cheme se ñeto ge no nağütchü dağijo seyo se a ná şüpyo ñiku-ñisüw lyijo.

²⁴ Na vyetsü ürhü yo süğüajome, seyo vyew ñetrü drü-drü ge mubyo na lakuzeğatsujome, seyo utro sama nachi ümdrü vyew makulu kuw, sese Yarusalem í utro sama yo dashiğiajome.

Jisu i kakutchojo chitruw daw

²⁵ “Seyo dru seyo hubye seyo lütsü se na ge chi shejome, seyo nomñew ñetrü a je, ñetrü drü-drü go nuna ná chitruw dajome; hado cheme na sütüğülü ichi hu rhaw yo lamo getsujome.

²⁶ Seyo geşw yo druguw-drulyiw a trüw kakujo se í hohuñe nuna üşhüjoñe je mavyejome, hado cheme ñedzü go gokew ye je güdü-güdüjome.

²⁷ Sese na nuna üsa í lüshüw-lübaw mumudrü ge gow kalai hohujome.

²⁸ He ñu ye trumkoi sese, ükye ye gudow dañe udru ge hotrojo dase; hado cheme bá solutoajo üñisame.”

Tawgyew ichi ñetrü ñubyu üñisabamme

²⁹ I ná zeğaw je a tru, “Lufuje üyaññe vyew shoñ na howe.

³⁰ Ichi übatra kakülyebyo kalyeğyowñe, se í ba hohulyeñe balvyo danghulaibi ñeshü kalaibiñe.

³¹ Sünambó vyeduw ba he ñu na kye hohuima, sese danhulababise Tawgyew i ñetrüğüfo kakujo üñisababiñe.

³² No bá umsow trujome, he ġhei ñu na madalu kuw he ñefo ayo shüdo nuna na kyeje lüshüw mapajome.

³³ Ñedzüñe No naksü kaltruğidamje, sešo nochi ñu kye je makatrujome.”

Shüwa Dashütrüvojo dawé

³⁴ “Sündada ufu je ksü üñi je ksü da ġyowe, ya ba badrü balu ye he druguw drulyiw ayo dashüw ge daśea kiśeañe, shüjo djojo ge vyeśeañe da ġyomkoñbai ye jia, ñe se badru ge kyegüdü-ñiği kakugme.

³⁵ Hado chemeje i he añawa nomñew ñetrü ayo ġyodo nachi ge ana vyeduw dañe kakujobabi.

³⁶ Sündada chiğiñgudrujo dawé seyo küğüñgudrujo dawé, he ana a kyegüdü-ñiği kakudamje ha madaw ġaksüfisejoñe, seyo nuna üsaw i vro a gudzufiwjo lyijo dawé.”

³⁷ Seyo se ñeto ge ñegru ge shi-ñu tru süna dawse; Seyo ñegi ge i nopsü ge jihuañe Jetun pudru ge ġyoñgudru.

³⁸ Seyo na je süzüw ye tralye ichi ge jikuñe shi-ñu truw ye dzüjoñe ñegru ge jikuñgudru.

22

Jisu i shijo go küla

¹ Odje oğüme se i na ofo rhano chew, üñisa dabi.

² Seyo mügaw dew nañe shi-ñu zew naksü shüwa í kundañe shijoma se í kadang hotumu, sé na nuna nayo ġew.

Yahuda Isküriya ichi umsokulyu

³ Seyo mütü Yahuda ge kamyoa, djú Iskariyoti chew sünda í shürhaw ülgü ġü yo ksü namko ge i je duw.

⁴ I jiñe Mügaw dew ñe kulow kyew hotumuw nadra chitru, Tawgyew í kunda lügyelajoma sena.

⁵ Na lüshülag, Seyo í na bo djüjome cheñe müdaa.

⁶ I je embi che, sündalye hotuma-hotumuhi, se í usso ge ñu majodügyew lügyeladügyejoñe.

Fasa í dashütrüw

⁷ Sese odje oğüme daw ñeto kakudabi, sese Fasa ge fugulu üsa ye che küğüw kijobabi.

⁸ Sünda Jisu i Patrasñe Yohañ naksü i ana cheñe ki, “Djeñe ñibó Fasa ge tsajotujo dashütrüvowe.”

⁹ I í dzütcho, “Ba nó hange dashütrüvoweñe tsüda?”

¹⁰ I ná che, “Howe, ñetrü ge kaakubyo-kakuğyowñe nuna a ye hu guw kolo lodow tüvajome, dju ñe ge i jihima; ba ifum jisajo dawé,

¹¹ Seyo sé ñe go übraw í chewe, ‘Dadrüwwa bá chemkoime; se tumóna ná ñe hagewa sa a no nó shürhaw nadra Fasa tsajo ye?”

¹² Bá i howsa yo dagüdravodaw üğüñ dew a shejome; süge dashütrüvowe.”

¹³ I jikubanda, i küna chedama sünaabyo-sünağyo duvobi, sünda i Fasa í dashütrüvo.

Tawgyewchi mülüñ drüpsü

¹⁴ Damdrü kuwñe, Jisuñe i shürhaw na nadra tsajobiñe ġyo.

¹⁵ Sündalye i ná che, “No nolu ge šüpyo ana vyewme, duhu makakulu kuw djodra ye ülya ana üša gyoñe ava tsajoñe vyewme.

¹⁶ Hado cheme no djó chemkoime, he i Tawgyew ichi nogo ge vyew makulu kuw no se í keje matsajome.”

¹⁷ Sese i bekasa lañe dru-lu yo šüvzüw gañe che, “He í lalyeñe djoğütchü ge habrağijo dawé.

¹⁸ Hado cheme je no djó chemkoime, Tawgyew ichi gádzü madalu kuw no ayo dalalye keje he shejehu matujome.”

¹⁹ Sündatcholye i odje la, seyo üdrü-ulu yo küğüñe takuğia, seyo ná ana cheñe djü, “He i nó usso me, ha yé djobo djüwma: nó vyehuñe he ana dajo dase.”

²⁰ He ana dambo i tsaw tsafialye bekasa je ana cheñe la, “He i nochi sé šü yeme he i djobó fuadaw yeme ñu ükünüme.

²¹ Sé hojo dawé, nó kigoladügyejo ichi ügzü ye nodra a dume.

²² Hado chemeje nüna üsaw ye bó ibo küna dawéñe dadama, sünambó dajobabi, séšo tui se nüna idru ge, djubó sa a í kigoladügyejoma!”

²³ Sündawñe na nağütchü dzügi-hoğingkoibi, “Ñimko a djuwa, he chiğa dajo ye?”

Djú dewñe vyefijowa?

²⁴ Namko a ana ñu che zeği; ñimko a dju dew vyefijowa?

²⁵ I ná che, “Utro sama nago nugo na nadru ge shotuko joi; seyo dju nadru ge shotuko jofijo daima, se ná povow nüna chewme.

²⁶ Séšo ba ana djulyiwe; mowme djomko a dju nugow dama, se i angasa vyeduw seyo dju ye ñubyu ma se i kulo vyeduw lyiwe.”

²⁷ Hado cheme dyew ye djuwa; se i buğo ge gyodaw yeme, semome se chiğa damkoi yema? Hawa se i je mowma se tsawdra gyodaw ye? Séšo no djodra a kulo vyeduw bame.

²⁸ “Sešo djo se na me, dju nodra ñiku-ñisüw ge je nodra duwsaw na me;

²⁹ Seyo sünambo vyeduw nochi Awu i nóbó ñetrü ükün a davyedama, sünambo no je djobó davyejome.

³⁰ Se i ye hadowo cheme djo nodra nó buğotrü ge tsawe-tuweñe; se psüğa a gyoñe Israyel nachi go gübye güyoksü í zegüdralawe.

Patras i hujonoğyow ñihohuw

³¹ “Simon, oi Simon, djó mütü ye prüdame pu í dambo güjoñe.

³² Séšo no djóbó küğüwme, djódrü-djolu go umsowñe vyedaw ye kyeje mañoajo seyo djo kakume djó nudzoğ alyo-ñuw na je güdükewe.”

³³ I í che, “He Tawgyewwa, no badra pache ge damje kasejo semome dzüjoje dzüfijobame.”

³⁴ I che, “Oi Patras no bá chemkoime, yow jo külyiwñe sese ba nó ülye dzü mahosüw chejome.”

Duhu gijo ye dashütrüvowe

³⁵ Seyo i í che, “Bá no dzulngasa seyo kapüğa seyo shita je ñiw ufobüla kimkoi ge ba hama a mapu mavyew dadama?” I chetcho, “Ha chi go mowme.”

³⁶ I í che, “Séšo djuchige dzulngasa duma se na se i lawe, seyo sünambo kapüğa í je, seyo djuchi ge kyeği ñima ná nachi gye na damje drütülälye lawe.

³⁷ Hado cheme no djó chemkoime, he gido ye, ‘Se i truw nüna ge ngüjobamme,’ se i nódrü ge dajoye krükrüwbamme; hado chemeje nogru ge küna dajoñe dadama se na datsüjobamme.”

³⁸ Na che, “He Tawgyewwa, howe, he a kyeği ksü duwa.” I ná chetcho, “Šüpyo dume.”

Jetun pudru ge Jisu i kügüw

³⁹ Sese na ñepsü ge jihuañe na dadaw basha yo na ge Jetun pudru ge jitsü, seyo shürhaw na nafum jisa.

⁴⁰ Süge jikuñe i ná che, “Kügüjo dawé, djo zeğaw ge magajoñe.”

⁴¹ Seyo i na yo utroga kunusa a josajombuaña ge jiñe, seyo üshipyu dugoñe kügümyomkoibi.

⁴² “He Awua ba tsübameje he bekasa ye notrü yo latrülyewe, sedamje nó husü yo mow bá husü yé dadzowe.”

⁴³ Sese soğgo go sorgomuko a í sa yo sa a hohu dju í zego dawma.

⁴⁴ Seyo babiye i şüpyo vyemülüañe vyemoañe kügükülyejebi; seyo ichi úfu ye no ge şü fuw vyeduw tra tra dzuamkoi.

⁴⁵ Sese i kügüfialye gudzulye ichi shürhaw nachi ge kakuñe hoholye vyew na drumutsüdaw hoñe duhu da.

⁴⁶ Sündalye i ná che, “Hado drumuiya? Pülyibya, kügübya, na zeğow ge magajoñe.”

Jisu í tsülaw

⁴⁷ Jisu i süna chemkoi sese, howe upu a djelai ná, seyo se gü yo ksü namko a ye dju ñiñi ye Yahuda chewma i uvro uvro djekelaibi, i Jisutrü ge djeku, í bubu dajoñe.

⁴⁸ Sé Jisu i í che, “Oi Yahuda, hawa ba bubu dañe nüna üsaw í kigo-ladügyejoma?”

⁴⁹ İdra yo na idra ha dajoma í hohuwñe, sünda che, “He Tawgyewwa, ñi keği dzofijoma?”

⁵⁰ Seyo namko ayo a ye müğaw dew ichi kulo nadru ge keği yo dzohiñe ufu fuvo go dzoga.

⁵¹ Sé Jisu i che, “Sayo sa a damudoabe.” Seyo sa a ichi ufu ye kiñe dagyoi.

⁵² Sese Jisu i müğaw dafow na seyo ñegru ge hokrüvw go mükyefow na seyo kew se na idru ge lyikülyedaw ná che, “Hawa djo nó ñiguduñe danghuñe keği ñe shalbo ñe lañe jikuma?”

⁵³ No djodra ñegru ge muhu-muhu djodra duw sa je sesüge djo nó gzü a je maki; sé hesahe djochi ümdrübamme, vatağüsagiahuw yo vatağüsagiahuwme.”

Patras ichi hujonoğyow

⁵⁴ Sündatcholye í na tsülalye la kakye, seyo müğaw dafow saw-lyiw ichi ñe ge lañe kaku seyo se Patras i üğa-üğa djega djegañe ifum-ifum djese.

⁵⁵ Seyo na nopsü ge mi pyeñe tchü üşa gyomkoi sese Patras je namko a gyoa.

⁵⁶ Seyo se a kulom a ye í mi müsaw ge gyokülyedaw hohulye seyo í usu yo hopafi hopañe chemkoibi “He i je üdra yo baba.”

⁵⁷ Séşo i ana che hujonoğyow, “O mimya, no í madanghuwe.”

⁵⁸ Me uwalatchowñe utro a ye hotcholye chetcho, “Ba je nadra yo baba se.” Patras i che, “Oi nüna, no mowhoje.”

⁵⁹ Me uwalatchowñe nüna a ye dügago hoñe chengkotchoibi, “He i je nadrayobabişa; umsow cheme he i Galilibabi.”

⁶⁰ Sé Patras i che, “Oi nüna, no madanghuwa ba cheijema.” I süna chemkoi sese jo je külyijebi.

⁶¹ Sündawñe Tawgyew i tcholtruğiañe Patraschi ge ho, sündawñe Patras i Tawgyew i ñu chedo ye vyehu i ha chedama, “Yow jo makülyilu uvro ge ba nó ülye dzü kuw madanghuw cheñe hujonoğyoajome.”

⁶² Seyo i ñepsü ge kahualye şüpyo ku ku kuw kse.

Jisu i mülakulyuw

⁶³ Dju nüna ye Jisu í kigo dama, na í mülakulyuñe gümyomkoibi;

⁶⁴ Seyo ichi iñi ye pyelyeñe í dzü, “Ñiholye trubya bá dju güima.”

⁶⁵ Seyo ana şüpyo nomñew zeaşe-zeameñe í maw-uw ze.

Kyew nañe seyo melye dew gzu

⁶⁶ Ñetoahuwñe naği yo kyew seyo müga dew shi-ñu zekyew-kikyew se na vyew keğitsü, sündalye í na melye dew gudo ge lakuñe chi dzü,

⁶⁷ “Sünameje ba Masimeje, ñí trujo dawel!” I ná che, “No djó trumsome djo nó umsow mavvejome.

⁶⁸ Seyo dzüdamje, matrufijome.

⁶⁹ Sešo ayo dalalye nuna üsa no sawlyiw Tawgyew ichi upo südzügo gow dañe gyongudrujobi.”

⁷⁰ Süñchewñe vyew na chetsü, “Sünameje ba Tawgyew üsawma?” I ná che, “Djo cheñşoiwa, hado chemeje nobabi.”

⁷¹ Sese na che, “Yabó no truvojioje ha matsübi; hado cheme no bó nobyo no dzühuladabi.”

23

Pilatus i Jisu í ñu dzüw

¹ Sese vyew keğidaw nuna na gudzutsüñe Jisu í Pilatus ichi ge la jiku.

² Sündalye na ana cheñe ídruge külü jo, “Ñí i nuna ná zeğow seyo Kesar í patso i madadügyew seyo nudzo í Masi seyo nugomeñe chew dzühudame.”

³ Pilatus í dzü, “Ba hawa Yahudi nago nugoma?” I í tru, “Sebó ba cheşoiwa.”

⁴ Süñchewñe Pilatus i mügaw saw-lyiw nañe se nuna ná che, “No he nuna idru ge ha je külü mahohume.”

⁵ Séšo nabó süñchewñe seyoje şüpyo mügzüw yo chemkoibi, “He i Galili yo dalalye age kuw Yahudiya ná vyew shi-ñu tru truñe truğolatsüdame.”

⁶ Süna dzühulye Pilatus i dzü, “Hawa he nuna ye Galili ñetrü goma?”

⁷ Seyo he í danghula i Herodes ichi shotuko ulungo nuna dabi, í Herodes itrü ge kitcho, hadowo cheme sé ñeto ge i je Yarusalem ge duvo.

Jisu í Herodes ichi ge kiw

⁸ Herodes Jisu í hohulye şüpyo lüshü, hadowo cheme şüpyo uwalaw gomdo í hoğoniw vye: se i ye hadowo cheme ifogo dzühuda, seyo ichi chi ashama asha ye sheweñe ve.

⁹ I í şüpyo ha ha ñu dzü, se i í ha je matru.

¹⁰ Seyo se müga saw-lyiwñe shi-ñu zekyew naksü ulung ulung ge í ze.

¹¹ Sese Herodes i ichi nuna nadra ye í zeaşe-zeameñe zekütso zemürhü, seyo iği ğiguw gye ye sheisalye ge Pilatus ichi ge kitülütcho.

¹² Sehu ñeto yo Pilatusñe Herodes naksü üdraw lya. Ana madalu. Sevro ge naksü mahoğiw.

Pilatus i Jisu í shiweñe düm takyoo

¹³ Pilatus i mügaw saw-lyiw í seyo nuna na balañe ná che,

¹⁴ “Djo he nuna í nuna ná zeğoime cheñe nochi ge lakuda, seyo holaşoa, no djó how a í dzü howşobi, se djo ha ñu yo iso ge külü joima, se ñu yobó no hasaje ichige külü mahohu;

¹⁵ Ge Herodes je mowbi, hado cheme i í nochi ge djültrutchodabi: seyo holaşoa, i düm takyolaje shimdojo ana haje mada.

¹⁶ Sündada no í shidzü trabañebi”

¹⁷ Pilatus i rhanomko a nuna a tsüla vyedaw ye kihuajobabiñe lya.

¹⁸ Sündawñe vyew na şogzutsü, “I damtrüabei, seyo ibó Barabba i trajodawe.”

¹⁹ I ñetrü a ye pseği-luğiñe, shiw-law dadaw ubo go pache ge shüñe vew.

²⁰ Sešo Pilatus i Jisu í trajoñe vyeñe nuna ná che hopüñetcho.

21 Sešo nabó šogzuñe che, “Í kuros ge külyiwe, kuros ge!”

22 I ülye dzü kuw ná che, “Hado cheme i ha mau damdoda? Nobó í düm takyoñe shimdojo lalo daw mahohubei! Sündada no í gidüñe trabañebya.”

23 Sešo na šogzu-šogzuñe zetsü, í kuros ge külyimdowne, sünda ná šozuw ye foajebi.

24 Ha madanghulye: Pilatus i dügyeaha, na ha cheima sei dzülye dawwe cheñe.

25 Seyo i se nuna vyesvye-vyemdolalye nuna shido í pache ge shüdaw ye, seyo djú í prüwma í trase; seyo Jisu í na nalu ge ha vyedama süna vyew apyew kuw djüki.

Jisu í kuros ge külyiw

26 Na í lañe kakemkoi sese, Simon cheñe Kureni a ye ñetrü go kanglai sa a, í kigo lalye shokru giñe Jisuchi ge lakuñe ifum ifum la kake.

27 Seyo nuna ye gumtchubabiñe ifum ifum kase: seyo šüpo upu mim na je, dju íbó üldjetchü gü gü kseñe ksekuñiladjew.

28 Jisu i nachi ge tcholtruñialye che, “He Yarusalem ayo sam nawa, nóbo djuksejoda; sešo djo josa seyo djó nudzoñbó ksejoda.

29 Hadowo cheme se ñeto kakujome, seyosa a nuna na chejome, ‘Šüvzüwme se na dju ügübzümma, seyo dju saw-sam masakülyema seyo dju agü apu manuma.’

30 Se ümdrü ge

‘Na pu naje chejome, ñidru ge gaabe,

Seyo noñüfo yo ñi muñuiwe.’

31 “Hado cheme na shoñ djüw nadra ana damkoibi ye, krow nadra küna ha dañjema?”

32 Na seyo nuna ksü ije lalo datruw go idra ye shijoñe la jikye.

33 Na se Kopri che Noñüfo ye jikuwñe, na sayo sa a í seyo se lalo datrudo ksü ye je, a ye ichi südzü go seyo a ye ichi fuvogo ge süna kuros ge külyiñe vye.

34 Sündawñe Jisu i che, “He Awuwa, ná muchoaiwe, hadowo cheme he na madanghume na ha dangkoima?” Sünda na kako ge ñi veñe i gye í habraña lastü.

35 Nuna na gudzu-gudzu hoñyo, seyo nugo na je zeañe-zeameñe ze ñyo, “Í utro na ñaksülaw, i Tawgyew ichi Masimeje, seyo ichi dzulawmeje, nudzoñ ñaksülawo dawwe.”

36 Rhünokyew naje í trow uhu ye í nuñe zeañe-zeameñe che.

37 “Senameje ba Yahudi nachi go nugomeje, ba bá nudzoñ í ñaksülawabya!”

38 Seyo idru ge truw a chedalubi; “He i Yahudi na go nugome.”

Shokru ge dru-lu vyeñüdolaw lalobraw

39 Ha lalobraw ye shokru ge külyi suntchadama, namko a yo a ye í zebze-zeñeñe che, “Hawa ba Masi moma? Sünameje ba balvyo ñaksüñe seyo ñiksü i je ñaksüila!”

40 Sünchewñe utro a ye í zeñe che, “Hawa ba Tawgyew í je mañewbama? Ba je süna pabaibi,

41 Seyo ñiksü bó shotukobasha yo pangkobabi, hadowe cheme ñibó ñi chiña ha dadama süna shishü pangkobi; sešo i haje mau chiña mada.”

42 Sese i che, “He Jisua, ba bá ñetrü kakuwñe nó je dju koñoawe.”

43 I í che, “No bá umsow chemkoime yow yo ba nodra sorgo nogo ge dujome.”

Jisu i lutukyohuw

44 Seyo muhumdzu yo dalalye me apyew djüduwai kuw ye vyew ñetrü na nukuñuatsüdabi,

⁴⁵ Seyo dru müsaw yebó je kañoahibi, seyo ñegru go gyeña bó je ulumko toñe-meñe yo gağaajebi,

⁴⁶ Seyo Jisu í šüpyo gow yo šogzuñe che, “He Awuwwa, no nó ĝulo ye bagzü ge trahime.” Seyo í süna chelye ulvyu sese lutukyoaha.

⁴⁷ Ğyokrüw nüna ye sa a ha dadama se na holye i Tawgyew í tro, sündalye che, “He nüna ye güdraşobi.”

⁴⁸ Seyo upu na he í hojoñe keğitsüdaw na, he šoboşulyw dadaw í holyeñe nalüjetchü ge güñe kalütrü.

⁴⁹ Seyo ichi hosüw-holüw küña duma vyew, seyo mim na je dju dju idra Galili go jikusedama vyew, üğa ge gudzuñe se na ho ĝyo.

Yusuf i Jisu í iyo ĝuahuw Arimitiya go nolu ge

⁵⁰ Seyo süge, Yusuf cheñe yo nüna a ye se rhano dew ge du, dju ye uw seyo chi danghuw muhu.

⁵¹ Seyo ichi vyéw seyo ichi chiğa daw yo malüşhüw; seyo i Yahudi na ñetrü go Arimitiya ge ĝyow seyo Tawgyew ichi nogo ye ĝyokrüw nüna.

⁵² I Pilatus ichi ge jiñe Jisu ichi ñimo ye prü,

⁵³ Seyo í lagaalye gylüdü yo daw gyeña ge vaşüñi, seyo nuĝu a ye vye, se i ye kunu ge chido süna; seyo süge keje dju je mavyewlu.

⁵⁴ Se i ye dashüwtrüw ñeto, seyo ĝyogow rhano damivrojo ümdrü ge.

⁵⁵ Seyo se mim na dju idra Galili go jikusedama, ifum, ifum jiñe se nuĝu ye ho seyo uso je ho í daw basha yo da vyedaşomañe.

⁵⁶ Seyo kakultruñe šowsa chi seyo šonuw dashütrü; seyo ĝyogow ñeto ge bó i je daw basha yo ĝyogo.

24

Jisu í üshükülyew

¹ Sopta uvro ge, sağa-müğa na nuĝu ge šowsa šow gañ-miği lañe jiku.

² Sünda na kunu í ĝühuadaw hohu.

³ Sünda ulung ge jemyongkoi ge, na Prabu Jisu usso mahohubi.

⁴ I he ñu yo mavenghuañe ĝyoñbaiye, muhu ksü ye lütsü-lütsüw gye sheñe ütrü iñisa ge gudzu.

⁵ I ĝeñe, sünda nodo ge ukrumro i pelye; sündawñe i í che, “Ba üshü í dzüw namko ye hado tchüwwa.

⁶ I ayo a ñimme, séšo üshükülyedamme. I djo Galili ge ha trudama vehujodawe.

⁷ ‘Umsogo je nüna üsa í lalobraw nagzü ge kigo ladügyejobamme, sünda kuros ge tükegojome, sünda ñegi dzü ye üshükülyetchojome.’ ”

⁸ Sünda i í ñu í vehuag,

⁹ Sünda nuĝu go kangkoi ye i se ĝüyo a ná, sünda utro naje, he vyow ñu ná truzeğatsü.

¹⁰ Dju he ñu í shürhaw ná trudama, se na Mariam Magdalini seyo Yoana, seyo Yakub üyañ Mariyam sünda nadra ye utro mim naje duw.

¹¹ Séšo na ñu trudaw ye ná shipyew truw veduw velada sünda na ná umso mave.

¹² Sündawñe Patras i gudzulyiñe nuĝu ge gyo dje, sünda gye ufobüla hohubadabi, sünda hadadama, se yo mavenghulyaha, í nudzo ñe ge kaltrutcho.

Imawus ĝabo ge shürháw na how

¹³ Sehu namko ye nüna ksü ye Imawus cheñe ñetrü ge jiinnngkoi, Yarusalem yo kilo mitar mro kuw üğa.

¹⁴ Sünda naksü se vyow ñu ná, hadadama se na naksüğütrü chitruñe ji.

¹⁵ Sündä naksü se ñu na naksügütchü ge truğiñe dzüğiñe jingkoi ye, Jisu i ñisa jikuñe naksü üdra jisa.

¹⁶ Séso nañi ye ana veduw mütrüdaw ye í mahosülafe.

¹⁷ Jisu i ná dzü, “He ha ñuwa, djoksügütchü ge truñe jiiye.” I duhu dañe gûdzu.

¹⁸ He í dzühulyeñe, namko ye Kilyupas ñetrü go nûna a ye che, “Haña ba Yarusalem go ba akasa tüvaw jiw nûnabamma, dju he ñeto ge hadadama se na se i madanghu.”

¹⁹ I í dzü, “Ha ñu ye wa?” Na í che, “Nazret go Jisu ibo dju Tawgyew seyo nûna nabo chiğa dawma sündä shi-ñu truw go ñihow truw.

²⁰ Sündä mügaw kew na seyo ñi dümbraw dakyew na í kigoladügyeñe, shibeñe dügyeaha; sündä kuros ge sümtchadügye.

²¹ Séso ñi vyeksüwso, i Israyel í mutchoaïjo che, sündä he ñu na tralye, he soboşulyuw dajew ye ñeği dzü kujebi.

²² Sündä jimko ye je mim üchea na ñi mavenghuadügyeda, dju sağa-müga nuğu ge jidama na.

²³ Sé usso í mahohuwñe, sorgomuko nadra í üshüdame cheñe ñu truw che djekuda.

²⁴ Sündawñe ñimko yo a ye nuğu ge how ji, sündä mim na küna trudama, süna tchülada; séso í mahohu.”

²⁵ Sündawñe Jisu i ná che, “O madzühoave dañe gyodaw nawa, seyo ñihow truw ná ñu ge üdrü-ulu yo umso dzüngahu nawa!

²⁶ Ana dajo mowma, Masi i duhu gilañe nudzo lüshüw ge kalyitralyejo?”

²⁷ Sündä í ná ibo go kako ge ha gidama se ye Musa ichi yo dalalyeñe vyow ñihow truw nachi ge gidaw na, i ná danghudügye.

²⁸ Aña sa a na hange jingkoima, se ñetrü jikujebi, sündä í dawyo na ana danghuda, i ayoje uvro ge jijolu cheñe.

²⁹ Sé na í ana cheñe gokrüdügye, “Ñidra gyosajodawe; hado chemeje djüdu lyañe aña uwaladabi.” Sündä i ulung ge nadra gyosaw kamyoa.

³⁰ I nadra ava tsajoñe gyosangkoi ye, i odje í lañe gagüzü djü, seyo í takuğiañe ná djü.

³¹ Sündawñe nañi hojükyeñe í hosülag, sündä na ñi how yo müşü.

³² Na nağütchü ge che, “Ñidrü-ñilvyu ge mi madzoma, i ñi gabo ge kako ge gidaw ná truñe jomkooi ge?”

³³ I sa yo sa a gudzülyiñe Yarusalem ge katrükralye, sündä i se güyo a seyo nadra a yo na üşaka ye kegidaw hohu.

³⁴ Na che, “Tawgyew umsogo je üşükülyetchoda, sündä Simon i hohu.”

³⁵ Sündawñe i ná gabo ge chitru jidaw na ná tru seyo he je tru, i ná kündañe odje í takuğiañe tsadama.

Jisu i í nudzo shürhaw nadra

³⁶ Na he ñu í trumkoi ye, Jisu í husü yo namko ye gudzükye; sündä ná che, “Djo gûdzüw pawe.”

³⁷ Séso na mavenghuatsüg, seyo geatsüg, sündañe na velatsü, ñi mütü hohungkoi.

³⁸ I ná che, “Hado mavenghuatsüña? Sündä djulvyu ge hado mavenutsüña?

³⁹ No gzü seyo noshi na howe, no sebamme; no kiñe hojodawe; hado chemeje ñeğulo nachi uso üğübye ñijo nochi ge hohumbo.”

⁴⁰ Ana chelyeñe ná i ichi ügzü ishi na she.

⁴¹ Ná lüshüw yo seyo umsojemañe veñe, seyo lümashü ve, sündawñe i ná dzü, “Haña djochi ge ava duma?”

⁴² Na í psekwrow tchükro üsüla a djü.

⁴³ I lañe na how sa a tsag.

⁴⁴ Sünda i ná che, “He na no ñu name, no djodra g̃yosañe truwme, Musa í shotuko ge seyo ñihow truw kuw na seyo kako ge nobo go g̃idaw na umso kaküleyjome.”

⁴⁵ Sünda i na ükye-ümüñi í güdraw ñu g̃idaw dzüsüdügyejoñe voiha.

⁴⁶ Sünda ná che, “Ana g̃idame Masi duhu gilañe seyo ñegi dzü ye dzüñe üshükülyetchojome,

⁴⁷ Sünda Yarusalem yo dalalyeñe vyow g̃übye geg vetrüw seyo lalo daw na iñiñ yo lañe truzegeiatsüjo.

⁴⁸ Djo he ñu na hohusawme.

⁴⁹ Sünda djuchi trašüga no awu i dadama, se ná no djo lakülyaijome sünda udru go gow mapamdolu, süña kuw djo he ñetrü ge g̃yokrüjo dawé.”

Jisu í ñedzü ge katcho

⁵⁰ Sünda i ná Betniyah kuw ñepse lañe jekülyasa, sünda ügzü i lañe ná gağüzü djü;

⁵¹ Sünda ná gağüzü djüshüñe i na yo utro lya seyo ñedzü ge kalyitrallye.

⁵² Sünda na mraañe í šüpo lüshüw yo Yarusalem ge katrükralye.

⁵³ Sünda ná ñegru mamuduw kegiñe Tawgyew í troñe seyo gağüzüwe.

Philemon iñiñ güdraw Polus üsam

Ĝiw

He kako í ĝiw braw ye Polusme. He kako ha a Polus i Filemon í i Unesimus i ichi ge kitchojomeñe che sünda Kulu 4:9 ge Unesimus i Tukikus üddra Kulusse ge jimkoi sese Tulukus i Filemon i Polus ichi kako i djü. He ye šüvzüw ñume Polus i he kako i nudzo ügzü yo ĝidaw ichi gō vyow na shetsüjoñe.

Ĝiw übraw ichi dzaga

Oje 60 kuw.

Filemon í he kako ĝingkoi ñeto ge Polus i Rom go pache ge shü veda.

Lajovo

Paulus i he kako ye Filemon í ĝida, Arkippus í girja ñe ge sünda ñi ñum Apphia í. Kako ĝidaw í holyeñe vemeje he kako ye Filemon í ĝibadabi.

Ha ma a vew

He kako í ĝiw ge Polus i Unesimus í i übraw ye ichi ge lakutchoweñe ve ĝidame (Unesimus ye Filemon ichi kulo tsaksulalye kaksudaw ye) sünda í sojai djudjüwe. (10-12, 17). Sünda sesüyo, Polus i Filemon í kulo veduw mowdaye “nudzo uñuw” veduw veweñe veda. (15-16). Unesimus i yaje Filemon ichi bo-luko ubo go lubi seyo Polus i ubo ĝabo davoĝoñ ve hado chemeje Filemon í lajovowene veñe. Polus i shi-ñu truw ubo sa Unesimus i Tawgyew í ĝaksüla. (File. 10).

Ñustu gow

Kahuahuw.

Udrüla

1. Abiwadan ___ 1:1-3

2. Abarokti ___ 1:4-7

Unesimus ubo ñu chegüdraĝiw ki ___ 1:8-22

Damdzualai shi-ñu ___ 1:23-25

Dašüvzüw

¹ Polus ichi go bó, se Jisu Masi ichi pache ge shüdáw nuna, seyo ñuw Timotiyus ichi ve go ñichi nülvo chiĝadam Filemon,

² Seyo ñum Afiya seyo ñidra yo shipashi Arkippusñe Filemon ichi ñe go ñešü na ñiñi.

³ Ñichi Tawgyew awuñe Tawgyew Jisu Masi naksü naksüchi vye go ĝüdzüw ye bá pangudruwe.

Šüvzütroi ñe Küĝüw

⁴ No shüwa Tawgyew í šüvzütrojome; seyo nudzo küĝulai ge je bá vyehuwme.

⁵ Hado cheme no bachi sé nülvo seyo vyemso chi shi-ñu na dzühulye, se Tawgyew Jisu dru ge seyo vyew güdraw nuna nadra.

⁶ No küĝujome se vyemsodaw ge bachi üdra ayo na hadamje uw ñu ge danghusajo dawé ha ye Jisu Masi ichi yo ñidra dusama.

⁷ Hado cheme noñuwwa, nó bachi nülvo yo šüpyo lüshüw seyo ĝüdzüw padame, sündada, ba yo dañe güdraw nuna nadrü-nalu hu je adjüdjüw no je aĝimiw pajome, uñuw nawa.

Unesimus ibó küĝüw

⁸ Sündada sedamje noje Jisu ge šüpyo bolu duda, se ha ñu ye udama, se í bá dügyejo.

⁹ Sedamje no vyeduw mukro Polus i se yabó Jisu Masi ibó pache ge gýow nūna babi, se ayoje šūpyo nūlvo yo ibó kŭgŭjolu.

¹⁰ No nosaw Tawgyew go Unesumus ibó no yo nochi sŭlyeñtchŭ ge sakŭlye dame no yo kŭgŭime.

¹¹ Se ibó ahuge ha madaġiw a ba, se yabó ba ñe seyo nochi dew chiġa tsŭwbaba.

¹² Se í ñe seyo dju nolu ge kadama, no se í bachi ge djütülütchowba.

¹³ Í no nochi ge vyejoñe vyeahomacha se í bó bachi vye go shŭdabi shi-ñu ibó yo sŭlyeñtchŭ sumbo, nó datunowe.

¹⁴ Sé no ba mahusŭw haje madaġoñ se bachi he nūlvo djŭdo ye datŭdalŭw yo mow lŭshŭw dawwe.

¹⁵ Hado chemeje ha danghuñda i ba yo ksŭhua dzŭhua kuw he ibó utro lyadawa shŭwa bañisa ge gýojoñe.

¹⁶ Sešo ayogo kulo mavyeduw, kulo yo je dewfo, seyo ñuw vyeduw gýowe se nochi drŭ-lŭ ge duw sŭna nŭlvobó sešo, se yabó usofu ge je seyo ġulo ge je, bachi je drŭ-lu ge sŭnda Tawgyew ge.

Filemon ichi dügyew dzŭw lŭshŭljow

¹⁷ Senameje ba nó bachi nudzoġ dakyetunowñe vyedameje, se na vyeduw yo shutrolajodawe.

¹⁸ Chemeje se nó bachi ha damje damdalyoama semome sa a bachi ha damje a kakuw, se í nochi ŭñiñi ge ġiwe.

¹⁹ Polus no nó gzŭ yo ġijome, se i no bá ġigujome; seyo ichi chejoje ha madaġi, se no añawa he daado na badru me se i babamme.

²⁰ He no ñuwwa, he lŭshŭw nó bachi Tawgyewwa nó bachi go pawe, Tawgyew ge nodrŭ nolu ye hu je adjŭdjŭw no je aġimiw daiwe.

²¹ No bachi dügyew dafiw dajo umsow vyyeñe, bá ġimkoime seyo he ana danghuwme, se no ha cheima, ba se í foje lŭbzŭw daijo.

²² Seyo he i je, nobó gýojo buġo dashŭtrŭvowe; no sŭna umsow vyedame, se bá kŭgŭw trŭdu yo noje no bachi ŭgzŭ ge djŭjome.

Mŭlŭñ šŭvzŭw

²³ Ifras se Jisu ge nodra pacheshŭw ge

²⁴ Seyo se Markus ñe Aristikurs seyo Demas seyo Luka seyo no chiġadam.

²⁵ Ñichi Prabu Jisu Masi nŭlvow ye bachi ġulodra duwe. Amin.